

అపొస్తురు కిత్తి పణిజ్

నెల్వ కిబిసినిక

లూక సువార్త రాస్తిమహి లూకనె యా పుస్తకం రాస్తాన్. లూక బెరెన్ డాక్టరు. క్రీస్తు సకం 60-63 నడిఃమి యాక రాస్త మనాద్ ఇజి వెస్సినార్. క్రీస్తు సాజి నిజితి వెన్కా మొదొహి 30 పంటెజ్ లోఱ జర్గితికెజ్ ఇబ్బె రాస్త మన్నె. లూక సువార్తదు యేసుక్రీస్తు కిత్తి గొప్ప పణిజి వందిజ్ లూక రాస్తాన్. వెనుక, యేసుక్రీస్తు పరలోకమ్దు సొహి వెనుక దేవుణు ఆత్మ వాతండ్రె వన్ని అపొస్తురు వెట గొప్ప బమ్మాతి పణిజ్ కిత్తాన్. యూదయదేసమ్దాన్ అంతియొకయాదు, బాణిజ్ రోమపట్టుం దాక యేసుక్రీస్తు వందిజ్ సువార్త సాటిస్తారె అపొస్తురు అయ కాలమ్దు కిత్తి పణిజి వందిజ్ ఇబ్బె రాస్త మనాద్.

దేవుణు యేసుజ్ పరలోకమ్దు ఒత్తాన్

1-2 నా ప్రియమాతి దెయొపిలా, నాను ముందాల్ రాస్తి పుస్తకమ్దు, దేవుణు యేసుజ్ పరలోకమ్దు ఒనెండ యేసు కిత్తి విజు పణిజి వందిజ్, యేసు నెస్పిస్తి విజు మాటెజివందిజ్ రాస్త మనాద్. దేవుణు యేసుజ్ పరలోకమ్దు ఒనిముందాల యేసు, వాండ్రు ఏర్పాటు కిత్తి అపొస్తురుజ్ వారు కిని పణి వందిజ్ దేవుణు ఆత్మ సత్తుదాన్ ఆడ్ర సిత్తాన్.

3 యేసు కస్టమ్కు ఓరిసి సాతి వెనుక నిజితండ్రె, నాను బత్తిత్త ఇజి అపొస్తురు అనుమానం సిల్లెండ నమ్మిదెజ్ యేసు వరిజ్ తోరె ఆత్తాన్. నలవయ్ రోస్కాజ్ నండొ సుట్టు యేసు అపొస్తురుజ్ తోరె ఆతండ్రె దేవుణు ఏలుబడిః వందిజ్ వర్గితాన్.

4 వారు కూడఃజి వాతివలె యేసు ఈహు ఆడ్ర సిత్తాన్, “యేరూసలేం పట్టుం డిఃసి సొన్మాట్. నా బుబ్బు మిజి సీనా ఇజి ఒట్టు కిత్తి వన్ని ఆత్మ

ఇని ఇనాయమ్‌వందిజ్ నాను ముందాల్నే వెహ్తాగదె. దన్నివందిజ్ కాప్ కిజి మండ్రు.

5 యోహాను ఏరుదాన్ బాప్తిసం సిత్తాన్. గాని సెగం రోస్కు సోహిజ దేవుణు మిజి వన్ని ఆత్మదాన్ బాప్తిసం సీనాన్”, ఇహాన్.

6 అపొస్తురు యేసు వెట కూడఃజి వాతారె వెన్‌బాతార్, “ప్రబువా, ఏలునె మా ఇస్రాయేలు లోకాజ్ మా దేసెమ్‌ది ఏలుబడిః మర్‌జి సీనిలెనా?”.*

7 యేసు వెహ్తాన్, “కాలం వందిజ్ నా బుబ్బానె ఏర్పాటు కిత్తాన్. అక్కెజ్ విజు నా బుబ్బాతి దేవుణు అతికారమ్‌దు మనాద్. యాకెజ్ విజు ఎసెజ్ జర్గినాద్ ఇజి మీరు నెస్సెజ్ అవ్‌సరం సిల్లెద్.

8 అహిజ, దేవుణు ఆత్మమీ ముస్కు వానివలె మీరు సత్తు ఆనిదెర్. అయావలె మీరు యెరూసలేమ్‌దు, యూదయ దేసెం విజు, సమరియ దేసెం విజు, లోకం విజుబాన్ నా వందిజ్ వెహ్సి నా సాసిర్ ఆనిదెర్”.

9 యా మాటెజ్ వెహ్తాండ్రె వారు సుడఃజిమహిజ్ దేవుణు యేసుజ్ పరలోకమ్‌దు ఒతాన్. అయావలె ఉండ్రె మొసాప్ వాతాదె అడ్డు కిత్తిజ్ వారు యేసుజ్ తోర్‌విండ్ర ఆతార్.

10 యేసు ఆగాసం ముస్కు సొన్ని మహిజ్ వారు ఆగాసం దరోట్సి డిటం బేసి మహార్. అయావలె వెటనె తెల్లాని పాతెజ్ పోర్‌పాతిమహి రిఎర్ దూతార్ వరి డగ్రు నిహార్.

11 “ఓ గలీలయాదికిదెరా, మీరు ఎందనిజ్ ఆగాసం దరోట్ సుడఃజినిదెర్? మీ డగ్రుహాన్ దేవుణు పరలోకమ్‌దు యేసుజ్ ఒతాన్. ఎలాగ సాహండ్రో అయావజనె మర్‌జి వానాన్‌లె”, ఇజి వారు వరిజ్ వెహ్తార్.

త్తియెజ్ అపొస్తురు వెట కూడఃవైజ్ ఏర్‌పాటు కిత్తార్

12 వెనుక అపొస్తురు ఒలివ మరెక్ మన్ని గొరొతాజ్ యెరూసలేం పట్టుమ్‌దు మహ్తా సాహార్. (ఒలివ మరెక్ మన్ని గొరొన్ యెరూసలేం పట్టుం డగ్రునె. ఉండ్రె కిలో మీటర్ దూరం మనాద్)

* **1:6 1:6** అయ కాలమ్‌దు ఇస్రాయేలు లోకురి దేసెం రోమాదికార్ ఏలుబడిః కిజి మహార్.

13 వారు యెరూసలేమ్‌ను సొహారె వారు మహి మేడః గద్దిదు ఎక్టార్. వారు ఎయెర్ ఎయెర్ ఇహిజ, పేతురు, యోహాను, యాకోబు, అంద్రెయ, పిలిపు, తోమా, బర్తోలోమయి, మత్తయి, అల్పయ్ మరిసి ఆతి యాకోబు, జలోతె† ఇని మరి ఉండ్రీ పేరు మహి సీమోను, యాకోబు మరిసి ఆతి యూద ఇనికార్.

14 వారు విజేరె కూడితారె ఉండ్రె మన్నుదాన్ డిస్‌ఎండ పార్లనం కిజి మహార్. వరివెట సెగొండెక్ అయ్యలికొండొక్‌బా వాతె మహె. యేసు యాయ ఆతి మరియ, వన్ని తంబెర్‌సీర్‌బా అబ్బె మహార్.

15 సెగం రోస్సు సొహి వెనుక డగ్గు డగ్గు నూట ఇర్‌వయ్ మణిసిర్ యేసుజ్ నమ్మితికార్ కూడిత మహార్. పేతురు వరినడిమి నిహండ్రె ఈహు వెప్టాన్,

16 “తంబెరిజాండె, దేవుణు మాటదు రాస్తి మహిక తప్‌ఎండ జర్గితాద్. దేవుణు ఆత్మ సత్తుదాన్ దావీదు రాజు యూద వందిజ్ ముందాల్నె వెప్టికాద్ జర్గితాద్. యా యూద యేసుజ్ అస్తాజ్ వాతివరిజ్ సరి తోరిస్తాన్.

17 వాండ్రు మా లోఇ ఒరెన్. ఎందనిజ్ ఇహిజ మాపు అపొస్తురు వెట కూడఃజి పణి కిదెజ్ యేసు వన్నిజ్ ఏర్‌పాటు కిత్తాన్”.

18 (యా యూద మొసెం పణిదాన్ సంపాదిస్తి డబ్బుజాణ్ బూమి కొటాన్. అబ్బె గడియబుర కితాండ్రె అర్తాండ్రె సాతాన్. అయావలె పొట బదెజ్ ఆజి వన్నిజ్ విజు వెల్లి సోతె.

19 యెరూసలేమ్‌దికార్ విజేరె యా సజతిజ్ వెహారె నెస్టార్. అందెజె యూద అర్తిసాతి యా బూమిదిజ్ వరి బాసాదు అక్కెల్లెమ ఇజి వెప్టార్. దన్ని అర్లం ఇనిక ఇహిజ, ‘ఒరెన్ లోకుదిజ్ సప్టి వందిజ్ దొప్టి డబ్బుదాన్ కొటి బూమి’ ఇజి అర్లం).

20 పేతురు మరి వెప్టాన్, “కీర్తనం పుస్తకమ్‌దు ముందాల్నె ఈహు రాస్త మనాద్: వన్ని ఇల్లు ఎయెన్‌బా మన్‌ఎండ ఆపిన్, దన్ని లోఇ

† 1:13 1:13 జలోతె ఇహిజ పటుదల మన్నికాన్ ఇజి అర్లం

ఎయెన్ బా బత్తిఎండ ఆపిన్". ఈహుబా రాస్త మనాద్: అపొస్తుడు‡ పజ వాండ్రు కిత్తి పణి మరి ఒరెన్ లాగె ఆపిన్.

21-22 అందెజె మాపు పదకొండు మణిసిర్ అపొస్తురు వెట కూడేజి మండ్రెజ్ మరి ఒరెన్ వన్నిజ్ ఏర్పాటు కిదెజ్వలె. యోహాను యేసుప్రబుజ్ బాప్తిసం సిత్తి బాణిజ్ అసి యేసుప్రబు పరలోకమ్దు సొనిదాక మా నడేమినె కూడేజిపాడేజి మా వెట మహికాన్ ఒరెన్ వన్నిజ్ అవ్వసరం. ఎండనిజ్ ఇహిజ యేసు సాతి పరిబాణిజ్ మర్జి బత్తితాన్ ఇజి వాండ్రుబా మా వెట సాసి మండ్రెజ్.

23 అందెజె కూడేజి వాతి మహికార్ రిఎరి పేర్కు వెహూర్. ఒరెన్ యోసేపు (వన్నిజ్ యుస్తు, బర్సబ ఇని పేర్కుబా మహా) మరి ఒరెన్ మత్తియ.

24-25 అయావలె వారు ఈహు పార్దనం కిత్తార్, “ప్రబువా, విజెరి మన్నుదు మన్ని విజు ఆలోసనమ్కు నీను నెసిని. యూద, వన్నిజ్ తగితి బాడ్డిదు సొహాన్. వాండ్రు డిసిసాహి పణి, ఇహిజ సజమ్దిజ్ నడేపిసి సేవకిని పణి సిదెజ్ వన్నిజ్ బదలు యా రిఎర్ లొఇ ఎయెజ్ నీను ఏర్పాటు కిత్తి ఇజి మజి తోరిన్అ”.

26 వెనుక వారు సీటిజ్ పొక్తార్. అయావలె మత్తియ ఇని పేరుదాన్ సీటి వాతాద్. అందెజె మత్తియెజ్బా పదకొండు మణిసిర్ అపొస్తురు వెట లెక్క కల్పార్.

2

పెంతెకొస్తు పండొయ్ నాండిజ్ దేవుణు ఆత్మ వాజినాద్

1 పెంతెకొస్తు ఇని పండొయ్ నాండిజ్ యేసుజ్ సమ్మితికార్ విజేరెకూడేజి ఉండ్రె ఇండ్రొ మహార్.

2 వెటనె ఆగాసమ్దాన్ ఉండ్రె జాటు వాతాద్. అయ జాటు, పెరి గాలి వానివజ జాటుదాన్ వాతాదె వారు బస్తిమహి ఇండ్రొ నిండ్రెతాద్.

‡ 1:20 1:20 అపొస్తురు. సజమ్దిజ్ నుడేజి నడేపిసైజ్ ఏర్పాటు ఆజి పొకె ఆతికార్

3 వారు సుడేతిజ్ సిసుబొద్దు లెకెండ తోర్నిక ఉండ్రీ వాతాదె ఒరెన్ ఒరెన్ ముస్సు ఉండ్రె ఉండ్రె కొనెజ్ డిఃగితె.

4 విజేరె ముస్సు దేవుణు ఆత్మ సత్తు వాతిజ్ వారు, వరిజ్ నెన్ ఇ బాసెజ్ వర్గిదెజ్ మొదొల్స్తార్. దేవుణు ఆత్మనె నెన్ ఇ బాస వర్గిదెజ్ వరిజ్ సత్తు సిత్తాన్.

5 అయావలె విజు దేసమ్ కాణిజ్ వాతిమహి బక్తిమన్ని యూదురు యెరూసలేం పట్టమ్దు మహార్.

6 యూదురు మంద లోకుర్ యా జాటు వాతిబాన్ కూడితార్. వారు వర్గినిక వీరు వన్ని వన్ని సొంత బాసెజాణిజ్ వెహారె యా కూడేజి వాతి మహి యూదురు బమ్మ ఆతార్. “వీరు మాటు వర్గిని బాసెజ్ వర్గిజినార్ కొటె”, ఇజి వెహార్.

7 అయావలె వాతి మహికార్ విజేరె ఒదె బమ్మ ఆతారె ఒరెన్ వెట ఒరెన్ వెహార్, “యాక ఎలాగ? వీరు విజేరె గలీలయాదికార్ ఆవిరా?

8 గాని మాపు పుట్టిమహి నాహ్కాణి ఆఇ ఆఇ బాసెజ్ యా గలీలయాదికార్ వర్గిజినార్. యాక మాపు వెంజినావ్.

9-11 పార్తియకు, మదియికు, ఎలామియుకు, మెసొపొతేమియ, యూదయ, కపదొకియ, పొంతు, ఆసియ, పుగియ, పంపులియ, అయ్గుపు, కురేనె డగ్రు మన్ని లిబియ, రోమ దేసెమ్దాన్ కాల వాతికార్ (యూదురు, యూదమతం నమ్మితి యూదురు ఆఇకార్) క్రేతియురు, అరెబియురు, దేవుణు కిత్తి గొప్ప పణిజ్ మాటు విజెటె పుట్టి బాసాదు వెహిక వెంజినావ్.

12 ఒడిఃబిత్తిజ మన్ను కూడేవిద్. యాక ఇనిక ఆనాద్లెనొ”, ఇజి వారు విజేరె పంబ్ర ఆతారె ఒరెన్ వెట ఒరెన్ వర్గితార్.

13 సెగొండార్ వీరు తియాజ్ ద్రాక్స రసం ఉటారె సొస్త మనార్ ఇజి వరిజ్ సెకాల్ కిత్తార్.

పేతురు కూడేజి వాతి లోకుర్ వెట వెహినాన్.

14 అయావలె పదకొండు మణిసిర్ అపొస్తురు వెట మహి పేతురు నిజితండ్రె అబ్బె కూడేజి వాతి లోకుర్ వెట డటం వెహాన్,

“యెరూసలేమ్ దు బత్కిజిని మా సొంత లోకుర్ ఆతి యూదయ లోకాండె, నాను వెహ్పిక నెగ్రెండ వెండ్రు. వీరు విరిజ్ నెన్ ఇ బాసెజ్ వర్గితిక మీరు వెహిదెర్.

15 మీరు ఒడిఃబిని లెకెండ వీరు సోస్తికార్ ఆవిర్. పొద్దు సోసి ఏలు అంబెలి వేడఃబా ఆవిద్.*

16 గాని దేవుణు మాటెజ్ వెహ్పి యోవెల్ ప్రవక్త ముజాలె వెహ్పికదె మీరు సుడఃజినిదెర్.

17 యోవెల్ ప్రవక్త ఇనిక వెహ్పాన్ ఇహిజ ఆకార్ దినమ్ కాజ్ నాను ఇనిక కిన్ ఇజి దేవుణు వెహ్పినాన్. విజు లోకాజ్ నా ఆత్మదిజ్ సీన. మీ మరిసిర్, మీ గాడ్లిక్, ప్రవక్తరు లెకెండ దేవుణు మాటెజ్ వర్గినారలె. మీ దజ్డెఃజ్ దేవుణు బాణిజ్ వాని దర్సనమ్ కు† సూణార్. మీ డొక్టార్ బా దేవుణు బాణిజ్ వాని కలెజ్ సూణార్లె.

18 అయ ఆకార్ దినమ్ కాజ్ నా ముస్కు నమకం ఇడఃతి పణి మణిసిరిజ్ బా విజెరిజ్, అయ్ లి కొడఃకాజ్, మొగ్గ కొడఃకాజ్ నా ఆత్మ సీనా. వారు విజెరె దేవుణు మాటెజ్ వెహ్పారలె.

19 ఆగాసం ముస్కు విజెరె సూణి వజ నాను గొప్ప బమ్మాతి పణిజ్ తోరిస్సు. యా బూమి ముస్కు ఎయెర్ బా తొఇ పణి నాను కిన్. నల, సిసు, కర్నిగోయి బూమి ముస్కు వానెలె.

20 ప్రబు మర్జి వాని అయ గొప్ప బమ్మాని దినం వాని ముజాల పొద్దు సీకటి ఆనాద్లె. నెల నల లెకెండ ఎరాజ్ ఆనాద్లె.

21 అయావలె ఎయెర్ బా దేవుణు పేరు అసి వన్ని ముస్కు నమకం ఇట్టిజ వరిజ్ విజెరిజ్, దేవుణు, తీర్పుదాన్ గెల్ పిస్నాన్లె.

22 పేతురు మరి వెహ్పాన్, “ఇస్రాయేలు లోకాండె, నెగ్రెండ వెండ్రు. నజరేతు వాండ్రు ఆతి యేసు అతికారం దేవుణు బాణిజ్ వాతిక ఇజి దేవుణు రుజుప్ కిత్తాన్. ఎలాగ ఇహిజ, యేసు వెట మీ లొఇ కిత్తి గొప్ప

* **2:15 2:15** యూదురు పండొయ్ వేడఃదు పెందాత్ని ఉణ్ ఎర్. పార్సనం వీజితి వెనుక తొమ్మిది గంట వెనుకానె ఉణార్ † **2:17 2:17** దర్సనమ్ కు. దేవుణు బాణిజ్ వాని మాటెజ్ ని బొమ్మెజ్ కలాదు సుడఃతి లెకెండ తెలివి మహివలె సూణిక్

పణిజాజ్, ఎయెర్ కిదెజ్ అట్ ఇ బమ్మాతి పణిజాజ్ రుజుప్ కిత్తాన్. యాక విజు మీరు నెసినిదెర్.

23 యా యేసుజ్, ఒరెన్ మణిసి మీ డగ్గు ఒపజెప్తాన్. యా సజతి దేవుణు ముందాల్నె నెస్తాన్. యాక దేవుణు ముందాల్నె ఏర్ పాటు కిత్తి సజతి. మీరు యేసుజ్ సెఇవరి దర్పుదాన్ అస్తిదెరె సిలువ మున్ను డెయ్ జి సప్తిదెర్.

24 గాని దేవుణు యేసుజ్ సావుదాన్ తప్పిసి బత్తిస్తాన్. నండొ మాలెజ్ ఆజి సాతాన్ గాని దేవుణు వన్నిజ్ సావుదు డిన్ ఏతాన్. యేసుజ్ ఎలాకాలం తొప్పి ఇడెడెజ్ సావుదిజ్ అట్ ఏండ ఆతాద్.

25 యేసు మాటెజ్ దావీదురాజు ముందాల్నె ఈహు వెప్తాన్ నాను దేవుణుదిజ్ ఎల్లకాలం నా డగ్గు సుడెజి మహా. దేవుణు నా ఉణెర్ పడెక మనాన్. అందెజె నాను మన్నుదు మాలెజ్ ఆవి.

26 అందెజె నా మన్నుదు నాను గొప్ప సర్ల ఆజిన. నాను సర్ల ఆజి వర్గిజిన. నాను నా ఒడెల్ దేవుణుదిజ్ ఒపజెప్ప. ఎందనిజ్ ఇహిజ ఒడెల్ సాతి వెనుక మరి బత్తిన ఇజి నాను నెసిన్.

27 ఎందనిజ్ ఇహిజ నీను నా పాణమ్ దిజ్ డిన్ ఇ. నమ్మిదెజ్ తగ్గికాన్ ఆతి నీ సేవ కినివన్ని పీనుగు సబ్ జి సొండ్రెజ్ సరి సిఇ.

28 నీను నజి ఎలాకాలం బత్తిని సరి తొరిస్తి. నీను నా వెట మహిజ్ నాను గొప్ప సర్ల ఆజిన”.

29 “నా తంబెరిజాండె, నాను దయ్ రమ్ దాన్ వెప్పిన, మా అనిగొగొ ఆతి దావీదురాజు సాతండ్రె వన్నిజ్ ముస్తార్. వన్నిజ్ ముస్తి బాడ్డి ఎంబె మనాద్ ఇజి ఏలుబా మాటు నెసినాట్.

30 గాని దావీదురాజు దేవుణు ప్రవక్త. దేవుణు వన్ని పేరు అసి వాండ్రె దావీదురాజు వెట ఒట్టు పొక్తాన్. అక్క ఇనిక ఇహిజ, దావీదురాజు కుటుమ్ దాన్ ఒరెన్ వన్నిజ్ దావీదురాజు లెకెండ రాజు కిన ఇజి. యాక దావీదురాజు నెస్త మహాన్.

31 దేవుణు యేసుక్రీస్తుజ్ సాతి వరి బాణిజ్ డిన్ ఏన్ ఇజి, యేసుక్రీస్తు పీనుగు సబ్ జి సొన్ ఏద్ ఇజి దావీదురాజు ముందాల్నె నెస్తాన్. ముందాల్నె నెస్తాండ్రె, యేసు సాతి వెనుక మరి మరజి

నిజ్నాన్లె ఇజి ముందాల్నె దావీదురాజు వెహ్లాన్.

32 యా యేసుజ్ దేవుణు మర్జి బత్కిస్తాన్. దన్నిజ్ మాపు విజెపె సాసిర్.

33 అహిజ దేవుణు యేసుజ్ వన్ని ఉణెర్ పడఃకాద్ బస్పిసి వన్నిజ్ ఇంక మిస్తి గవరం ఏలు సిత్తాన్. దేవుణు సీనా ఇజి ఒట్టు కిత్తి వన్ని ఆత్మ యేసుజ్ సిత్తాన్. ఏలు మీరు సుడఃజినికెజ్ వెంజినికెజ్ యేసు మజి సీనా ఇజి వెహ్లా దేవుణు ఆత్మనె.

34-35 దావీదురాజు వెహ్లాక వన్ని వందిజె ఆవద్. దావీదురాజు పరలోకమ్దు సాన్వన్. గాని వాండ్రు ఈహు వెహ్లాన్, నాను నిజి పడఃఇ వరిజ్ నీ పాదమ్కాజ్ ముణుకుజ్ ఉఱిజి మాడిఃపిస్సిదాక నీను నా ఉణెర్ పడఃకాదు బసి మన్అ ఇజి దేవుణు నా ప్రబు వెట వెహ్లాన్.

36 పేతురు మరి వెహ్లాన్, “ఇస్రాయేలు కుటుమ్దికార్ ఆతి మాటు విజెటె యాక అనుమానం సిల్లెండ నెస్తెజ్ వలె. మీరు సిలువాద్ సప్తి యేసుజ్ దేవుణు ప్రబువజ, క్రీస్తువజ ఏర్పాటు కిత్తాన్”.

37 యాక వెహారె లోకుర్ వరి మన్నుదు నండొ బాద ఆజి పేతురుజ్ మరి అపొస్తరుజ్ వెన్బాతార్, “దాదారండె, ఏలు మాపు ఇనిక కిదెజ్ అట్నాప్?”.

38 అయావలె పేతురు వెహ్లాన్, “మీ పాపమ్కు విజు ఒప్పుకొడఃజి డిసిసిజి, దేవుణుదిజ్ లొజిజినాప్ ఇజి విజెరిజ్ తోరిస్తెజ్ యేసు, క్రీస్తు ఇజి, వాండ్రు, మీ ప్రబు ఇజి తోరిస్తెజ్ బాప్తీసం లాగె ఆదు. అయావలె మీ పాపమ్కు నొరె ఆనె. దేవుణు సీనా ఇజి ఒట్టు కిత్తి దేవుణు ఆత్మ నిజి దోహ్కాద్లె.

39 దేవుణు సీనా ఇజి ఒట్టు కిత్తి యా దేవుణు ఆత్మ మిజి, మీ కొడఃరిజ్, దూరమ్ది వరిజ్ విజెరిజ్ దేవుణు సీనాన్. వన్ని మున్ను నమ్మిదెజ్ దేవుణు కూక్కి వరిజ్ విజెరిజ్ దేవుణు ఆత్మ సీనాన్”.

40 మరి నండొ నండొ మాటెజాన్ పేతురు వరిజ్ గటిజ వెహ్లాన్. దేవుణుదిజ్ డిసి సొని యా సెఇ లోకాజ్ వాని తీర్పుదాన్ మీరు గెల్చి

సొండ్రెజ్ ఇజి పేతురు వరిజ్ మరి మరి వెహ్తాన్.

41 పేతురు వెహ్తా మాటెజ్ నమ్మిత్తికార్ బాప్తిసం లాగె ఆతార్. అయా రోజు రమరమి మూండ్రీ వేలు లోకుర్ యేసుజ్ నమ్మిత్తి వరివెట కూడితార్.

నమ్మిత్తికార్ కూడేజి మంజినార్

42 వారు అపొస్తురు నెన్పిస్తి మాటెజ్ డిస్ఎండ మహార్. వారు యేసుజ్ నమ్మిత్తికార్ కూడేజి మంజిని బాన్ డిస్ఎండ కూడేజి వాతారె ప్రబు వీర్పాటు కిత్తి బోజనం కిజి మహార్. డిస్ఎండ పార్లనం కిజి మహార్.

43 అపొస్తురు దేవుణు సత్తుదాన్ నండో బమ్మాని పణిజ్ బమ్మాని గుర్తుజ్ కిత్తార్. అయావలె విజేరె నండో బమ్మ ఆతార్.

44 యేసుజ్ నమ్మిత్తికార్ విజేరె ఉండ్రె మన్సు మంజి వరిజ్ కల్లితి మహిక విజు విజేరి వందిజ్ కర్సు కిత్తార్.

45 అక్కాదె ఆవండ వారు వరి ఆస్తిజ్ పొర్ని ఎయెజ్ ఎయెజ్ అవ్సరం మనాదో వరిజ్ సిత్తార్.

46 రోజు తవ్వండ వారు యెరూసలేమ్దు మన్ని దేవుణు గుడిది డేవారు కూడేజి వాజి మహార్. వారు విజేరె ఇల్లుదిజ్ తవ్వండ కూడేజి వాతారె సర్ల ఆజి బోజనం కిజి మహార్. ఎయెజ్బా అవ్సరం మన్ని వరిజ్ వారు సర్లదాన్ సీజి మహార్.

47 వారు దేవుణుదిజ్ స్తుతి కిజి మహార్. బాన్ మహికార్ విజేరె యా యేసుజ్ నమ్మిత్తి వరి వందిజ్ 'వీరు ఎసానొ నెగ్గికార్' ఇజి వెహ్తార్. రోజురోజు యేసుప్రబు ముస్సు నమకం ఇడేతి వరి లెక్క వాండ్రు నండో కిత్తాన్.

3

నడిదెజ్ అట్ ఇ సొట వన్నిజ్ పేతురు నెగెండ కిత్తాన్.

‡ 2:42 2:42 యేసుప్రబు సాపు వందిజ్ గుర్తు కిదెజ్ మన్ని బోజనం

1 ఒర్నొండు వేలె మూండ్రి గంటెజ్ టయమ్దు, లోకుర్ దేవుణు గుడిఁదు పార్లనం కిని టయమ్దు పేతురు, యోహాను, రిఎర్ కూడ్ఁజి దేవుణు గుడిఁదు సొన్ని మహార్.

2 పుట్టి బాణిజ్ అసి నడిఁదెజ్ అట్ఱ బరెన్ సొట వాండ్రు అబ్బె దేవుణు గుడిఁ లొఱ సొని సరిపడఁకాద్ డబ్బు లొసి మహాన్. దేవుణు గుడిఁది డేవ్దు సొని అయ సరి పేరు సుందరం ఇహార్. అయ సొట వన్నిజ్ వన్ని లోకుర్ రోజు పిండిజి తసి అయ పడఁకాద్ ఇడ్ఁజి మహార్.

3 పేతురు యోహాను దేవుణు గుడిఁదు సొని సరి డగ్రు వాతిజ్ అయ సొట వాండ్రు డబ్బుజ్ లొస్తాన్.

4 లొస్తిజ్, పేతురు వన్నిజ్ డిటం బేస్తాన్. యోహానుబా వన్నిజ్ నె డిటం బేస్తాన్. పేతురు వన్నివెట, “నీను మా దరోట్నె బేస్అ” ఇహాన్.

5 అందెజె సొట వాండ్రు, వీరు ఇనికబా సీనార్ ఇజి ఒడిఁబిజి వరి దరోట్నె బేస్తాన్.

6 గాని పేతురు, “నిజి సీదెజ్ నా బాన్ డబ్బుజ్ సిల్లు. గాని నా బాన్ మనిక నాను నిజి సీనా. నజరేతుదికాన్ యేసుక్రీస్తు అతికారమ్దాన్ నీను నడిఁఅ”, ఇహాన్.

7 పేతురు అయ సొట వన్నిజ్ ఉణికిదు అస్తాండ్రె నిక్తాన్. వెటనె వన్ని పాదమ్కు కణ్క కాల్కు సత్తు ఆతె.

8 వాండ్రు లిట్నె నిజితండ్రె నడిఁతాన్. పేతురు యోహాను వెట దేవుణు గుడిఁ డేవ్దు నడిఁజి సొహాండ్రె డాట్నీ దేవుణుదిజ్ స్తుతి కిత్తాన్.

9 వీండ్రు నడిఁసినిక, దేవుణుదిజ్ స్తుతి కినిక విజేరె సుడఁతార్.

10 దేవుణు గుడిఁదు సొని సుందరం ఇని సరిడగ్రు బసి డబ్బు లొసి మహి అయ సొట వాండ్రు వీండ్రె ఇజి వారు గుర్తు అస్తాార్. వన్నిజ్ జగ్గితిక సుడఁజి వారు విజేరె గొప్ప బమ్మ ఆతార్.

దేవుణు గుడిఁదు మన్ని లోకుర్ వెట పేతురు వర్గిజాన్

11 పేతురు, యోహానుని అయ నెగెండ ఆతికాన్ దేవుణు గుడిఁదు మన్ని సొలొమోను ఇని అరజుదు మహార్. ఆ నెగెండ ఆతికాన్

పేతురుజ్ యోహానుజ్ గటిజ కిక్కాజ్ అసి మహాన్. అబ్బె మహికార్ జర్గితిక సుడేజి గొప్ప బమ్మ ఆతారె పేతురు యోహానుని నెగెండ ఆతి సొట వాండ్రు మహిబాన్ ఉహ్కాసి వాతార్.

12 లోకుర్ విజేరె కూడేజి వానిక సుడేతండ్రె పేతురు వరిజ్ వెన్బాతాన్, “ఇస్రాయేలు లోకాండె, ఇబ్బె జర్గితిక సుడేజి మీరు ఎందనిజ్ బమ్మ ఆజినిదెర్? మీరు ఎందనిజ్ మజి బేసినిదెర్? మా సొంత సత్తుదాన్, మా బక్తిదాన్ వీండ్రు నడిదెజ్ కిత్తావ్ ఇజి మీరు ఒడిబిజినిదెరా?

13 మా అనిగొగొర్ ఆతి అబ్రాహాం, ఇస్సాకు, యాకోబు పార్లనం కిత్తి దేవుణు, యా సొట వన్నిజ్ నెగెండ కిజి వన్ని సేవ కినికాన్ ఆతి యేసుజ్ నండొ మర్యాద సిత్తాన్. గాని మీరు యా యేసుజ్ సప్తెజ్ ఒపజెప్పిదెర్. పిలాతు యేసుజ్ డిసిసిదెజ్ ఒడిబిత్తిజ్బా మీరు పోని ఇహిదెర్.

14 పాపం సిల్లి నీతినిజయ్మిమన్ని వన్నిజ్ మీరు పోని ఇజి వెప్తిదెర్. లోకాజ్ సప్పి ఒరెన్ వన్నిజ్ మీరు డిసిసిదు ఇజి వెప్తిదెర్.

15 విజు దన్నిజ్ బత్తు, సిత్తి వన్నిజ్ మీరు నప్పిదెర్. గాని దేవుణు వన్నిజ్ మర్జి నిక్తాన్. యా సజతి వందిజ్ మాపు విజెపె సాసిర్.

16 యేసు సత్తుదాన్ నె యా సొట వాండ్రు సత్తుఆతాన్. మీరు విజిదెరె ఏలు సుడేజినిక యేసు పేరుదు ఇడ్డి నమకమ్దానె వాతాద్. యేసు ముస్సు ఇడ్డి నమకమ్దానె విన్నిజ్ సత్తు వాతాద్”.

17 “ఏలు నా తంబెరిజాండె, మీరుని, మీ పెద్దెలుజ్, యేసుజ్ కిత్తిక మీరు ఇనిక కిజినిదెరో ఇజి నెన్ ఏండ కిత్తిదెర్ ఇజి నాను నెన్ను.

18 దేవుణు నండొ పంటెజ్ ముందాల్న విజేరె ప్రవక్తర్ వెట ‘వన్ని క్రిస్తు కన్ఠమ్కు ఓరిస్సాలె’ ఇజి వెప్తా మహాన్. దేవుణు ముందాల్నె వెప్తివజనె ఈహు జర్గితాద్.

19-20 దేవుణు మీ పాపమ్కు సెమిన్ని వందిజ్ మీరు మీ పాపమ్కు ఒప్పుకొడేజి డిసిసిజి దేవుణు డగ్రు మర్జి రదు. దేవుణు మీ ఆత్మదిజ్ నెగ్గి పాణం సీని వందిజ్, దేవుణు మీ వందిజ్ ఏర్పాటు కిత్తి క్రిస్తు ఆతి యేసుజ్ మీ డగ్రు పొక్కి వందిజ్ దేవుణు డగ్రు మర్జి రదు.

21 దేవుణు ముందాల్నై వాండ్రు పోక్తి ప్రవక్తర్ వెట వెప్పివజ దేవుణు విజు దన్నిజ్ కొత్తాక లెకెండ్ కినిదాక యేసు పరలోకమ్దు మండ్రెజ్ వలె.

22 దేవుణు - ప్రవక్తరు లోఇ ఒరెన్ మోసె ఇనికాన్ ఈహు వెహ్హన్: “ప్రబు ఆతి మీ దేవుణు, నా లెకెండ్ ఒరెన్ ప్రవక్తెజ్ మీ లోకుర్ లోఇహాన్ పుటిస్సాన్లె. వాండ్రు వెప్పిక విజు మీరు నెగ్రెండ వెంజి లోజిదెజ్ వలె.

23 ఎయెర్బా ఆ ప్రవక్త వెప్పిక వెంజి లోజివిండ మహిజ వాండ్రు దేవుణు లోకుర్ వెట మన్విండ పూర్తి పాడానా సొనాన్.

24 సముయేలు ప్రవక్త, వన్ని వెనుక వాతి ప్రవక్తరు విజేరె యా దినమ్కాజ్ వందిజ్ దేవుణు సిత్తి మాటెజ్ ముందాల్నై వెప్తా మహార్.

25 దేవుణు ప్రవక్తర్ వెట కిత్తి ఒట్టు మీ వందిజె. దేవుణు మీ అనిగొగోరు వెట కిత్తి ఒట్టు మీ వందిజె. మీ అనిగొగొ ఆతి అబ్రాహాం వెట దేవుణు కిత్తి ఒట్టు ఇనిక ఇహిజ, మీ తెగాది వన్ని బాణిజ్ యా లోకమ్దు మన్ని విజేరిజ్ నాను దీవిన్న.

26 అందెజె దేవుణు వన్ని సేవ కిని క్రీస్తుజ్ ఏర్పాటు కితాండ్రె ముందాల మీబానె పోక్తాన్. ఎందనిజ్ పోక్తాన్ ఇహిజ మీ నెఇ పణిజాణ్ మజి డిఃబిసి దేవుణుబాన్ మర్జి తసి మిజి దీవిస్తెజ్ వన్నిజ్ పోక్తాన్”, ఇజి పేతురు వెహ్హన్.

4

పేతురుజ్ యోహానుజ్ అస్తార్

1 పేతురు యోహాను లోకుర్ వెట వర్గిజి మహిజ్ పుజేరిజు, సదుకెయరు, దేవుణు గుడిఃదు మన్ని జమాన్జ అతికారి పేతురు యోహాను బాన్ వాతార్.

2 అపొస్తురు నెన్పిసినిక వెహారె వారు కోపం ఆతార్. ఎందనిజ్ ఇహిజ యేసు సాజి మర్జి బత్తితాన్ ఇజి వెప్పి సాతికార్ మరి బత్తినార్ ఇజి వారు రుజుప్ కితార్.

3 వారు పేతురుజ్జ్ యోహానుజ్జ్ తొమ్మి ఒతారె మహ్నా నాండిజ్జ్ పెందాల్ దాక జెలిదు ఇట్టార్. ఎందనిజ్జ్ ఇహిజ అయావలె పొదొయ్ ఆత మహాద్.

4 గాన్ని వారు నెన్పిసినిక వెహికార్ నండొ లోకుర్ యేసుజ్జ్ నమ్మితార్. యేసుజ్జ్ నమ్మిత్తి వరి లెక్క ఎలు రమరమి అయ్దు వేలు ఆతాద్.

5 మహ్నా నాండిజ్జ్ యూద అతికారిజ్, యూద పెద్దెలుజు, యూదురి రూలు నెస్పిసినికార్ వీరు విజేరె యెరూసలేమ్దు కూడిత వాతార్.

6 విజేరె పుజేరిజ మున్ను పెరి పుజేరి ఆతి అనయు, కయవయు, పెరి పుజేరి కుటుమ్దికార్ యోహాను, అలెక్సంతరు ఇనికార్, మరి సెగొండార్ మొగకొడ్డిర్ బాన్ కూడిత వాతార్.

7 వారు పేతురుజ్జ్ యోహానుజ్జ్ వరి ముందాల నిల్వారె వెన్బాతార్, “వీరు ఎమేణి సత్తుదాన్, ఎయె పేరుదాన్ ఇక కిత్తిదెర్?”.

8-9 అయావలె దేవుణు ఆత్మ సత్తు పేతురు మున్ను వాతాద్. అయ సత్తుదాన్ నె పేతురు వెహాన్: “లోకాజ్ అతికారిజాండె, పెద్దెలుజాండె, యా సొట వన్నిజ్ కిత్తి నెగ్గి పణి వందిజ్ వాండ్రు ఎయె సత్తుదాన్ నెగెండ ఆతాన్ ఇజి మీరు మజి నేండ్రు కరాయి ఇజినిదెర్.

10 దిన్ని వందిజ్ మాపు వెహాజ్ ఇహిజ, మీరు విజిదెరె, ఇస్రాయేలు లోకుర్ విజేరె యాక నెస్తెజ్ వలె. మీరు సిలువాదు డెయ్జి సప్తి యేసుక్రీస్తుజ్ దేవుణు మర్జి బత్కిస్తాన్. సాతి బత్కితి నజరేతు వాండ్రు ఆతి యేసుక్రీస్తు సత్తుదాన్ నె వీండ్రు పూర్తి నెగెండ ఆజి మీ నడిమిదు మనాన్.

11 యా యేసుక్రీస్తు వందిజ్ ఈహు రాస్త మనాద్. అక్క ఇనిక ఇహిజ, ఇల్లు తొప్పి మీరు నెక్తిపోక్తి పణుకునె మూలదిజ్ మూలపణుకు ఆతాద్.

12 యేసునె మిజి వాజిని సిక్నదాన్ గెల్పిస్తెజ్ అట్నాన్. ఎందనిజ్ ఇహిజ యా లోకమ్దు లోకాజ్ వాని సిక్నదాన్ వరిజ్ గెల్పిస్తెజ్ మరి ఎయెరి పేరుబా దేవుణు సివతాన్. యేసు పేరునె సిత్తాన్.

13 పేతురు యోహాను తియెల్ ఆవండ నెగ్గెండ వర్గిజిని మాటెజ్ వెంజి సన్హద్రిం సజమ్దికార్ బమ్మ ఆతార్. ‘వీరు ఇనికబా

నెన్ ఇకార్, పెరి సదువు సద్ విఇకార్' ఇజి నెస్తారె బమ్మ ఆతార్. పేతురు యోహాను యేసు వెట కూడఃజి మహికార్ ఇజి వారు నెస్తార్.

14 గాని ఆ నెగెండ ఆతికాన్ పేతురు యోహాను వెట నిల్ని మహిజ్ ఇనికబా మర్జి వెహైజ్ సన్ హద్రిం సజమ్ దికార్ అట్ ఎతార్.

15 అందెజె వారు పేతురుజ్ యోహానుజ్ నెగెండ ఆతి వన్నిజ్ సజమ్ లొఇహాన్ వెల్లి పొక్తారె వరి లొఇ వారె వర్లితార్.

16 “విరిజ్ ఇనిక కిదెజ్? వీరు కిత్తి బమ్మాని పణి వందిజ్ యెరూసలేమ్ దికార్ విజేరె నెసినార్. అక్క జర్లి ఏతాద్ ఇజి మాటు వెహైజ్ అట్ ఎట్.

17 యేసు పేరు అసి ఎయెన్ వెటబా ఎసెజ్ బా ఇనికబా వెహ్మాట్ ఇజి మాటు విరిజ్ గటిజ వెహ్మాట్. యా సజతి మహికార్ బా నెన్ ఏండ మండ్రెజ్” ఇహార్.

18 అయావలె వారు పేతురుజ్ యోహానుజ్ లొఇ కూక్తారె, “ఎసెజ్ బా యేసు పేరు అసి వెహ్మాట్. యేసు పేరు అసి బోదిస్మాట్”, ఇజి ఆడ్ర సితార్.

19 గాని పేతురు యోహాను ఈహు వెహ్మార్, “ఏలు మీరె వెహ్మ, దేవుణుదిజ్ లోబడఃదెజా మిజి లోజిదెజా? దేవుణు సుడఃతిజి ఎమేణిక సరియాతిక?

20 మాపు ఇహిజ, మాపు సుడఃతి దన్ని - వందిజ్ మాపు వెహి దన్ని వందిజ్ వెహ్ - ఏండ మండ్రెజ్ అట్ ఎప్”.

21 పేతురుజ్ ని యోహానుజ్ ఎలాగ సిక్కు సీదెజ్ ఇజి వారు నెన్ ఏతార్. ఎందనిజ్ ఇహిజ దేవుణు కిత్తి గొప్పు పణి వందిజ్ లోకుర్ విజేరె దేవుణుదిజ్ స్తుతి కిజి మహార్. అందెజె సజమ్ దికార్ పేతురుజ్ యోహానుజ్ ‘యేసు పేరు అసి వెహైజ్ ఆవిద్’ ఇజి గటిజ మరి బెద్రిసి వెహ్మారె డిఃస్తార్.

22 దేవుణు వన్ని సత్తుదాన్ బమ్మాతి పణి కిజి నెగెండ కిత్తి యా సొట వన్నిజ్ వయ్ సు నలపయ్ పంటెజ్ ఎక్కునె మహద్.

నమ్మితి వరి పార్దనం

23 పేతురు యోహాను డిబె ఆతి వెటనె నమ్మిత్తి వరి డగ్రు సాహార్. సాహారె పెరి పుజేరిజు, పెద్దెలుజు వరి వెట వెష్టైక విజు వెహ్హార్.

24 పేతురు యోహాను వెష్టైక వెహారె వారు విజేరె కూడితారె ఉండ్రె మన్సుదాన్ దేవుణుదిజ్ ఈహు పార్లనం కిత్తార్, “విజు దన్నిజ్ ప్రబు ఆతి దేవుణు, నీనె ఆగాసం, బూమి, సమ్దరం, వనక లోఇ మన్ని విజు దన్నిజ్ పుటిస్తి.

25 దేవుణు, నీ సేవ కినికాన్ ఆతి మా అనిగొగొ దావీదురాజు వెష్టైక నీ ఆత్మ సత్తుదాన్ నీనె వెహ్పిస్తి. అక్క ఇనిక ఇహిజు, యా యూదురు ఆఇకార్ ఎందనిజ్ కోపం ఆజినార్. యా లోకుర్ ఎందనిజ్ ఇని దన్నిజ్ పణిదిజ్ రెవకెజ్ ఒడిబిజినార్?

26 బూ లోకమ్ది రాజుర్, అతికారి లోకుర్, ప్రబు ఆతి దేవుణు వెట, దేవుణు ఏర్పాటు కిత్తి క్రిస్తు వెట ఎద్దిస్సెజ్ కూడేజి వాజినార్.

27 ఆహె హేరోదు, పొంతి పిలాతు, యూదురు, యూదురు ఆఇ లోకుర్ వెట యా పట్టుమదు కూడిత మహార్. వారు నీను ఏర్పాటు కిత్తి పాపం సిల్లి నీ సేవ కినికాన్ ఆతి యేసుజ్ సప్తెజ్ ఒడిబిజి మహార్.

28 దేవుణు, నీ సత్తుదాన్, నీ ఇస్టమ్దాన్ ఇనిక జర్గినాద్లె ఇజి ముందాల్నె నీను ఏర్పాటు కిత్తిదొ అయాలెకెండె వారు కిత్తార్.

29 ఏలు ప్రబువా, వారు మజీ బద్రిసిని దన్నిజ్ సుడేఅ. మీ సేవ కినికార్ ఆతి మాపు నండొ దయ్ రమ్దాన్ నీ మాటెజ్ బోదిస్సెజ్ మజీ సత్తు సిదా.

30 కస్టమ్కు మన్ని వరిజ్ నెగెండ్ కిజి మీ సత్తు తోరిన్అ. మీ బాణిజ్ వాతి నమ్మిదెజ్ తగ్గికాన్ ఆతి మీ సేవ కినికాన్ ఆతి యేసు పేరుదాన్ గొప్ప బమ్మాతి పణిజ్ బమ్మాతి గుర్తుజ్ కిఅ”.

31 వారు పార్లనం కిత్తి వెనుక వారు కూడేజి మహి బాడ్డి కడ్లితాద్. అయావలె దేవుణు ఆత్మ సత్తు వరి మున్సు వాతాద్. వారు దయ్ రమ్దాన్ దేవుణు మాటెజ్ వెహ్హార్.

నమ్మితికార్ వరి ఆస్తి అపొస్తురుబాన్ తతార్

32 నమ్మితికార్ విజేరె ఉండ్రె మన్ను ఆజి ఎయెన్బా సరినె వన్నిజ్ మన్నిదన్ని - బాణిజ్ ఇనికబా నాదినె ఇజి ఆవీద్ ఇజి వరిజ్ మన్నిక విజెరె వందిజ్ కర్పు కిత్తార్.

33 దేవుణు సత్తుదాన్ బమ్మాతి పణిజ్ కిజి అపొస్తురు ప్రబు ఆతి యేసు, సాతివరి - బాణిజ్ మర్జి బత్తితాన్ ఇజి సాసి వెహ్సి మహార్. దేవుణు దయాదర్తం వరి మున్ను నండో మహాద్.

34-35 బూమిజ్ ఇల్లు కల్లితి మహికార్ విజేరె అక్కెజ్ పొర్ని కల్లితి డబ్బు అపొస్తురు డగ్గు తతార్. విజేరిజ్ వరివరి అవ్సరం సుడోజి సిబాజి సితార్. అందెజె వరి లొఇ ఎయెన్బా సరి అవ్సరం వాతిజ తక్కు సిల్లెండ ఆతాద్.

36 కుప్త దేసమ్దు పుట్టి లేవి కుటుమ్దికాన్ ఆతి యోసేపు ఇని ఒరెన్ మహాన్. వన్నిజ్ అపొస్తురు బర్బబ ఇజి కూక్కి మహార్. (వన్ని పేరు అర్థం ఇనిక ఇహోజ సాయం కినికాన్ ఇజి)

37 వాండ్రు వన్నిజ్ మహి బూమి ఉండ్రె పొర్ని అయ డబ్బు అపొస్తురు డగ్గు తతాన్.

5

అననియ, సపీర

1 అయావలె అననియ ఇని ఒరెన్ మహాన్. వన్ని ఆల్ని పేరు సపీర. వారుబా ఉండ్రె బూమి పొర్తార్.

2 పొర్తారె మాసి సెగం ఇట్టాండ్రె మిగ్గితి డబ్బు అపొస్తురు డగ్గు ఒతాన్. యాక విజు ఆల్నిబా నెస్తాద్.

3 అయావలె పేతురు అననియెజ్, “నీ బూమి పొర్తి డబ్బుజాణి సెగం డాఃప్తి దేవుణు ఆత్మదిజ్ ఎందనిజ్ మొసెం కిత్తి? నన్ని మొసెం పణి కిదెజ్ నీను ఎందనిజ్ నీ మన్నుదిజ్ సర్తూనుజ్ ఒపజెప్తి?

4 బూమి నీ బాన్ మహివలె నీదినెగదె. అక్క పొర్తివలెబా ఆ డబ్బు నీ సొంతనె గదె. నిన్ని పణి కిదెజ్ ఎందనిజ్ నీ మన్నుదు ఒడిఃబిత్తి? నీను లోకు వెట ఆవీద్, దేవుణు వెటనె అబద్దం వర్గితి”, ఇజి వెహ్హాన్.

5 అననియ యా మాటెజ్ వెహివెటనె అర్తాండ్రె పాణం డిస్తాన్. యాక వెహికార్ విజేరె తియెల్ ఆతార్.

6 దక్షడాయెర్ వాతారె పీనుగుదిజ్ పాతెజ్ సుటిస్తారె, పిండిజి ఒతారె ముస్తార్.

7 రమరమి మూండ్రీ గంటెజ్ వెన్కా వన్ని ఆల్ని జర్గితిక నెన్వండ లొఇ వాతాద్.

8 పేతురు దన్ని వెట, “మీరు యా బూమి నిస్సా డబ్బుదిజె పొర్తిదెరా, వెహా”, ఇహాన్. వెన్బాతిజ్ అది, “నిస్సాదిజె పొర్తాప్”, ఇహాద్.

9 పేతురు దన్ని వెట, “మీరు రిఇదెర్ కూడేజి దేవుణు ఆత్మదిజ్ తప్పు వెహ్తిదెర్. దేవుణు ఆత్మదిజ్ తప్పు వెహ్సి మొసెం కిదెజ్ మీరు ఎండనిజ్ ఒడిబిత్తిదెర్? ఇదిలో నీ మాసిజ్ ముస్తికార్ ఇబ్బె మనార్. వారు నిజిబా పిండిజి ఒనార్”, ఇహాన్.

10 వెటనె అది పేతురు పాదం డగ్గు అర్తాదె పాణం డిస్తాద్. అయ దక్షడాయెర్ లొఇ వాతారె అది సాతాద్ ఇజి సుడేతారె దన్నిజ్ పిండిత ఒతార్. ఒతారె మాసి డగ్గు ముస్తార్.

11 దేవుణు సజమ్దు మహికార్ విజేరె, యా మాటెజ్ వెహికార్ విజేరె గొప్ప తియెల్ ఆతార్.

అపొస్తురు నండో లోకాజ్ నెగెండ కిత్తార్

12 అపొస్తురు లోకుర్ నడిమి నండో బమ్మాతి పణిజ్ బమ్మాతి గుర్తుజ్ కిత్తార్. నమ్మితికార్ విజేరె ఉండ్రె మన్ను ఆజి దేవుణు గుడిడు మన్ని సొలోమోను అరుజు ఇని బాడ్డిదు కూడేజి వాజి మహార్.

13 ‘యా నమ్మితికార్ ఎస్సానో నెగ్గికార్’ ఇజి లోకుర్ వెహ్తార్. అహిజ్బా మరి ఎయెర్బా నమ్మితికార్ వెట కూడేదెజ్ తియెల్ ఆతార్.

14 గాని నండో లోకుర్, మొగ్గకొడోర్, అయ్లికొడోక్ యేసుజ్ నమ్మిత్తారె నమ్మిత్తి వరివెట కూడితార్.

15 అందెజె అపొస్తురు కిత్తి గొప్ప పణిజ్ సుడేతారె కస్తం మన్ని వరిజ్ సాప మున్ను మన్నమ్ మున్ను పేతురు నడిజి వాని

సరిపడఁకాదు తతార్. ఎందనిజ్ ఇహిజు పేతురు అయ సరి వానివలె వన్ని నీడఁబా తాక్కిజ నెగెండ ఆనార్ ఇజి.

16 యెరూసలేమ్దు సురుల మన్ని నాహ్కణిజ్బా నండొ లోకుర్ బాన్ వాతార్. వరి లోఇ కస్టమ్కు ఆతివరిజ్, దెయమ్ కాణిజ్ మాలెజ్ ఆతివరిజ్ అబె తసి మహార్. విజేరె నెగెండ ఆతార్.

యూదురి అతికారిజు అపొస్తురిజ్ మాలెజ్ కిత్తార్

17 నస్తివలె విజేరె పుజేరిజు ముస్కు పెరి పుజేరి, వన్ని వెట కూడిఁతి మహికార్ విజేరె, ఇహిజు, సదుకెయరు ఇని పార్ది లోఇ నెగెండార్ అపొస్తురు వెట గొప్ప గోస ఆతార్.

18 వారు అపొస్తురుజ్ అస్తారె పట్నమ్దు మన్ని జెలిదు ఇట్టార్.

19 గాని దేవుణు దూత పొదొయ్ వాతండ్రె జెలిది సేప్లాజ్ రేతాండ్రె వరిజ్ వెల్లి తతాన్.

20 వెల్లి తతాండ్రె దూత, “మీరు దేవుణు గుడిఁ డేవాదు సొన్ని లోకాజ్ విజెరిజ్ యా కొత్త బత్తువందిజ్ పూర్తి వెప్తూ” ఇహాన్.

21 వారు జాయ్ ఆని డగ్గు దేవుణు గుడిఁ డేవాదు సొహారె దూత వెప్తూ వజ లోకాజ్ బోదిస్తాజ్ మొదొల్స్తార్. వెనుక, విజేరె పుజేరిజు ముస్కు పెరి పుజేరి, వన్నివెట మహికార్ వాతారె సన్హద్రి సజమ్దు మహి యూదపెద్దెలుజు విజేరిజ్ కూక్కి మీటిజ్ కిత్తార్. మీటిజ్దు కూడిఁతారె జెలిదు మన్ని అపొస్తురుజ్ వరిబాన్ తత్తెజ్ జమాన్జు పోక్తార్.

22-23 గాని వారు జెలిదు సొన్ని సుడఁతిజ్ పేతురుని యోహాను లోఇ సిల్లెర్. వారు మప్తూ వాతారె వెప్తార్, “మాపు సొన్ని సుడఁతిజ్ జెలిదు సేప్లాజ్ తాలం అర్పె మహా, కాప్ కినికార్ సేప్లాజు ముందాల్న నిహా మహార్. గాని మాప్ సొన్ని సేప్లాజ్ రేనివలె లోఇ వారు సిల్లెర్”.

24 వీరు వెప్తిక వెహారె పెరి పుజేరిజు, దేవుణు గుడిఁది జమాన్జు అతికారి గొప్ప బమ్మ ఆతారె, ‘ఇక ఇనిక ఆనాదెలెనొ’ ఇజి ఒడిఁబితార్.

25 అయావలె ఒరెన్ వాతండ్రె, “ఇదిలో మీరు జెలిదు ఇడ్డిమహి లోకుర్ ఏలు దేవుణు గుడిఁదు నిహారె లోకాజ్ బోదిసినార్”, ఇజి వెప్తాన్.

26 వెహ్లాజ్, అతికారి జమానుజ వెట సాహాండ్రె అపొస్తురుజ్ కూక్ తతార్. 'లోకు మజి పణుకుజాణిజ్ డెయ్నారలెను' ఇజి తియెల్ ఆతారె అపొస్తురుజ్ ఒపిసి కూక్ తతార్.

27 వరిజ్ కూక్ తతారె సన్హద్రిం సజం నడిఃమి నిల్వ్తారె. నిల్వ్తారె విజేరె పుజేరిజ ముస్కు పెరి పుజేరి వరివెట వెన్బాతాన్:

28 "యా యేసు పేరు అసి బోదిన్మాట్" ఇజి మాపు మిజి డటం బెద్రిసి వెహ్లాప్ గదె. గాని మీరు యెరూసలేమ్దు విజు మీ బోద సాట్టిదెర్. సాతి వన్ని వందిజ్ మాప్ వన్నిజ్ సప్తాప్ ఇజి మీరు మా ముస్కు తప్పు ఇడెదెజ్ సుడెఃజినిదెర్", ఇహాన్.

29 దన్నిజ్ పేతురు మరి అపొస్తురు, "లోకాజ్ ఆవిద్, దేవుణుదిజె మాపు లోజిదెజ్ గదె?

30 మీరు యేసుజ్ సిలువాదు డెయ్నెజి సప్తిదెర్. గాని మా అనిగొగొరి వలెహాన్ అసి మన్ని దేవుణు, వన్నిజ్ సాతి వరి బాణిజ్ నిక్తాన్.

31 యా యేసుజ్ రాజు మరిసి వజ, విజెరిజ్ రక్సిసిని వన్ని వజ దేవుణు గొప్పు మర్యాద సితండ్రె వన్ని ఉణెర్ పడెకాదు బన్పిస్తాన్. ఎండనిజ్ ఇహిజ ఇస్రాయేలు లోకుర్ వరి పాపమ్కు డిసి దేవుణుదిజ్ లోజిదెజ్. వరి పాపమ్కు నొరె ఆదెజ్ సరి సీదెజ్ ఇజి దేవుణు వన్ని ఉణెర్ పడెకాదు యేసుజ్ బన్పిస్తాన్.

32 యా సజతిజ వందిజ్ మాపు సాసిర్. దేవుణుదిజ్ లోజిని వరిజ్ దేవుణు సిని వన్ని ఆత్మబా యా సజతిజ వందిజ్ సాసి", ఇజి వెహ్లార్.

33 అపొస్తురు వెహ్లాక వెంజి విజేరె పుజేరిజ ముస్కు పెరి పుజేరి, వన్నివెట మహికార్ కోపం ఆతారె 'వరిజ్ సప్తాప్' ఇజి ఒడిఃబితార్.

34 అయావలె సజమ్దు మహి పరిసయ్దు లొఇ ఒరెన్ గమాలియేలు ఇనికాన్ సన్హద్రిం సజమ్దు నిహండ్రె వెహ్లాన్, "వీరు సణెం సజమ్దాన్ వెల్లినె మనీర్". గమాలియేలు ఎయెన్ ఇహిజ యూదురి రూలుజ్ నెస్పిసిని వరిలొఇ ఒరెన్. లోకుర్ విజేరె వన్నిజ్ మర్యాద సీజి మహార్.

35 అపొస్తురుజ్ వెల్లి షొక్తారె గమాలియేలు సజమ్ది లోకాజ్ ఈహు

వెహ్లాన్, “ఇస్రాయేలు లోకాండె, యా లోకాజ్ మీరు ఇనిక కిదెజ్ ఇజి ఒడెఃబిజినిదెరో జాగర్త మండ్రు.

36 సెగం పంటెజ్ ముందాల దూద ఇనికాన్ ఒరెన్ నిజితండ్రె నాను గొప్పవాండ్రు ఇజి వెహ్లాన్. రమరమి నాల్లి వందెజ్ లోకుర్ వన్నివెట కూడిఃతార్. ఎయెరో వన్నిజ్ సప్టార్. వన్నివెట కూడిఃతి మహికార్ విజేరె సెద్రితారె వరి పణి ఇని దన్నిజ్ రెవీండాతా సాహద్.

37 వెనుక, లోకుర్ లెక్క సుడెని జనాబా దినమ్కాజ్ గలీలయ వాండ్రు ఆతి యూద ఇనికాన్ ఒరెన్ నిజితాన్. మంద లోకుర్ వన్నివెట కూడిఃతారె వారు ఏలుబడిః కినివరి ముస్కు ఎద్రిస్తార్. వన్నిజ్బా ఎయెరో సప్టార్. వన్నివెట కూడిఃతి మహికార్ విజేరె సెద్రిత సాహద్.

38 అందెజె, నాను ఇనిక వెహ్లాన్ ఇహిజ, విరిజ్ ఇనికబా కిమాట్. విరిజ్ డిఃసిసిఅ. ఎందనిజ్ ఇహిజ విరి ఆలోసనమ్కు, విరి పణిజు లోకువలెహాన్ వాతిక ఇహిజ అది ఇనిదన్ని పణిదిజ్ రెవీండాన సానాద్.

39 గాని ఇక్క దేవుణు బాణిజ్ వాతిక ఇహిజ విరిజ్ అడ్డు కిదెజ్ మీరు అట్ఇదెర్. అక్కాదె ఆవండ మీరు దేవుణు వెట టంటెజ్ ఆతికార్ ఇజి మిజి తెలినాద్”.

40 సజమ్దికార్ గమాలియేలు వెహ్లా మాటదిజ్ ఒప్పకొటార్. వారు అపొస్తురుజ్ కూక్పిసి వరిజ్ కొరెడెదాన్ డెయ్బిసి యేసు పేరు అసి ఎసెజ్బా బోదిస్మాట్ ఇజి డటం వెహ్లా వరిజ్ డిఃస్తార్.

41 యేసు పేరు వందిజ్ మాలెజ్ ఓరిస్తెజ్ తగితికార్ ఆతి వందిజ్ అపొస్తురు డెయ్తి దెబ్బ తిహిజ్బా సర్ల ఆజి అబెణిజ్ సాహర్.

42 రోజు అపొస్తురు దేవుణు గుడిః డేవాదు, లోకురి ఇల్కాజ్ బోదిసి మహార్. యేసు దేవుణు పొక్తి క్రిస్తునె ఇజి నెగ్గిమాట వారు తవ్విండ బోదిసి మహార్.

6

అపొస్తురు ఏడుగురు మొగ వరిజ్ ఏర్పాటు కిత్తార్

1 యేసుప్రబుజ్ నమ్మితికార్ ఆ కాలమ్దు నండో లోకుర్ ఆజి వాతార్. అయావలె ముండ మణిసిరిజ్ బోజనం సీని దన్నిలోఇ, మా ముండ మణిసిరిజ్ బోజనం సివర్ ఇజి గ్రీకు బాస వర్గిని యూదురు ఏబ్రి బాస వర్గిని యూదురు ముస్కు మొరొ ఆతార్.

2 అయావలె పన్నెండు మణిసిరి అపొస్తురు నమ్మితి వరిజ్ విజెరిజ్ కూక్తర వెహ్టార్, “మాపు బోజనం సీబాజి సీని వందిజ్ దేవుణు మాట నెస్పిస్తైజ్ డిసి సీనిక తగివద్.

3 తంబెరిజాండె, అందెజె ఏడుగురు మొగ వరిజ్ ఏర్పాటు కిదు. మీ లోఇ దేవుణు ఆత్మ నిండ్రీతి మన్ని, గెణం నిండ్రీతి మన్ని విజేరె ఒప్పకొటి మని ఏడుగురు మొగ్గ వరిజ్ ఏర్పాటు కిదు, మాపు వరిజ్ యా పణి ఒపజెప్పాప్.

4 అహిజ మాపు పార్దనం కిదెజ్, దేవుణు - మాట నెస్పిస్తైజ్ కేట మంజినాప్”, ఇహార్.

5-6 అపొస్తురి మాటెజ్ అబ్బె కూడితి మహి లోకాజ్ విజెరిజ్ ఇష్టం ఆతాద్. అందెజె దేవుణు ముస్కు పూర్తి నమకం ఇడోజి దేవుణు ఆత్మ సత్తు పూర్తి నిండ్రీతి మహి సైపాను, పిలిపు, ప్రొకొరు, నికనొరు, తిమొను, పర్తనను, యూద మతమ్దు కూడితి అంతియొకియ దేసెమ్దికాన్ నికొలాసు ఇని ఏడుగురు మొగవరిజ్, నమ్మితికార్ అపొస్తురి ముందాల తతార్. అపొస్తురు పార్దనం కితారె వరి ముస్కు కిక్కు ఇడోజి వరిజ్ అయా పణి కిదెజ్ అతికారం సితార్.

7 అందెజె మరి నండో లోకుర్ దేవుణు మాటెజ్ నమ్మితార్. యెరూసలేమ్దు మన్ని నమ్మితి వరి లెక్క నండో ఆజి వాతాద్. నండొండార్ పుజేరిజు యేసుప్రబు ముస్కు నమకం ఇట్టార్.

లోకుర్ సైపానుజ్ అస్తార్

8 వరి లోఇ ఒరెన్, సైపాను ఇనికాన్, దేవుణు దయదర్మమ్దాన్ దేవుణు ఆత్మ సత్తుదాన్ నిండ్రీతాండ్రై లోకుర్ నడిమి గొప్ప బమ్మాని పణిజ్ బమ్మాని గుర్తుజ్ కిజి మహాన్.

9 గాని, కురెనియ పట్నమ్దికార్ యూదురు, అలెక్సాన్డ్రీయు పట్నమ్దికార్ యూదురు, (వీరు లిబెర్తి ఇని యూదురు మీటిజ్ ఇండ్రోణి గుంపుదికార్) మరి కిలికియ దేసమ్దాన్ వాతి యూదురు, ఆసియ దేసమ్దాన్ వాతి యూదురు వాతారె సైపాను వెట తర్కిస్తార్.

10 గాని వాండ్రు వెప్తా మాటెజ ఎద్రిస్తెజ్ వారు అట్ఎండ్రాతార్. ఎండనిజ్ ఇహిజ దేవుణు బాణిజ్ వాతి గెణమ్దాన్, దేవుణు ఆత్మ సత్తుదాన్ సైపాను వరివెట వర్గితాన్.

11 అయావలె వారు, 'వీండ్రు మోసె మున్కు, దేవుణు మున్కు దూసినిని మాటెజ్ వర్గినిక మాప్ వెహాప్' ఇజి వెప్తాజ్ సెగొండార్ లోకాజ్ ఎయెర్ నెన్వండ సుత్రిస్తారె కూడుఃప్తార్.

12 కూడుఃప్తారె, లోకాజ్, పెద్దెల్జ, యూదురి రూలు నెస్పిసినికార్ విజెరిజ్ రేప్తారె వన్ని మున్కు వాతార్. వాతారె సైపానుజ్ అస్తారె యూద పెద్దెల్జ సన్హద్రిం ఇని పెరి సజమ్దు తతార్. బానె అబద్దం సాసి వెహి వరిజ్ నిల్వార్.

13 వారు ఈహు వెహ్టార్, "వీండ్రు ఎస్తివలెబా దేవుణుదిజ్ కేట కిత్తి యా దేవుణు గుడిదిజ్, మోసె సిత్తి రూలుజ వెత్తేకం వర్గిజనాన్.

14 యా నజరేతు వాండ్రు ఆతి యేసు యా దేవుణు గుడిః పాడు కినాన్, మాటు ఎలాగ నడిఃదెజ్ ఇజి మోసె మా అనిగొరిజ్ సిత్తి మాటెజ్ మారిస్నాన్ ఇజి వీండ్రు వెప్తాక మాపు వెహాప్".

15 సన్హద్రిం సజమ్దికార్ సైపాను మొకొం డిటం సుడేఃజి మహిజ్ వన్ని మొకొం దేవుణు దూత మొకొం లెకెండ్ జాయ్ తోర్నిక వారు సుడేఃతార్.

7

సైపాను సన్హద్రిం సజమ్దు మన్ని వరివెట వర్గిజనాన్

1 అయావలె విజేరి పుజేరిజ మున్కు పెరి పుజేరి సైపానుజ్ వెన్బాతాన్, "యా మాటెజ్ నిజమా? వీరు వెప్తా లెకెండ్ నీను వెప్తాదా సిల్లెదా?".

2 దన్నిజ్ నైపాను వెహ్తాక ఇనిక ఇహిజ, “తంబెరిజాండె, బుబ్బరాండె, వెండ్రు, మా అనిగొగొ ఆతి అబ్రాహాం ఆరోను ఇని పట్టుమ్దు బత్తిఎండ ముందాల, మెసొపొతెమియ ఇని దేసమ్దు బత్తిజి మహాన్. అయావలె నండొ జాయ్ మన్ని దేవుణు వన్నిజ్ తోరె ఆతాన్.

3 దేవుణు అబ్రాహాం వెట ఈహు వెహ్తాన్, ‘నీను నీ దేసెం డిసి, నీ సొంత లోకాజ్ డిసి నాను నిజి తోరిసిని దేసెం సొన్అ’.

4 అయావలె వాండ్రు కల్లియుజ్ బత్తితి మహి మెసొపొతెమియ దేసెం డిసి ఆరోను పట్టుమ్దు సొన్ని బత్తితాన్. వన్ని బుబ్బ సాతి వెనుక అబెణిజ్ మీరు ఏలు బత్తిజిని యా దేసమ్దు బత్తిదెజ్ దేవుణు వన్నిజ్ కూక్త తతాన్.

5 అయావలె దేవుణు వన్నిజ్ ఉండ్రీ ముక బూమిబా అక్కు సివితాన్, యా దేసమ్దు. గాని అయావలె అబ్రాహాముజ్ కొడొఱ్ సిల్లితిజ్బా దేవుణు వన్ని వెట ఉండ్రీ మాట సిత్తాన్. అక్కు ఇనిక ఇహిజ, ‘నిజి, నీ పొటెజాణి వరిజ్ విజెరిజ్ యా బూమి ఆనాద్’.

6 దేవుణు వన్ని వెట, ‘నీ పొటెజాణికార్ ఆఇ దేసమ్దు సొనారె బానె ఆఇకార్ లెకెండె మనార్. అయ దేసెమ్దికార్ నీ లోకాజ్ నాల్లి వందెజ్ పంటెజ్ వెట్టిపణి కిజిని వరిలెకెండె పణి కిబిసి వరిజ్ లోజిజి మంజిని వజ ఇడెజి మాలెజ్ కినార్’.

7 గాని వారు ఎమెణి దేసమ్దు పణి కిజినారొ అయ దేసెమ్ది వరిజ్ నాను తీర్పు తీరిసి సిస సీనాలె. వెనుక వారు ఆ దేసెం డిసి వాజి యా బాడ్డిదు మంజి నజి పొగ్డిజి మాడిస్సార్లె ఇజి వెహ్తా మహాన్.

8 దేవుణు అబ్రాహాం వెట ‘విజెరి కుటుమ్కాజ్ పుట్టి మొగ్గ కొడొఱ్ సునతి కిదెజ్ వలె’, ఇజి వెహ్తాన్. అందెజె అబ్రాహాం, వన్ని మరిసి ఇస్సాకు పుట్టి ఏడు రోస్కు వెనుక మహ్నా నాండిజ్, ఇహిజ, ఎనిమిది రోస్కాజ్ సునతి కిత్తాన్. ఇస్సాకు, వన్ని మరిసి యాకోబుజ్ సునతి కిత్తాన్. యాకోబు వన్ని పన్నెండు మంది మరిసిరిజ్ సునతి కిత్తాన్. యా పన్నెండు మందినె ఇస్సాయేలుది పన్నెండు కుటుమ్ది అనిగొగొరె ఆతార్.

9-10 యా పన్నెండు మంది అనిగొగొరె వరి లొఇ తంబెరి ఆతి

యోసేపు ముస్కు గోస ఆతారె వన్నిజ్ గొత్తి పణి కిదెజ్ పొర్తార్. ఆహె యోసేపు అయ్గుప్పు దేసమ్దు గొత్తి పణి కిత్తాన్. గాని దేవుణు వన్ని వెట మహండ్రె వన్నిజ్ వాతి విజు మాలెజాణిజ్ తప్రిస్తాన్. దేవుణు వన్నిజ్ గెణం సిత్తిజ్ అయ్గుప్పు రాజు ఆతి పరో యోసేపు ముస్కు దయ తోరిస్తాన్. పరో రాజు యోసేపుజ్ అయ్గుప్పు దేసెమ్దిజ్ నడిఃపిసిని వన్నిలెకెండ్ నిల్ప్తాన్. పరో రాజుజ్ కల్గితి మహి విజు వనకాజ్ ముస్కు నడిఃపిసిని వన్నిలెకెండ్ కిత్తాన్.

11 అయావలె అయ్గుప్పు దేసమ్దు విజు, మా అనిగొగొర్ బత్తిజు మహి కనాను దేసమ్దు విజు పెరి కరు వాతాద్. కరు వాతిజ్ నండ్రో మాలెజ్ వాతె. మా అనిగొగొర్ ఆతి పరిజ్ తిండి దొహ్కావండ ఆతాద్.

12 అయావలె, అయ్గుప్పు దేసమ్దు తిండి మనాద్ ఇజి యాకోబు వెహాన్. వెహండ్రె వన్ని మరిసిరిజ్, ఇహాజ, మా అనిగొగొరిజ్ ముందాల్నె ఉండ్రె సుటు బాన్ పొక్తాన్.

13 వారు మరి ఉండ్రె సుటు సాహిజ్, యోసేపు, వన్ని దాదారిజ్ వాండ్రు ఎయెన్ ఇజి నెల్వకిబె ఆతాన్. అయావలె యోసేపు కుటుమ్ది పరి వందిజ్ పరో రాజు నెస్తాన్.

14 వెనుక యోసేపు వన్ని బుబ్బు ఆతి యాకోబుజ్ వన్ని సొంత లోకాజ్ విజేరిజ్ అయ్గుప్పు దేసమ్దు రదు ఇజి కబ్రు పొక్తాన్. వారు మొత్తం డబయ్ అయ్దుగురు మహార్.

15 అయావలె యాకోబు, వన్నివెట మహికార్ విజేరి అయ్గుప్పు దేసెం సాహార్. వారు అబ్బె బత్తిత్తార్. వెనుక యాకోబు, మహి అనిగొగొరు బానె సాతార్.

16 వెనుక పరి డుముక్ సెకెం ఇని పట్టుమ్దు మర్జి తత్తారె, ముందాల అబ్రాహాం హామోరు మరిసిర్ బాణిజ్ కొటి దూకి లొఇ ముస్తార్*.

17 దేవుణు అబ్రాహముజ్ ముందాల్నె సిత్తి మాట వజ జర్గిదెజ్ డగ్రు ఆజి వాతాద్. అయావలె మా లోకు అయ్గుప్పు దేసమ్దు నండ్రో లోకు

* **7:16 7:16** అయ కాలమ్దు అయ్గుప్పు దేసెమ్దికార్ పీనుగుదిజ్ నూనె రాసి పాత లొఇ ఇడ్నార్, సబ్విండ మండ్రెజ్

అజి వాతార్.

18 అయావలె, యోసేపు ఎయెన్ ఇజి నెన్ ఇ ఒరెన్ రాజు అయ్ గుప్పు దేసెమ్ దిజ్ ఏలుబడిః కిదెజ్ మొదొల్ స్తాన్.

19 యా రాజు మా లోకాజ్ మాయ మాటెజ్ వెహి మొసెం కిత్తాన్. గొప్పు మాలెజ్ కిత్తాన్. మొగ్గకొడొఱ్ పుట్టిజ వరిజ్ నపైజ్ వెటనె గడ్డదు విసీరెజ్ వలె ఇజి యా రాజు ఆడ్ర సిత్తాన్. ఎందనిజ్ ఇహిజ వారు సాజి సొండ్రెజ్.

20 ఆ కాలమ్ దు మోసె ఇనికాన్ ఒరెన్ పుట్టాన్. వాండ్రు సుడొదెజ్ గొప్పు నెగ్గికాన్. వాండ్రు మూండ్రె నెలెజ్ దాక వన్ని బుబ్బ ఇండ్రొ పిరితాన్.

21 మూండ్రె నెలెజ్ వెనుక వన్నిజ్ ఇండ్రొ వెల్లి సోప్పి గడ్డ ఒడ్డుదు ఇట్టార్. అయావలె పరో రాజు గాల్చి వాతాదె కొడొఱెదిజ్ లాగితాదె దన్ని మరిసి లెకెండ్ పొస కిటిస్తాద్.

22 మోసెజ్ అయ్ గుప్పు వరి విజు తెలివి నెన్ పిస్తాన్. వాండ్రు, వర్గిని మాటెజ్ లొఇ బాగ వర్గిదెజ్ అట్నాన్. కిని పణిజ్ లొఇ నెగ్గెండ కిదెజ్ అట్నాన్.

23 మోసెజ్ నలపయ్ పంటెజ్ ఆతివలె నా సొంత లోకుర్ ఆతి ఇస్రాయేలుర్ బానె సొన ఇజి బుద్ధి పుట్టాద్.

24 వాండ్రు సొహిజ్ అయ్ గుప్పు దికాన్ ఒరెన్, ఒరెన్ ఇస్రాయేలు వన్నిజ్ మాలెజ్ కిజి మహిజ్ సుడొతాన్. సుడొతండ్రె, ఇస్రాయేలు వన్నిజ్ గెల్చిస్తెజ్ ఇజి అయ్ గుప్పు వన్నిజ్ నప్తాన్. ఆహె నాయం తిరిస్తాన్.

25 ఇస్రాయేలు లోకాజ్ వరి బాదెజాణిజ్ డొబిస్తెజ్ దేవుణు నజీ పొక్తాన్ ఇజి మోసె ఒడిబితాన్. గాని వారు అర్థం కివితార్.

26 మహ్న నాండిజ్ మోసె ఇస్రాయేలు లోకాజ్ సుడొజి సొహాన్. రిఎర్ ఇస్రాయేలు లోకుర్ టంటెజ్ ఆజి మహిజ్ మోసె వరిజ్ సుడొతండ్రె, 'ఒరె ఒరె బాబు, మీరు తంబెరి రిఇదెర్ గదె? మీరు ఎందనిజ్ ఒరెన్ వన్ని ముస్సు ఒరెన్ టంటెజ్ ఆజినిదెర్' ఇజి వెప్తాండ్రె వారు రిఎరిజ్ కూడుఃపైజ్ ఇజి సుడొతాన్.

27-28 గాని ఆ ఇ వన్ని మున్ను అనయం కినికాన్ వెహ్తాన్, 'మా మున్ను అతికారి వజ మండ్రెజ్, తీర్పు తీర్స్ని వన్నివజ మండ్రెజ్ నిజి ఎయెన్ ఏర్పాటు కిత్తాన్? నీను ఇఎన్ అయా అయ్గుప్పు వన్నిజ్ సప్తిలెకెండ్ నజిబా సప్తెజ్ ఇజి సుడేజినిదా ఇజి వెహ్తాండ్రె మోసెజ్ నెక్తపొక్తాన్.

29 యాక వెహ్తాండ్రె మోసె తియెల్ ఆతాన్. వెటనె అయ్గుప్పు దేసెం డిసి సాహాన్. మిద్యాను ఇని దేసమ్దు సాహాండ్రె ఆఇకాన్ లెకెండ్ బత్తిత్తాన్. బానె పెండ్లి ఆతండ్రె రిఎర్ కొడొరిజ్ ఇట్తాన్.

30 నలపయ్ పంటజ్ వెనుక, సినాయి ఇని పెరి గొరొన్ డగ్రు మన్ని బిడిఃమ్ బూమిదు మహిజ్, ఒరెన్ దేవుణు దూత మోసెజ్ తోరె ఆతాన్. యా దూత వెయ్జి మహి తుప్పెజి నడిఃమి ఉండ్రి సిను కొణ లొఇ తోరె ఆతాన్.

31 మోసె అక్క సుడేతిజ్ బమ్మ ఆతాన్. బమ్మ ఆతండ్రె నెగ్రిండ సుడేదెజ్ తుప్ప డగ్రు సాహాన్. డగ్రు సాహిజ్ దేవుణు మాట ఈమా వెహాన్,

32 'నాను నీ అనిగొగొర్ ఆతి అబ్రాహాం, ఇస్సాకు, యాకోబు ఇని వరి దేవుణు'. యాక వెహ్తాండ్రె మోసె తియెల్ ఆజి వణక్తాన్. సుడేదెజ్బా అట్ఏతాన్.

33 దేవుణు మరి వెహ్తాన్, 'నీ జోడ్కు కుత్తి ఇడేఃఅ. నీను నిహిమన్ని బాడ్డి దేవుణుదిజ్ కేట ఆతి బాడ్డి!'

34 అయ్గుప్పు దేసమ్దు మన్ని నా లోకాజ్ మాలెజ్ నాను నెగ్రిండ సుడేఃత. వారు అడేబానిక వెహ. అందెజె నాను వరిజ్ డిఃబిస్తెజ్ డిఃగిత వాత. ఏలు రఅ నిజి నాను అయ్గుప్పు దేసెం పొక్కు ఇజి వన్నివెట వెహ్తాన్.

35 'మా మున్ను అతికారి వజ మండ్రెజ్ తగ్గు తెప్పికాన్ వజ మండ్రెజ్ నిజి ఎయెర్ ఏర్పాటు కిత్తాన్' ఇజి వెప్పి ఇస్రాయేలు లోకుర్, ముందాల నెక్కి పొక్తి యా మోసెజ్నె, దేవుణు అతికారి వజ, తప్పిసినికాన్ వజ వరిబాన్ పొక్తాన్. వెయ్జి మహి తుప్ప లొఇ తోరె ఆతి దేవుణు దూత సాయమ్దాన్ మోసెజ్ దేవుణునె పొక్తాన్.

36 అయ్యగుప్పు దేసమ్మదు బమ్మ పణిజ్ కిజి మోసె ఇస్రాయేలురిజ్ తప్పిస్త తతాన్. ఎర్రజ్ సమ్దరంబానె, మరి వారు నలపయ్ పంటెజ్ నడిజి సోహిమహి బిడిఃమ్ బూమిదుబా మోసె బమ్మాని పణిజ్ బమ్మాని గుర్తుజ్ కిత్తాన్.

37 యా మోసెనె ఇస్రాయేలురు వెట, 'దేవుణు నజి పోక్తి లెకెండ్ మీబాణిజె ఒరెన్ ప్రవక్తెజ్ మీబాన్ పోక్నాన్', ఇహాన్.

38 బిడిఃమ్ బూమిదు సజం కూడిఃతి మహి ఇస్రాయేలు లోకుర్ వెట మహికాన్ యా మోసెనె. మా అనిగొగొర్ వెట మహికాన్ వీండ్రి. సీనాయి గొరొతు దేవుణు దూత విన్నివెటనె వర్గితాన్. మజి సీదెజ్ దేవుణు బాణిజ్ ఎల్లకాలం బత్కిని మాటెజ్ తత్తికాన్ వీండ్రి.

39 గాని యా మోసెజ్ మా అనిగొగొర్ లోజిజి మన్ఏండ నెక్తపొక్తార్. మర్జి అయ్యగుప్పు దేసమ్మదు సోహిజ నెగ్గెద్ ఇజి వారు కోరితార్.

40 అయ్యగుప్పు దేసమ్దాన్ మజి కూక్తి తత్తి యా మోసె ఇనిక అతాండ్రో మజి తెలివద్. అందెజె మర్జి అయ్యగుప్పు దేసమ్మదు సాండ్రెజ్ మజి ముందాల నడిఃదెజ్ దెయమ్మకు తయార్ కిజి సిదా ఇజి మోసె అన్నసి ఆతి ఆరోను వెట వెహ్తార్.

41 అయావలె వారు ఉండ్రీ దూడః లెకెండ్ బొమ్మ తయార్ కిత్తరె పూజ కిత్తార్. వరి కిక్కాణిజ్ తయార్ కిత్తి దన్నిముస్కు వారు నండో సర్గ ఆతార్.

42 గాని దేవుణు కోపం ఆతండ్రె మొకొం వెనుక మహ్తాన్. ఆగాసమ్మదు మన్నికెజ్ సుడఃదెజ్, నెల పొద్దు సుక్కెజ్ విజు దన్నిజ్ పూజ కిదెజ్ వరిజ్ డిఃస్త సిత్తాన్. ప్రవక్తరు ముందాల్నె రాస్తిమహిక దిని వందిజె. అక్క ఇనిక ఇహిజ "ఇస్రాయేలు లోకాండె, మీరు బిడిఃమ్ బూమిదు నలపయ్ పంటెజ్ నడిఃసి సొన్ని మహివలె పూజ కిత్తిక నజినె ఆవద్.

43 మీరు పూజ కినాట్ ఇజి తయార్ కిత్తి మొలూకు రొంపయు ఇని సుక్కెజాణి దెయమ్కాజె గూడాఃరమ్మదు పిండిజి ఒసి మహిదెర్. వనకాజె పూజ కిత్తిదెర్. అందెజె బబులోను దేసెం అతాల్ మిజి తొప్పి ఒతెజ్ నాను సరి సీనాలె.

44 మా అనిగొగొర్ బిడిఃమ్ బూమిదు సొన్ని మహివలె సాసి గూడారం వరివెట మహాద్. దేవుణు మోసెజ్ తోరిన్తి లెకెండె మోసె యా సాసి గూడారం †తయార్ కిత్తాన్.

45 మరి లావు పంటెజ్ వెనుక యెహోసువ ఇనికాన్ అయ టయమ్దు యా సాసి గూడారం పిండిత ఒతండ్రె మా అనిగొగొరిజ్ నడిఃపిస్తాన్. అయావలె ఇస్తాయేలు లోకాజ్ సీనా ఇజి దేవుణు వెహ్తి దేసమ్దు వారు సొహార్. దేవుణు వరివెట మహిజ్ బానె మహి యూదురు ఆఇ లోకుర్ వెట ఉద్దం కితారె, గెల్స్తారె ఆ దేసెం సొంతం కిత్తార్. బానెబా మా అనిగొగొర్ యా సాసి గూడారం పిండిత ఒతార్. దావీదురాజు వరిజ్ ఏలుబడిః కిత్తి కాలమ్దాక యా సాసి గూడారం బానె మహాద్.

46 దావీదురాజు ఇహిజు దేవుణు వెహ్తి వజు నడిఃతికాన్. దేవుణు దయ వన్ని ముస్కు లావు మహాద్. అహిజ్బా మా అనిగొగొ ఆతి యాకోబు పార్దనం కిత్తి యా దేవుణుదిజ్ ఎలాకాలం మండ్రెజ్ ఉండ్రె గుడిః తొహ్తాజ్ దావీదు రాజు వెన్బాతిజ్బా దేవుణు సరి సివితాన్.

47 గాని దావీదురాజు మరిసి ఆతి సొలోమొనుజ్నె దేవుణు గుడిః తొహ్తాజ్ సరి సిత్తాన్.

48 అహిజ్బా విజెరిజ్ ఇంక గొప్ప పెరి దేవుణు, లోకు కిక్కాణిజ్ తయార్ కిత్తి బాడ్డిదు మన్వన్.

49 దేవుణు మాటెజ్ ప్రవక్త ఈహు వెహ్సినాన్: “పరలోకం నాను బసిని సిమననం‡. బూమి నా పాదమ్కు ఇడ్డి పీట. నాను మండ్రెజ్ ఉండ్రె గుడిః తొహ్తాజ్ మీరు అట్ఇదెర్.

50 ఎండనిజ్ ఇహిజు, పరలోకం, బూమి, దన్ని లోఇ మన్నికెజ్ విజు నానె పుటిస్త”.

51 మూర్కుం బుద్ది మన్నికిదెరా, దేవుణు మాటెజ్ ఒప్పుకోటావ్ ఇజి మీరు సునతి కిత్తిదెర్ గాని దేవుణు మాటెజ్ గిబ్బిజాణి వెంజిబా సరినె వెన్ఇ లెకెండె మంజినిదెర్. వెహిజ్బా సరినె మన్నుదు ఇడఃవిండ

† 7:44 7:44 సాసి గూడారం. దేవుణు ఇబ్బె మనాన్ ఇజి లోకాజ్ వెహ్సి మహి గూడారం

‡ 7:49 7:49 సిమననం. తీర్పు కిదెజ్ రాజుర్ బసిని కుర్చి

లోజీఇదెర్. మీ అనిగొగొర్ లెకెండ మీరుబా ఎసెజ్బా సరినె దేవుణు అత్మదిజ్ నెక్సిపొక్సినిదెర్.

52 మీ అనిగొగొర్ ప్రవక్తరిజ్ విజెరిజ్ గొప్ప మాలెజ్ కిత్తొర్. దేవుణు పొక్కు ఇజి వెహ్తొ ఆ నీతి వాండ్రు వందిజ్ ముందొల్నె వెహ్తొ ప్రవక్తరిజ్బా మీ అనిగొగొర్ సప్తొర్. ఏలు ఆ నీతి వన్నిజ్ మీరు ఒపజెప్తిదెర్. వన్నిజ్ సప్తిదెర్.

53 దేవుణు వన్ని దూతవెట మిజి సిత్తి రూలుజ్ మిజి దొహ్కె గాని మీరు దన్నిజ్ లోజీఇతిదెర్”.

స్తైపానుజ్ పణుకుజాణిజ్ డెయ్జినార్

54 యా మాటెజ్ వెహరె వారు గొప్ప కోపం ఆతారె స్తైపానుజ్ సుడెజి పల్కు కొహ్కొర్.

55 గాని స్తైపాను దేవుణు అత్మ సత్తు పూర్తి నిండ్రెజి ఆగాసం దరోట్ సుడెజి. సుడెతిజ్ దేవుణు గొప్ప జాయ్ సుడెజి. యేసుప్రబు దేవుణు ఉణెర్ పడెక నిహి మహిక సుడెజి.

56 “సుడెఅ, ఆగాసం రె అతి మహిక, లోకు మరిసి అతి యేసు దేవుణు ఉణెర్ పడెక నిహిమహిక నాను సుడెజిన”, ఇజి స్తైపాను వెహ్సన్.

57 గాని యా మాటెజ్ వెహరె వెటనె వారు గిబ్బిజ్ మూకె ఆతారె డటం గగోలాజి విజెరె ఉండ్రె ఆజి వన్ని ముస్కు వాతొర్.

58 పట్టుమ్దాన్ వెల్లి లాగిత ఒతారె వన్నిజ్ పణుకుజాణి డెయ్జి సప్తెజ్ మొదొల్స్తొర్. పణుకుజ్ విసిర్ని సాసి లోకుర్ వరి సొక్కెజ్ ముందొల సవులు ఇని ఒరెన్ దజడాయెన్ పాదమ్కొజ్ డగ్రు తత్తారె ఇట్టొర్.

59 వారు స్తైపానుజ్ పణుకుజాణిజ్ డెయ్జి మహిజ్ స్తైపాను, “యేసుప్రబువా నా పాణమ్దిజ్ ఏలు నీ డగ్రు కూడుంప్అ”, ఇజి పార్లనం కిత్తొన్.

60 వెనుక స్తైపాను ముణుకుజ్ ఉణెర్జి, “ప్రబువా, వీరు కిజిని యా పాపం విరి ముస్కు మోప్ప”, ఇజి డటం డెల్స్తొన్. యా మాట వెహ్తొండ్రె వాండ్రు పాణం డిస్తొన్. స్తైపానుజ్ సప్తిక సవులు ఒప్పుకొటొన్.

8

దేవుణుడిజ్ నమ్మితి వరిజ్ సవులు పాడు: కిజినాన్

1 ఆ దినమ్కాజ్ యెరూసలేమ్దు మహి దేవుణు సజమ్దిజ్ గొప్ప మాలెజ్ ఆజి మహాద్. అపొస్తురు ఆవిండ మహి నమ్మితికార్ విజేరె యూదయ సమరియ దేసమ్కాజ్ సెద్రిత సొహార్.

2 బక్తి కల్గితి నమ్మిత్తి లోకుర్ సైపానుజ్ నమాది కితారె వన్ని వందిజ్ గొప్ప దుకం ఆజి అడఃబాతార్.

3 నస్తవలె సవులు ఇనికాన్ యేసుప్రబు ముస్కు నమకం ఇడ్డిమహి వరి నమకం పాడు: కిదెజ్ సుడఃతాన్. ఇల్కాజ్ ఇల్కాజ్ డుఃగ్జి మొగ్గకొడొరిజ్ అయ్లికొడొకాజ్ ఈడిసి ఒసి జెలిదు ఇడఃజి, వాండ్రు సజమ్దిజ్ పాడు: కిదెజ్ మొదొల్స్తాన్.

సమరియ దేసమ్దు సువార్త సాటిస్తార్

4 అయావలె సెద్రితి సొహి సజమ్దికార్ సువార్త సాటిసి విజు బాడ్డిజ విజెరిజ్ వెన్పిసి బూలాతార్.

5 అయావలె అపొస్తురు ఏర్పాటు కిత్తివరి లొఇ ఒరెన్ పిలిపు ఇనికాన్ సమరియ పట్టుమ్దు సొహాన్. అబ్బె యేసు, క్రిస్తు* ఇజి బోదిస్తాన్.

6 పిలిపు వెహ్ని మాటెజ్ లోకుర్ విజేరె నెగ్రెండ వెహారె వాండ్రు కిత్తి బమ్మాని గుర్తుజ్ సుడఃతార్.

7 కిక్కు కాల్కు సాతికార్, సొటవారు నండొండార్ అబ్బె వాతారె నెగ్రెండ ఆతార్. నండొండార్ లోకుర్ దెయం అస్తి మహికార్ అబ్బె మహార్. దెయమ్కు నండొ గగోలాజి వరిజ్ డిఃస్తె సొహె.

8 అందెజె సమరియ పట్టుమ్దు నండొ సర్ద కల్గితాద్.

గార్ది పణి కిని సిమోను

* 8:5 8:5 క్రిస్తు (మెసయ) ఇహిజ దేవుణు ఏర్పాటు కిత్తి పొక్తాన్ ఇజి అర్థం

9 సమరియ పట్నమ్దు సిమోను ఇని ఒరెన్ మహాన్. సిమోను ఆ పట్నమ్దు సెగం వంటిజ్ గార్డి విదె కిజి నాను ఒరెన్ గొప్ప వాండ్రు ఇజి వెప్పి మహాన్. అబ్బె మహి లోకాజ్ సిమోను బమ్మ కిబిసి మహాన్.

10 అయ పట్నమ్దు మహికార్ ఇజిరికార్ పెరికార్ విజేరె వీండ్రు 'దేవుణు గొప్ప సత్తు ఇనికాన్' ఇజి వెప్పి వన్ని మున్కు నమకం ఇడెతార్.

11 నండొ కాలం సిమోను గార్డి పణి కిజి లోకాజ్ బమ్మ కిబిసి మహాన్. అందెజె వారు సిమోనుజ్ నమ్మితార్.

12 గాని దేవుణు ఏలుబడి: వందిజ్, యేసుక్రీస్తు వందిజ్ పిలిపు పట్నమ్ది లోకాజ్ సాటిస్టిజ్ యా సువార్త వెహికార్. నమ్మితారె మొగ్గకొడె:ర్, అయ్లికొడె:క్ బాప్తినం లాగె ఆతార్.

13 అయావలె సిమోనుబా నమ్మిజి బాప్తినం పొందితాండ్రె పిలిపుజ్ డిన్విండ వన్నివెటనె మహాన్. పిలిపు కిని బమ్మాని గుర్తుజ్, బమ్మాని పణిజ్ సుడె:జి సిమోను గొప్ప బమ్మ ఆతాన్.

14 యేసు ప్రబు వందిజ్ వెప్తి సువార్త సమరియ దేసెమ్దికార్ ఒప్పకొటార్ ఇజి యెరూసలేమ్దు మన్ని అపొస్తరు వెహార్. వెహారె పేతురుజ్ యోహానుజ్ వరి డగ్గు పొక్తార్

15 వీరు వాతారె సమరియ పట్నమ్దు నమ్మితి వరి మున్కు. దేవుణు ఆత్మ సత్తు వాదెజ్ ఇజి పార్దనం కిత్రార్.

16 ఎండనిజ్ ఇహిజ అబ్బెణి దాక దేవుణు ఆత్మ సత్తు వరి ఎయేరి మున్కుబా రెవిండ మహాద్. వారు ప్రబువాతి యేసు పేరుదాన్ బాప్తినం ఉండ్రెనె లాగె ఆజి మహార్.

17 అయావలె పేతురు, యోహాను వరి మున్కు కిక్కు ఇడ్డిజ్ దేవుణు ఆత్మ సత్తు వరి మున్కు వాతాద్.

18-19 అపొస్తరు లోకుర్ మున్కు కిక్కు ఇట్టి వలె వారు దేవుణు ఆత్మదాన్ నిండ్రెజినార్ ఇజి సిమోను సుడె:తాన్. సుడె:తండ్రె, "నాను ఎయెన్ మున్కు కిక్కు ఇడ్డానొ, వాండ్రు దేవుణు ఆత్మ సత్తుదాన్ నిండ్రెని వజ యా అతికారం నజీబా సిదా", ఇజి వెప్పి వరి ముందాల

డబ్బు ఇట్టాన్.

20 అయావలె పేతురు, “నీను డబ్బు సీజి దేవుణు వరం సంపాదనం కిన ఇజి ఒడిఃబిత్తిదా? నీ డబ్బు నీ వెట నాసనం ఆపిద్.

21 నీ ఆలోసనం దేవుణు సుడఃతిజ్ సరి ఆతిక ఆవిద్. అందెజె మాపు కిని పణిదు నిజి ఇని వంతు సిల్లెద్.

22 అందెజె యా సెఇ ఆలోసనమ్కు డిఃసిసీజి దేవుణు డగ్రు వాజి పార్లనం కిదు. నీను ఒడిఃబిత్తి ఆలోసనమ్ వందిజ్ దేవుణు నిజి సెమిస్సాన్సు.

23 నీ మన్సుదు నండొ గోస నిండ్రిత మనాద్ ఇజి నాను నెస్సా. అక్కాదె ఆవిండ నీ పాపమ్కు నిజి తొవ్తా మన్నె ఇజి నాను నెస్సా”, ఇజి పేతురు వెప్తాన్.

24 దన్నిజ్ సిమోను, “నీను వెప్తాకెజ్ ఇనికబా నా ముస్కు రెవిండ మీరు నావందిజ్ యేసుప్రబుజ్ పార్లనం కిదు”, ఇజి పేతురుజ్ యోహానుజ్ వెప్తాన్.

25 వెనుక పేతురు, యోహాను సాసి వెప్సి, యేసుప్రబు సువార్త సాటిసి, యెరూసలేమ్దు మప్తా వాతార్. వాని సరి సమరియదు మహి నండొ నాహాకాజ్ సువార్త సాటిసి వాతార్.

పిలిపు అయ్యుయెపియది వన్నిజ్ బాప్తినం సిత్తాన్

26 అయావలె, ఒరెన్ దేవుణు దూత పిలిపుజ్ వెప్తాన్, “నీను దసిణం దరోట్ సొన్ని యెరూసలేమ్దాన్ గాజ ఇని పట్నం సొని బిడిఃమ్ బూమిదు సొన్అ”, ఇజి వెప్తాన్.

27-28 అందెజె పిలిపు సోతాండ్రె సోహాన్. సొన్ని మహిజ్ ఒరెన్ అయ్యుయెపియదికాన్ రదం† ముస్కు సొన్నినాన్. వాండ్రు అయ్యుయెపియ దేసెమ్ది రాణి కందెకెబాన్ ముకెలమతి పణి కినికాన్ ఒరెన్. ఇని పణి ఇహిజ దేసెమ్ది డబ్బు నడిఃపిసిని దన్ని ముస్కు వీండ్రు మంత్రి. వీండ్రు యెరూసలేమ్దు పార్లనం కిదెజ్ సోహాండ్రె

† 8:27-28 8:27-28 రదం ఇహిజ గుర్రమ్కాజ్ ఉండ్రె బంటి పూట్సార్

మరీజి సొన్నినాన్. సొన్ని మహిజ్ వీండ్రు రదమ్దు బసి యెసయ ప్రవక్త రాస్తి పుస్తకం సద్విజినాన్.

29 అయావలె దేవుణు అత్తు పిలిపుజ్, “నీను రదం డగ్రు సొన్ని దన్ని వెట నడిఃజి సొన్అ”, ఇజి వెహ్లాన్.

30 పిలిపు రదం డగ్రు ఉహ్కొక్కి సొహిజ్ అయా అయ్లియెపియదికాన్ యెసయ ప్రవక్త రాస్తి పుస్తకం సద్విజినాన్. పిలిపు అక్క వెహ్లాన్. వెహ్లాండ్, “నీను సద్విజినిక అర్దం కిజినిదా?”, ఇజి వెన్బాతాన్.

31 వెన్బాతిజ్, “ఎలాగ అర్దం కిన? ఎయెన్బా నజి అర్దం వెహ్లాండ్ మహిజ ఎలాగ అర్దం కినా? రదమ్ ముస్కు ఎక్కి నా వెట బస్అ. దిన్ని అర్దం వెహ్లా సిదా” ఇహ్లాన్, అయ అయ్లియెపియదికాన్. అందెజె పిలిపు రదం ఎక్కి వన్ని డగ్రు బస్తాన్.

32 అయ అయ్లియెపియదికాన్ సద్విజి మహి మాటెజ్ ఇనికెజ్ ఇహిజ “సప్తెజ్ ఒని గొరె వజ వన్నిజ్ ఒతార్. బుడుఃస్కుజ్ కత్రిసినివలె అలెజి మంజిని మెండగొరెపిల్ల వజ అలేత మహ్లాన్. వాండ్రు ఇనికబా ఇన్ఎతాన్.

33 వారు వన్నిజ్ సిగు కిత్తార్. వన్నిజ్ నాయం దొహ్లాండ్లాత సొహాద్. వన్ని పొటెజాణి వరి వందిజ్ ఎయెర్బా వెహ్లాండ్ ఆనార్. ఎందనిజ్ ఇహిజ, వన్ని పాణమ్దిజ్ బూమి ముస్కుహ్లాన్ లాగితార్”.

34 అయ అయ్లియెపియదికాన్ ఈహు వెన్బాతాన్, “ప్రవక్త ఎయె వందిజ్ ఈహు వెహ్లానాన్? వన్ని వందిజెనా, మరి ఒరెన్ వందిజా? దయ కిజి వెహ్లా”.

35 అందెజె పిలిపు అయ అయ్లియెపియదికాన్ సద్విజి మహి యెసయ ప్రవక్త రాస్తి పుస్తకమ్దు మహి మాటదాన్ మొదొల్లి యేసుప్రబు వందిజ్ సువార్త వెహ్లాన్.

36 ఆహె వారు సొన్ని మహిజ్ ఏరు మహి ఉండ్రి బాడ్డిదు వాతార్. అయ అయ్లియెపియదికాన్ వెహ్లాన్, “ఇబ్బె ఏరు మన్నె. నాను బాప్తీసం లాగె ఆదెజ్ ఇనికబా అడ్డు మనాదా?”.

37 దన్నిజ్ పిలిపు, “నీను మన్ను పూర్తి యేసుప్రబుజ్ నమ్మిత్తిజ బాప్తీసం లాగె ఆదెజ్ ఇని అడ్డుబా సిల్లెద్”, ఇహ్లాన్. అందెజె వాండ్రు,

“ఒబ, యేసుక్రీస్తు దేవుణు మరిసి ఇజి నాను నమ్మిజిన”, ఇహోన్.

38 అయావలె, “రదం నిల్వ్అ”, ఇజి అయ్యుయొపియదికాన్ ఆడ్ర సిత్తాన్. రదం నిల్వ్వాండ్రె వాండ్రు, పిలిపు, రిఎర్ డిఃగ్జి ఏరుదు డిఃగితార్. పిలిపు అయ్యుయొపియది వన్నిజ్ బాప్తిసం సిత్తాన్.

39 వారు ఏరు లోఇహోన్ వెల్లి వాతిజ్ వెటనె దేవుణు ఆత్మ పిలిపుజ్ కూక్ట ఒత్తాన్. అయ్యుయొపియదికాన్ పిలిపుజ్ మరి సుడఃవితాన్. గాని వాండ్రు సర్ద ఆజి వన్ని సరినె సోహాన్.

40 పిలిపు సుడఃతిజ్ అజొతు పట్నమ్దు మన్న ఇజి నెస్తాన్. అబ్బెణిజ్ సోసి వాండ్రు సోహి సరిదు మహి విజు పట్నమ్కాజ్ యేసు ప్రబు వందిజ్ సువార్త వెప్పి కయ్సరియ ఇని పట్నమ్దాక వాతాన్.

9

సవులు యేసుప్రబుజ్ నమ్మిత్తాన్

1-2 అయావలె సవులు ఇనికాన్ యేసుప్రబు ముస్కు నమ్మితి వరిజ్ బెద్రిసి మహాన్. వరిజ్ మాలెజ్ కిజి మహాన్. వాండ్రు విజేరె పుజేరిజు ముస్కు పెరి పుజేరిబాన్ సోహాండ్రె దమస్కు పట్నమ్దు మన్ని యూదురి మీటిజ్ ఇల్కాణి పెద్దెల్జి సిదెజ్ ఉత్తమ్కు లొస్తాన్. ఇని ఉత్తమ్కు ఇహిజు, దమస్కు పట్నమ్దు యేసుప్రబు ముస్కు నమకం ఇడ్డికార్ ఎయెర్బా మహిజు, మొగ్గకొణొర్ గాని అయ్లికొణొక్ గాని వరిజ్ తొప్పి ఒసి యెరూసలేం పట్నమ్దు తతెజ్ సవులుజ్ అతికారం మనాద్ ఇజి వెప్పిని ఉత్తమ్కు.

3 విజేరె పుజేరిజు ముస్కు పెరి పుజేరి సిత్తి ఉత్తమ్కు అస్తాండ్రె సవులు దమస్కు పట్నమ్దు సాండ్రెజ్ సోత్తాన్. దమస్కు పట్నం డగ్రు వాజి మహిజ్ గదెం ఆగసమ్దాన్ ఉండ్రె గొప్ప జాయ్ వన్ని సురులం డెయ్తాద్.

4 అయావలె సవులు బూమిదు అర్థాన్. అర్తిజ్, “సవులు, సవులు, నీను ఎందనిజ్ నజి మాలెజ్ కిజిని”, ఇజి వన్ని వెట వెప్పి ఉండ్రె మాట వెహాన్.

5 “ప్రబు, నీను ఎయి”, ఇజి సవులు వెన్బాతాన్. “నీను మాలెజ్ కిజిని యేసునె నాను.

6 ఏలు నిజ్జి పట్టుమ్దు సొన్అ. నీను ఇనిక కిదెజ్ ఇజి ఒరెన్ నిజ్జి వెప్పానాన్లె”, ఇజి మాట వెప్తాన్.

7 సవులు వెట సొన్సి మహికార్ జాటు వెహార్ గాని ఎయెరిజ్బా తోర్ఏతార్. వారు అల్లెత నిహ మహార్.

8 సవులు బూమిదాన్ నిజ్జితాండ్రె బేస్తాన్ గాని కణుకు తోర్ఏండ్రె ఆతె. అందెజె వారు వన్నిజ్ కికాజ్ అస్తారె దమస్కు పట్టుమ్దు నడిఃపిసి ఒతార్.

9 వాండ్రు మూండ్రీ రోస్కు కణుకు తోర్ఏండ్రె మహాన్. ఇనికబా తిన్ఏండ్రె ఉణెఎండ్రె మహాన్.

10 దమస్కు పట్టుమ్దు యేసుప్రబు సిసూడుః ఒరెన్ అననియ ఇనికాన్ మహాన్. యేసుప్రబు వన్నిజ్ దర్సనమ్దు తోరె ఆతండ్రె, “అననియ”, ఇజి కూక్తాన్. కూక్తిజ్ అననియ, “ప్రబువా నాను ఇబ్బె మన్న”, ఇహాన్.

11 యేసుప్రబు వన్నివెట, “నీను తినాజ్ ఇజి కూక్తి సరిదు సొన్అ. బానె యూద ఇని వన్ని ఇండ్రొ సొన్సి తార్స పట్టుమ్దికాన్ సవులు ఇని వన్ని వందిజ్ వెన్బాఅ. సవులు పార్దనం కిజి మంజినాన్. ఉండ్రె దర్సనమ్దు సవులు ఇనిక సుడఃతాన్ ఇహిజ,

12 అననియ ఇనికాన్ ఒరెన్ వాతండ్రె వన్ని కణెకెజ్ నెగెండ్రె కిజి మరి సూణి లెకెండ్రె ఆదెజ్ వన్ని బురాదు కిక్కు ఇడ్పివజ సుడఃతాన్”, ఇజి వెప్తాన్.

13 దన్నిజ్ అననియ వెప్తాన్, “ప్రబు వీండ్రు యెరూసలేమ్దు నిజ్జి కేట ఆతి వరిజ్ ఎస్సానొ మాలెజ్ కిత్తాన్ ఇజి వన్ని వందిజ్ నాను నండ్రె వెహ మహా.

14 ఇబ్బె యా పట్టుమ్దు నీ ముస్కు నమకం ఇడ్పి వరిజ్ తొప్పి ఒసి యెరూసలేమ్దు ఒతెజ్ వన్నిజ్ అతికారం సీని ఉత్తమ్కు పెరి పుజేరిజ బాణిజ్ అస్తాండ్రె వాత మహాన్”.

15 యేసుప్రబు అననియ వెట, “నీను సొన్అ. యూదురు ఆఇ లోకుర్ నడిఃమి, రాజురిజ నడిఃమి, ఇస్తాయేలు లోకాజ్ నడిఃమి నా

వందిజ్ వెహైజ్ నాను వన్నిజ్ ఏర్పాటు కిత మన్న.

16 నా వందిజ్ వాండ్రు ఎసానో మాలెజ్ ఆనాన్ ఇజి నాను వన్నిజ్ తోరిన్న”, ఇహాన్.

17 అందెజె అననియ అయ ఇండ్రో సోహండ్రె సవులు ముస్కు కిక్కు ఇట్టాన్. “సవులునా, నీను వాతి సరిదు నిజి తోరె ఆతి ప్రబు ఆతి యేసు నజి పొక్త మనాన్. నీను మరి సూణి వందిజ్ దేవుణు ఆత్తు సత్తు నీ ముస్కు వాని వందిజ్ నజి పొక్త మనాన్”, ఇజి సవులు వెట వెహైజ్.

18 అయావలె వన్ని కణకాణిజ్ పొరోజ్ నన్నికెజ్ రాల్తిజ్ సుడెఃదెజ్ అట్టాన్. సవులు నిజితండ్రె బాప్తినం లాగె ఆతాన్.

19 వెనుక బోజనం కితాండ్రె సత్తు ఆతాన్.

సవులు దమస్కు పట్టుమ్దు, యెరూసలేం పట్టుమ్దు యేసుప్రబు వందిజ్ వెహైజ్.

సవులు దమస్కు పట్టుమ్దు మహి యేసుప్రబు సిసూర్ వెట సెగం దినమ్కు మహాన్.

20 యూదురి మీటిజ్ ఇల్కాజ్ తిన్నాజ్ సోహండ్రె యేసునె దేవుణు మరిసి ఇజి యేసుప్రబు వందిజ్ బోదిస్తెజ్ మొదోల్స్తాన్.

21 అక్క వెహికార్ విజేరె నండో బమ్మ ఆతార్. యెరూసలేమ్దు యేసుప్రబుజ్ నమ్మితి వరిజ్ పాడుః కిజి మహికాన్ వీండ్రెగదె. యేసుప్రబుజ్ నమ్మితి వరిజ్ తొప్పి పెరి పుజేరిర్ డగ్రు కూక్సి ఒతెజ్ ఇబ్బెబా వీండ్రు వాత మనాన్ ఇజి వెహైజ్.

22 అహిజ్బా పవులు మరి నండో సత్తుదాన్ బోదిసి మహాన్. యేసునె దేవుణు పొక్తి క్రిస్తు ఇజి రుజుప్ కితాండ్రె దమస్కు పట్టుమ్దు మహి యూదురుజ్ గాబ్ర కితాన్.

23 నండో రోస్కు సోహి వెనుక సవులుజ్ సహైజ్ ఇజి యూదురు ఆలోసనం కితార్.

24 గాని వరి ఆలోసనం సవులుజ్ తెలితాద్. వన్నిజ్ సప్తజ్ వారు రెయువేల పూర్తి పట్టుం వెల్లి సొని సేప్లా* బాన్ సుడఃజి కాత మహార్.

25 గాని వన్ని సిసూర్ రర్తుం వన్నిజ్ ఒతారె ఉండ్రి గంపదు బసె కితారె పట్టుం సురుల మన్ని గోడఃదు మన్ని ఉండ్రి కిటికి బొరొదాన్ వన్నిజ్ అడిఃగి డిఃప్తార్.

26 సవులు యెరూసలేమ్దు సొహిజ్ సిసూర్ వెట కూడఃదెజ్ సుడఃతాన్. గాని వాండ్రు సిసూర్ లొఱ ఒరెన్ ఆవన్ ఇజి వారు ఒడిఃబితారె వన్నిజ్ వరివెట కూడుఃప్తజ్ తియెల్ ఆతార్.

27 గాని బరబ్బ ఇనికాన్ వన్నిజ్ అపొస్తురుబాన్ కూక్కి ఒతాన్. సవులు దమస్కు పట్టుమ్దు సొహి సరిదు ఎలాగ యేసుప్రబు వన్నిజ్ తోరె ఆతాన్ ఇజి, ఎలాగ యేసుప్రబు వన్నివెట వర్గితాన్ ఇజి, వెనుక సవులు ఎలాగ దమస్కు పట్టుమ్దు తియెల్ సిల్లెండ యేసుప్రబు వందిజ్ బోదిస్తాన్ ఇజి బరబ్బ అపొస్తురు వెట వెప్తాన్.

28 అయావలె అపొస్తురు సవులుజ్ కూడుఃప్తిజ్ వాండ్రు వరివెట కూడిఃత మహాన్. వరివెట కూడిఃతాండ్రె యెరూసలేమ్దు విజు బాడ్డిదు సొన్ని తియెల్ సిల్లెండ యేసుప్రబు వందిజ్ బోదిస్తెజ్ మొదొల్స్తాన్.

29 గ్రికు బాస వర్గిని యూదురు వెట వర్గితాండ్రె తర్కిస్తాన్. అందెజె వారు సవులుజ్ సప్తజ్ సుడఃతార్.

30 యాక తెలితారె సిసూర్ వన్నిజ్ డిగు మన్ని కయ్సరియాదు ఒతారె తార్పు పట్టుం పొక్తార్.

31 అయ కాలమ్దు యూదయ, గలిలయ, సమరియ దేసమ్కాజ్ మహి దేవుణు సజం తియెల్ సిల్లెండ సమదానమ్దాన్ మహార్. సజం దేవుణుదిజ్ లొజిజి దేవుణు ఆత్మ సాయమ్దాన్ సత్తు ఆజి వాతె. నమ్మితికార్ నండొండార్ ఆజి వాతార్.

పేతురు లుదదు యోపాదు బమ్మాతి పణిజ్ కిత్తాన్

* **9:24 9:24** సేప్లా. దమస్కు పట్టుం సురుల వెరి గోడ్జ తొప్తా మహాద్. గోడాదు పట్టుం వెల్లి సొని సేప్లాజ్ మహె. బానె పట్టుం కాప్ కినికార్ కాప్ కిజి మహార్

32 అయావలె పేతురు నాహ్కునాహ్కు, పట్టుమ్కుపట్టుమ్కు సొన్ని లుద ఇని నాటో దేవుణుదిజ్ కేట ఆతి వరిజ్ సుడిః సొహాన్.

33 బ్రానె ఒరెన్ అయ్నెయ ఇనికాన్ ఎనిమిది పంటజాణ్ అసి నిజ్దెజ్ అట్త వన్నిజ్ సుడఃతాన్. వాండ్రు కిక్కు కాల్కు అర్దికాన్.

34 పేతురు వన్నిజ్ సుడఃజి, “అయ్నెయ, యేసుక్రీస్తు నిజి నెగెండ కిజినాన్. నిజ్జి, నీ మంసం నీనె పెర్రి ఉండ్రీ వడఃకాద్ ఇడఃఅ” ఇహాన్.

35 వెటనె అయ్నెయ నిజిత్తాన్. లుదా నాటోదు, సారోసు దేసమ్దు మహికార్ విజేరె, వన్నిజ్ జర్గితక సుడఃతారె యేసుప్రబుజ్ నమ్మితార్.

36 అయావలె యోప ఇని పట్టుమ్దు తబిత ఇని ఉండ్రీ అయ్లీ కొణ్ః మహాద్. అదిబా యేసుప్రబు సిసూ. గ్రీకు బాసాదు దన్ని పేరు దొర్కు. దొర్కు ఇహిజ డుపి ఇజి అర్దం. అది ఎసెజ్బా నెగ్గి వణి కిజి మహాద్. సిల్లి వరిజ్ సాయం కిజి మహాద్.

37 గాని అది అయావలె ఉండ్రీ కస్టం అస్తాదె సాతాద్. వారు పీనుగుదిజ్ ఏరు వడిఃస్తారె మేడః ముస్కు మన్ని గదిదు తెర్స్తార్.

38 లుద పట్టుం యోప పట్టుం డగ్రు మహాద్. పేతురు అబ్బె మనాన్ ఇజి యోపాదు మన్ని సిసూర్ వెహారె రిఎర్ మణిసిరిజ్ పొక్కి, “దయ కిజి వెటనె రఅ”, ఇజి కబ్బు పొక్కార్.

39 పేతురు నిజితండ్రె వరివెట యోపాదు సొహాన్. వారు వన్నిజ్ మేడఃగది లొఇ ఒతార్. అబ్బె ముండ మణిసిక్ అడఃబాజి, దొర్కు వరివెట మహివలె గుతిన్తి సొక్కజ్ పాతెజ్ తోరిసి వన్ని సురుల నిహె.

40 పేతురు విజేరిజ్ వెల్లి పొక్కాండ్రె ముణుకుజ్ ఊర్జి పార్దనం కిత్తాన్. పీనుగుదిజ్ సుడఃజి, “తబిత, నిజ్అ” ఇహాన్. అయావలె అది బేస్తాదె పేతురుజ్ సుడఃజి నిజిత బస్తాద్.

41 పేతురు దన్నిజ్ కిక్కాజ్ అస్తాండ్రె నిక్కాన్. నమ్మితి వరిజ్, ముండ మణిసికాజ్ కూక్కి అది బత్తిత్తాద్ ఇజి వరిజ్ ఒపజెప్తాన్.

42 యాక యోపాదు మనికార్ విజేరె నెస్తారె నండొండార్ యేసుప్రబు ముస్కు నమకం ఇట్టార్.

43 పేతురు యోపాదు సిమోను ఇని ఒరెన్ తోల్కు పొర్ని వన్నిబాన్ యోప పట్టుమ్దు నండొ దినమ్కు బత్తిత్తాన్.

10

పేతురు కొర్నేలియోజ్ సువార్త వెహ్సినాన్

1 అయావలె కయ్సరియ ఇని పట్టుమ్దు, ఉద్దం కినివరి లోఇ కొర్నేలి ఇని ఒరెన్ సదాతివతి* మహాన్. వాండ్లు, వన్ని అడ్లి మహి ఉద్దం కినికార్ ఇటలి దేసెమ్దాన్ వాతి మహి గుంపుదికార్ ఇజి కూకె ఆతమహార్.

2 కొర్నేలి, వన్ని ఇండ్రోణికార్, బక్తి మనికార్. వారు దేవుణుదిజ్ తియెల్ ఆతికార్. వాండ్లు సిల్లి వరిజ్ వన్నిజ్ మనిక సెడ్డినె సీజి మహాన్. దేవుణుదిజ్ ఎస్తివలెబా పార్దనం కినికాన్.

3 ఒర్నెండు మదెనం రమరమి మూండ్రీ గంటెజ, దేవుణు బాణిజ్ వాతి ఒరెన్ దూత వన్నిబాన్ నిహండ్రె, “కొర్నేలి”, ఇజి కూక్తాన్. కూక్తిజ్ యా దూతెజ్ టెటాజ్ సుడేతాన్.

4 కొర్నేలి గొప్ప తియెల్ ఆతండ్రె, “ప్రబు, ఇనిక?””, ఇహాన్. దూత వెహ్సాన్, “నీను దేవుణుదిజ్ కిత్తి పార్దనమ్కు, సిల్లి వరిజ్ సీని దానం విజు దేవుణు సుడేతండ్రె నీ వందిజ్ ఒడిబిజినాన్.

5 ఏలు యోప ఇని పట్టుమ్దు లోకాజ్ పొక్సి పేతురు ఇజి కూకె ఆని సీమోను ఇని వన్నిజ్ కూక్సిన్అ.

6 వాండ్లు సమ్దరం డగ్రు మన్ని సీమోను ఇని తోల్కు తయార్ కినికాన్ ఒరెన్ వన్ని ఇండ్రో బత్తిజినాన్”.

7 యాక వెహ్సా దూత సొహిజ్, కొర్నేలి వన్ని పణి మణిసిర్ రిఎరిజ్ కూక్పిస్తాన్. ఎస్తివలెబా వన్నివెట కూడేజి మంజిని బక్తి మన్ని ఒరెన్ ఉద్దం కిని వన్నిజ్బా కూక్పిస్తాన్.

8 జర్గితిక విజు వరివెట వెహ్తండ్రె వరిజ్ యోప పట్టుమ్దు పొక్తాన్.

పేతురు సుడేతి దర్దనం

9 మర్సనాండేజి వారు సొన్ని యోప పట్టుం డగ్రు ఆతార్. అయావలె మదెనం ఆతాద్. పేతురు పార్దనం కిదెజ్ మేడః† ముస్కు ఎక్తాన్.

* 10:1 10:1 వంద మంది విదెం కినివరిజ్ నడిప్పి రోమ అతికారి. † 10:9 10:9 మేడ ముస్కు బాన్ మహి ఇల్కాజ్ ముస్కు మేడెజ్ మన్నె. ఎక్సి సొన్ని బస్తెజ్ ఆనాద్

10 పేతురు గొప్ప బజ కట్టిజ్ ఇనికబా ఉండెజ్ కోరిత్తాన్. బోజనం తయారాజి మహిజ్ వాండ్రు ఉండ్రీ దర్సనం సుడేతాన్.

11 అక్క ఇనిక ఇహిజ ఆగానం రే ఆజి నాల్లి సెంగుజ అసిమహి పెరి దుపాటి ననిక ఉండ్రీ బూమిదు డిపె ఆతిలెకెండ్ సుడేతాన్.

12 దన్ని లొఇ బూమి ముస్సు మన్ని నాల్లి కాల్కు మన్ని విజు రకం జంతుజ్, బూమి ముస్సు ఊజి బూలానికెజ్, ఆగసమ్ ముస్సు ఎగ్రిని పొటిజ్ మహె.

13 అయావలె, “పేతురు, నిజ్అ, సప్పి తిన్అ”, ఇజి, ఉండ్రీ మాట పేతురు వెహాన్.

14 దన్నిజ్ పేతురు, “సిల్లె ప్రబువా, తిండ్రెజ్ ఆఇకెజ్ ఎసెజ్బా నాను తిన్ఎ”, ఇజి వెహ్లాన్‡.

15 వెహ్లాజ్, మాట మరి వాతాద్, “దేవుణు నెగ్గిక ఇజి ఇడ్డికెజ్ నీను సెవద్ ఇజి ఎర్లిస్సు”.

16 ఈహు మూండ్రీ సుట్టు జర్రితాద్. వెటనె ఆ దుపాటినన్నిక ఆగాసమ్దు మర్జి పెరె ఆతాద్.

17 దర్సనమ్దు సుడేతి దన్ని అర్థం ఇనికాదొ ఇజి పేతురు గొప్పజ బడిబిజి మహాన్. అయావలె కొర్నేలి పొక్తి లోకుర్ సీమోను ఇల్లు ఎమేణిక ఇజి వెన్బాజి నెస్తారె వన్ని ఇల్లు ముందాల వాతార్.

18 “పేతురు ఇజి కూకె ఆని సీమోను ఇబ్బె మనాండ్రా, సిల్లెండ్రా”, ఇజి పేరు అస్తారె డేడిస్తార్.

19 పేతురు దర్సనమ్దు సుడేతి దన్ని వందిజ్ బడిబిజి మహివలెనె దేవుణు ఆత్మ వన్నివెట వెహ్లాన్, “సీమోను, ముఎర్ లోకుర్ నిజి రెబాజినార్.

20 నీను నిజ్జి అడ్డి డిగ్జి సొన్అ. అనుమానం ఆవండ వరివెట సొన్అ. ఎందనిజ్ ఇహిజ నానె వరిజ్ పొక్త”.

21 పేతురు డిగ్జి సొహండ్రె, “మీరు నజినె రెబాజినిదెర్. ఎందనిజ్ వాతిదెర్?”, ఇహాన్.

‡ 10:14 10:14 యూదురుజ్ తిండ్రెజ్ ఆఇకెజ్ నెగం మన్నె అక్కెజ్ తిన్ఎర్

22 దన్నిజ్ వారు, “సదాతిపతి ఆతి కొర్నేలి మజి పోక్తాన్. వాండ్రు నీతి నిజాయితి మన్నికాన్. దేవుణుదిజ్ తియెలాజి మన్నికాన్. వాండ్రు గొప్ప నెగ్గికాన్ ఇజి యూదురు విజేరె వెప్పినార్. ఒరెన్ దేవుణు దూత వన్నిజ్ తోరె ఆతండ్రె, ‘పేతురుజ్ నీ ఇండ్రొ కూక్సి తసి వన్ని మాటెజ్ వెన్అ’ ఇహాన్”, ఇజి వెప్టార్.

23 అయావలె పేతురు వరిజ్ ఇండ్రొ తతాండ్రె, “నేండ్రు మా బాన్ మండ్రు”, ఇహాన్.

పేతురు కొర్నేలి ఇండ్రొ సొన్నినాన్.

మహ్సా నాండిజ్ పేతురు నిజితండ్రె వరివెట పయనం ఆతాన్. యోపాదికార్ నెగొండార్ యేసుప్రబుజ్ నమ్మితికార్ వరివెట సొహార్.

24 ఉండ్రె రోజు పయనం ఆతారె మహ్సా నాండిజ్ వారు కయసరియాదు అందితార్. కొర్నేలి వన్ని కుటుమ్ది వరిజ్ వన్ని డగ్రుహి కూడెజి ఇండ్రొ కూడుఃప్తాండ్రె పేతురు వందిజ్ కాప్ కిజి మహాన్.

25 పేతురు ఇండ్రొ వాతిజ్ కొర్నేలి సొహండ్రె వన్ని పాదమ్కాజ్ ఆర్తాండ్రె వన్నిజ్ మాడిస్తాన్.

26 గాని పేతురు వన్నిజ్ నిక్తాండ్రె, “నిజ్అ, నానుబా నీ నన్ని లోకునె” ఇహాన్.

27 కొర్నేలి వెట వరిజి పేతురు లొఇ సొహిజ్ మంద లోకుర్ బాన్ కూడెజిమహిక నుండెతాన్.

28 పేతురు వరి వెట వెప్టాన్. “మా యూదురి రూలు వజి ఇహిజి యూదురు ఆఇ లోకుర్ వెట కూడెనిక ఆవద్. వరివెట మంజినిక ఆవద్. ఇక్క మీరు నెసినిదెర్గదె. గాని లోకాజ్ ఎయెరిజ్బా తక్కుదికార్ ఇజి ఇండ్రెజ్ ఆవద్ ఇజి దేవుణు నజి తోరిస్త మనాన్.

29 అందెజె నజి కూక్సిజ్ నాను అడ్డు వెహ్ఎండ వాత. నజి ఎందనిజ్ కూక్సిదెర్. ఏలు వెహ్అ”, ఇహాన్.

30 అయావలె కొర్నేలి వెప్టాన్, “నాల్లి దినమ్కు ముందాల యా గడియారునె నాను మదెనం మూండ్రె గంటెజి ఇండ్రొ పార్దనం కిజి

మహా. వెటనె మెర్సిని నన్ని పాతెజ్ పొర్పాతి మన్ని ఒరెన్ నా ఎద్రు నిహాన్.

31 “కొర్నెలి, దేవుణు నీ పార్దనమ్కు వెహాన్. సిల్లి వరిజ్ సెడ్డినె సిత్తికెజ్ దేవుణు సుడఃతాన్.

32 యోపాదు కబ్బు పోక్కి పేతురు ఇజి కూకె ఆని సీమోనుజ్ కూక్కిన్అ. వాండ్రు సమ్దరం డగ్రు తోల్కు తయార్ కినికాన్ ఒరెన్ సీమోను ఇని వన్ని ఇండ్రొ బత్తిజినాన్.

33 అందెజె వెటనె నిజీ కబ్బు పోక్త. నీను వాతికాదె నెగెద్. ఏలు మాపు విజెపె దేవుణు డగ్రు వాతాప్. మా వెట వెహ్తాజ్ దేవుణు నిజీ ఆడ్ర సిత్తి విజు మాటెజ్ వెండ్రెజ్ మాపు వాతాప్.

34 దన్నిజ్ పేతురు వెహ్తాన్, “దేవుణు విజెరిజ్ ఉండ్రె లెకెండ్ సుడఃజినాన్, ఇజి ఏలు నాను నిజమ్నె నెస్సా.

35 ఎమేణి జాతి ఇహిజ్బా దేవుణుదిజ్ తియెలాజి, నీతి నిజాతిదాన్ నడిఃతిజ దేవుణు వన్నిజ్ ఒప్పుకొణాన్.

36 యేసు క్రీస్తు విజెరిజ్ ప్రబు. దేవుణు వెట లోకాజ్ కుల తొప్పిస్తెజ్ వాండ్రు యేసుజ్ పోక్తాన్. యేసువలెహాన్ ఇస్రాయేలు లోకాజ్ సమదనం వాతాద్ ఇజి దేవుణు సువార్త పోక్తాన్.

37 యోహాను దేవుణు మాటెజ్ బోదిసి బాప్తీసం సిత్తి వెనుక గలీలయాదాన్ మొదొల్ని యూదయ దేసమ్దు విజు ఇనిక జర్రితాద్ ఇజి మీరు నెసినిదెర్.

38 యాక ఇనిక ఇహిజ, దేవుణు, నజరేతు వాండ్రు ఆతి యేసుజ్ దేవుణు ఆత్మ సత్తు సీజి ఏర్పాటు కిత్తాన్. వాండ్రు సొన్ని నెగ్గి పణిజ్ కితాండ్రె సయ్యాన్ లోకురిజ్ కిజిని బాదెజాణిజ్ డిబిస్సాన్. దేవుణు వన్నివెట మహిజానె వాండ్రు అక్కెజ్ విజు కిడిజ్ అట్టాన్.

39 వాండ్రు యూదురి దేసమ్దుని, యెరూసలేమ్దుని, కిత్తి విజు వనకాజ్ మాపు సాసిర్. యూదురు వన్నిజ్ సిలువాదు డెయ్యారె సప్టార్.

40 గాని మూండ్రె రోస్కాజ్ దేవుణు వన్నిజ్ సాతి వరిబాణిజ్ నిక్తాండ్రె మజి తోరిస్సాన్.

41 విజేరె లోకాజ్ వాండ్రు తోరె ఆవితాన్. దేవుణు ముజాలె ఏర్పాటు కిత్తి సాసిర్, ఇహిజ, మజినె వాండ్రు తోరె ఆతాన్. సాతి వరిబాణిజ్ నిజీతి వెన్కా మాపె వన్నివెట తింజి ఉణిజి మహాప్.

42 సాతి వరిజ్, బత్తిజిని వరిజ్ తీర్పు సిదెజ్ దేవుణు యేసుజె ఏర్పాటు కిత్తాన్ ఇజి సాసి వెప్పి సువార్త సాటిస్తెజ్ యేసుప్రబు మజి ఆడ్ర సిత్తాన్.

43 ప్రవక్తరు విజేరె వన్ని వందిజ్ ఇని సాసి వెహ్టార్ ఇహిజ, వన్ని ముస్సు నమకం ఇడ్డి విజెరి పాపం దేవుణు వన్ని వందిజ్ సెమిస్సాల్లె ఇజి.

యూదురు ఆఇ వరిజ్ దేవుణు ఆత్మ సత్తు, దొహ్కసినాద్.

44 పేతురు యా మాటెజ్ వెప్పి మహిజ్నె, వన్ని మాటెజ్ వెంజి మహివరి ముస్సు దేవుణు ఆత్మ వాతాద్.

45 పేతురు వెట వాతి మహి నమ్మితికార్ యూదురు, యాక సుడెతారె బమ్మ ఆతార్. “యూదురు ఆఇ వరిజ్బా దేవుణు ఆత్మ సత్తు ఇని ఇనాయం దేవుణు సీజినాన్”, ఇజి బమ్మ ఆతార్.

46 ఎందనిజ్ ఇహిజ దేవుణు ఆత్మ సత్తు వరి ముస్సు వాతిజ్ వారు ఆఇ బాసెజ్ వర్రిజి దేవుణు ఎసానొ పెరికాన్ ఇజి స్తుతి కినిక వీరు వెహ్.

అయావలె పేతురు వెహ్టాన్,

47 “మజి దేవుణు ఆత్మ దొహ్కా కి లెకెండ్ విరిజ్బా దొహ్కాద్. ఏలు వీరు ఏరుదు బాప్తినం లాగె ఆదెజ్ ఇహిజ ఎయెర్బా అడ్డు కిదెజ్ అట్నూరా?”.

48 అందెజె యేసుక్రీస్తు పేరు అసి ఏరుదు బాప్తినం లాగె ఆదెజ్ పేతురు వరిజ్ ఆడ్ర సిత్తాన్. వెనుక, నెగం రొస్కు మా వెట మన్అ ఇజి వారు పేతురుజ్ వెహ్టార్.

11

పేతురు జర్గితికెజ్ వెప్పినాన్.

1 యూదురు ఆఇ లోకుర్బా దేవుణు - మాటెజ్ నమ్మితార్ ఇజి యూదయ దేసమ్దు మన్ని నమ్మిత్తికార్ని, అపొస్తురు వెహార్.

2-3 అందెజె పేతురు ఎక్కు యెరూసలేమ్దు సొహివలె బానె మహి సునతి కిబె ఆతి యూదురు, వన్నివెట తర్కిస్తార్. “నీను సునతి కిఇ లోకుర్ వెట కూడిఃతి మహి, వరివెట ఉణిజి మహి”, ఇజి వన్ని ముస్సు తర్కిస్తార్.

4 అయావలె పేతురు, జర్గితికెజ్ విజు మొదొహన్ అసి వరివెట వెహ్హన్.

5 “నాను యోప పట్టుమ్దు మహివలె ఒన్ నెండ పార్దనం కిజి మహిజ్ ఉండ్రీ దర్సనం సుడఃత. ఇనిక సుడఃత ఇహిజ, ఆగాసం రే ఆజి నాల్లి సెంగుజ అసిమహి పెరి దుపాటి ననిక ఉండ్రీ బూమిదు డిఃపె ఆతిలెకెండ నా డగ్గు డిఃగ్జి వాతాద్.

6 అక్క నెగ్రెండ సుడఃతిజ్ దన్ని లొఇ నాల్లి కాల్కు మన్ని జంతుజ్, అడిఃవి జంతుజ్, బూమి ముస్సు ఉజి బూలానికెజ్, ఆగాసం ముస్సు ఎగ్రిని పొటిజ్ నజి తోరితె.

7 అయావలె, ‘పేతురు నిజ్అ. సప్పి తిన్అ’, ఇజి ఉండ్రీ మాట వెహ.

8 దన్నిజ్ నాను, ‘సిల్లె ప్రబు, సెవద్ ఇజి ఇడ్డికెజ్ ఇనికెజ్బా నాను ఎసెజ్బా తిన్ఎ’ ఇహ.

9 ఆగాసమ్దాన్ మాట మరి వాతాద్, ‘దేవుణు నెగ్గిక ఇజి వెహ్హికెజ్ నీను ఏరిన్సు’.

10 ఈహు మూండ్రీ సుట్కు వాతాద్. ఆక్కర్దిజ్ అక్కెజ్ విజు ఆగసమ్దు మర్జి పెరి ఆతె.

11 యాక జర్గితి వెటనె కయ్యురియదాన్ కొర్నేలి పొక్తి ముఎర్ లోకుర్ నజి రెబాజి నాను మహి ఇల్లు డగ్గు వాతాద్.

12 అయావలె దేవుణు ఆత్మ, ‘నీను ఇని అనుమానం సిల్లెండ వరివెట సొన్అ’ ఇహన్. వీరు ఆరుగురు నమ్మిత్తికార్బా నావెట వాతాద్. వాతారె మాపు కొర్నేలి ఇండ్రొ సొహప్.

13-14 కొర్నేలి ఇంఠ్రో సొహిజ్, దేవుణు దూత వన్నివెట వెప్తికెజ్ విజు వెప్తాన్. ‘నీను యోపాదు లోకాజ్ పోక్కి పేతురు ఇజి కూకె ఆని సీమోనుజ్ కూక్కిన్ అ. వాండ్రు వానాండ్రె నీను, నీ కుటుమ్దికార్ విజేరె పాపం కిత్తి దన్ని సిక్సదాన్ ఎలాగ గెలిస్తాజ్ ఆనాద్ ఇజి వెహ్నాన్లె’ ఇజి వెప్తికెజ్ విజు కొర్నేలి మజి వెప్తాన్.

15 నాను వరివెట వర్గిదెజ్ మొదొల్స్తాజ్, మా ముస్కు దేవుణు ఆత్మ తొలిత ఎలాగ వాతాదొ అయావజనె వరి ముస్కుబా వాతాద్.

16 అయావలె నజి ప్రబు మాటెజ్ గుర్తు వాతాద్. ఇనిక ఇహిజ, ‘యోహాను ఏరుదాన్ బాప్తినం సిత్తాన్. గాని మీరు దేవుణు ఆత్మదాన్ బాప్తినం లాగె ఆనిదెరెలె’ ఇజి.

17 అహిజ మాపు ప్రబు ఆతి యేసుక్రీస్తు ముస్కు నమకం ఇట్టి వలె దేవుణు మజి సిత్తి ఇనాయమ్నె వరిజ్ బా సిత్తాన్. దేవుణుదిజ్ అడ్డు కిదెజ్ నాను ఎవటిదికానా?”.

18 యాక వెహారె వారు మరి ఇని అడ్డుబా వెహ్ ఎత్తార. “నిజమ్నె, యూదురు ఆఇ వరిజ్ బా వరి పాపమ్ కు డిసిసీజి దేవుణుదిజ్ లోజిజి ఎలాకాలం బత్తిదెజ్ దేవుణు సరి సీజినాన్”, ఇజి వెహ్ని వారు దేవుణుదిజ్ స్తుతి కిత్తార.

అంతియొకయాదు నమ్మితి వరిజ్ క్రీస్తు లోకు ఇజి పేరు వాతాద్.

19 సైపానుజ్ సప్తివెనుక యేసుప్రబు ముస్కు నమ్మితి వరిజ్ లావు మాలెజ్ వాతిజ్ వారు సెద్రిత సొహార్. సెద్రితికార్ సెగొండార్ పెనికె, కుప్ర, అంతియొకియ ఇని దేసమ్ దాక సొహారె యూదురిజ్ ఉండ్రెనె దేవుణు మాటెజ్ వెప్తార.

20 గాని వరి లొఇ సెగొండార్ కుప్రదికార్, కురేనియదికార్ మహార్. వారు సొన్ని అంతియొకయాదు మన్ని గ్రీకు బాస వర్గిని వరిజ్ బా యేసు ప్రబు వందిజ్ సువార్త వెప్తార.

21 ప్రబు సత్తు వరివెట మహాద్. అందెజె మంద లోకు దేవుణు మాట నమ్మిత్తారె ప్రబు ముస్కు నమకం ఇట్టార.

22 యెరూసలేమ్దు మన్ని సజమ్దికార్ యాక వెహారె బర్నబెజ్ అంతియోకయాదు పోక్టార్.

23 బర్నబ వాతండ్రె దేవుణు దయ వరి ముస్కు వాతాద్ ఇజి సుడేతాండ్రె సర్గ ఆతాన్. దేవుణు ముస్కు ఉండ్రె మన్నుదాన్ నమ్మిదు ఇజి వాండ్రు వరిజ్ దయరం వెహోన్.

24 బర్నబ దేవుణు ఆత్మ సత్తుదాన్, నమకమ్దాన్ నిండ్రితికాన్, నెగ్గికాన్. వాండ్రు దేవుణు మాటెజ్ బోదిస్తిజ్ మంద లోకుర యేసుప్రబు ముస్కు నమకం ఇట్టార్.

25 వెనుక బర్నబ సవులుజ్ రెబాజి తార్పు పట్నం సోహాన్.

26 సవులుజ్ రెబాజి దోహక్తిజ్ వన్నిజ్ అంతియోకయాదు తతాన్. వారు రివర్ ఉండ్రి ఏండు బానె మహి సజమ్దికార్ వెట కూడితారె మంద లోకాజ్ దేవుణు మాటెజ్ బోదిస్తార్. అంతియోకయాదునె, నమ్మితి వరిజ్ క్రిస్తు లోకు ఇజి పేరు తొలిత ఇడె: ఆత మహాద్.

27 యా కాలమ్దు ప్రవక్తరు సెగొండార్ యెరూసలేమ్దాన్ అంతియోకయదు వాతార్.

28 వరి లోఇ అగబ ఇనికాన్ ఒరెన్ దేవుణు ఆత్మదాన్ నిండ్రితాండ్రె రోమరాజు ఏలుబడి: కిని దేసమ్కాజ్ విజు ఉండ్రి పెరి కరు వానాద్లె ఇజి వెహోన్. (క్లవుదియ ఇని రాజు ఏలుబడి: కిత్తి కాలమ్దు యా కరు వాతాద్)

29 అయావలె నమ్మితికార్ విజేరె యూదయదు బత్కిని నమ్మిని వరిజ్ సాయం పోక్తెజ్ ఒడి:బితార్. మాపు ఎసా సీనాపొ నసా సీనావ్ ఇజి వారు ఒడి:బితార్.

30 వరి సాయమ్కు వారు బర్నబని, సవులు వెట పెద్దెలుజబాన్ పోక్టార్.

12

పేతురు జెలిదాన్ గెలిస్తాన్.

1 అయ కాలమ్దు హేరోదు రాజు సజమ్ది వరిజ్ సెగొండారిజ్ మాలెజ్ కిదెజ్ మొదొల్స్తాన్.

2 యోహానుజ్ దాద ఆతి యాకోబుజ్ కుర్దదాన్ సపిస్తాన్.

3 యా సజతి యూదురిజ్ ఇస్టం ఆతాద్ ఇజి నెస్తాండ్రె హేరోదు రాజు పేతురుజ్ బా తొప్పి ఇడేదెజ్ ఆడ్ర సిత్తాన్. యూదురి పులాజ్ ఆఇ రొటెజ్ తిని పండోయ్ దినమ్ కాజ్ యాక జర్రితాద్.

4 పేతురుజ్ అరెస్టు కితారె వన్నిజ్ జేలిదు ఇట్టార్. జెలిదు ఇట్టారె వన్నిజ్ కాప్ కిజి మండ్రెజ్ వదహారు మణిసిర్ జమానుజు ఒపజెష్టాన్. ఉండ్రె సుటు నాల్ఎర్ మణిసిర్ కాపు మంజినార్. పస్కు పండోయ్ వెన్కా లోకాజ్ నడిమి తసి పేతురుజ్ తీర్పు తీరిస్తెజ్ హేరోదు రాజు ఒడితాన్.

5 ఆహె పేతురు జెలిదు మహాన్. గాని సజమ్ దికార్ వన్ని వందిజ్ గటిజు దేవుణుదిజ్ పార్దనం కిజి మహార్.

6 మరసనాండిజ్ పేతురుజ్ తీర్పు తీరిస్తెజ్ వెల్లి తన ఇజి హేరోదు రాజు ఒడిబిత మహాన్. అయ పొదోయ్ పేతురు రిఎర్ జమానుజు నడిమి రుండి గొల్స్కాణిజ్ తొహె ఆజి నిద్ర కిజి మహాన్. రిఎర్ జమానుజ్ వెల్లి కాపు మహార్.

7 అయావలె వెటనె ఒరెన్ దేవుణు దూత తోరె ఆతాన్. ఆ గది లొఇ జాయ్ నన్ని వెల్టర్ వాతాద్. దూత పేతురుజ్ వడకాదు డెయ్ జి బేగి నిజ్ అ ఇజి వెప్పి నిక్తాన్. వన్ని కిక్కాణిజ్ గొల్స్కు ఉండేజి అర్తె.

8 దూత వన్నివెట, “నీను నడుముదు తొహె ఆజి జోడ్కు తొడేగిఅ”, ఇహాన్. పేతురు అక్కెజ్ తొప్తాజ్ దూత, “నీ పాత పిడిగ్గి నా వెనుక రఅ”, ఇహాన్.

9 పేతురు దూత వెనుక సొహండ్రె జెలిదాన్ వెల్లి వాతాన్. గాని జర్రినిక నిజమె ఆవదొ ఇజి పేతురు నెన్వీతాన్. యాక విజు దర్సనమ్ దు సుడేజిన ఇజి ఒడిబితాన్.

10 వారు ముందాల కాప్ కిని వరిజ్ డాట్టి వెనుకాది వరిజ్ బా డాట్టి పట్టు సొని ఇనుము గవుని డగ్గు వాతార్. వాతిజ్ అదిని రే ఆతాద్. వారు సొసి వాజి ఉండ్రె వీది డాట్టిసాహె వెటనె దూత వన్నిజ్ డిస్తె సొహాన్.

11 అయావలె, జర్రితికెజ్ విజు నిజమె ఇజి పేతురు తెలి ఆతాన్. దేవుణు వన్ని దూతెజ్ పోక్తాండ్రె నజి హేరోదురాజు బాణిజ్ డిఃబిస్తాన్. యూదురు నజి ఇనిక కిదెజ్ ఒడిఃబిత్తారొ దన్ని లొఇహాన్ బా డిఃబిస్తాన్ ఇజి ఏలు నాను నిజం నెస్సా ఇజి ఒడిఃబిత్తాన్.

12 యాక నెస్తాండ్రె పేతురు, మార్కు ఇజి కూకె ఆని యోహానుజ్ అయ్సి ఆతి మరియు ఇండ్రొ సొహాన్. బాన్ మంద లోకుర్ కూడిఃత మహారె పార్దనం కిజి మహార్.

13 పేతురు వెల్లి మహి సేప్లాదు కొత్తాన్. ఎయెన్ ఇజి వెండ్రెజ్ రోద ఇని పణి మణిసిబాన్ సొహాద్.

14 అది పేతురు కంటం గుర్తు అస్తాదె గొప్ప సర్ద ఆతాద్. సేప్లా రేవిండ ఉహాక్కి సొహాదె, “పేతురు సేప్లా డగ్రు నిహ మనాన్”, ఇజి మహి వరిజ్ వెప్తాద్.

15 వారు, “నిజి వెరి మనాద్” ఇహార్. గాని అది మరి మరి వెప్తాజ్ వారు, “అహిజ వన్ని దూత వాతాద్” ఇహార్.

16 గాని పేతురు సేప్లాదిజ్ కొత్తి మహాన్. వారు సొన్ని సేప్లా రేతిజ్ పేతురుజ్ సుడఃతారె గొప్ప బమ్మ ఆతార్.

17 మీరు జమ్సన మండ్రు ఇజి పేతురు వరిజ్ కియు సయన కితాండ్రె, దేవుణు వన్నిజ్ ఎలాగ జెలి లొఇహాన్ వెల్లి తత్తాన్ ఇజి వరిజ్ విజు వెప్తాన్. యాక యాకోబుజ్ ని మహి నమ్మితి వరిజ్ వెప్తూ ఇహాండ్రె మరి ఉండ్రె బాడ్డిదు సొహాన్.

18 పెందాహిజ్ జేలిదు మహి జమాజ్ణు గొప్ప గాబ్ర ఆతార్. పేతురు ఇనిక అతాండ్రొ ఎంబె సొహాండ్రొ ఇజి వారు గొప్ప గాబ్ర ఆతార్.

19 పేతురుజ్ రెబాజి దొహాక్కిస్తెజ్ హేరోదు రాజు ఆడ్ర సిత్తాన్. గాని వారు ఎసొ రెబాతిజ్ బా తోర్వతాన్. అందెజె హేరోదు రాజు కాప్ కిజిమహి జమాన్ జ మరి మరి యా సజతి వందిజ్ వెన్ బాజి పేతురు గెలస్త సొహాన్ కాక వరి ముస్కు తీర్పు కితాండ్రె వరిజ్ సప్తెజ్ ఆడ్ర సిత్తాన్.

హేరోదు రాజు సాతాన్.

హేరోదు రాజు యూదయదాన్ కయ్సరియాదు సొహండ్రె బాన్ సెగం కాలం బత్తితాన్.

20 హేరోదురాజు తూరు పట్టుమ్ది వరి ముస్సు, సీదోసు పట్టుమ్దివరి ముస్సు గొప్ప కోపం కల్లిజి మహాన్. అందెజె వారు ఉండ్రె మన్నుదాన్ వాతారె రాజు ఇండ్రోణి అతికారి ఆతి ఒరెన్ బ్లాస్తు ఇని వన్నిజ్ వరి పడఃకాదు కూడుఃష్టార్, రాజు వరి ముస్సు సమదనం ఆదెజ్ ఇజి. ఎందనిజ్ ఇహిజ రాజు దేసమ్దానె వరిజ్ పంట దోహ్క్కి మహాద్.

21 ఏర్పాటు కిత్తి రోజు, హేరోదు రాజు, రాజుర్ తొడఃగిని సొక్కెజ్ పొర్పాతాండ్రె రాజు కుర్చిదు బస్తాండ్రె వాతివరివెట మీటిజ్దు వర్గితాన్.

22 అక్క వెహారె లోకుర్, వీండ్లు ఒరెన్ దేవుణు లెకెండ్ వెప్పినాన్, లోకు లెకెండ్ ఆవన్ ఇజి గగోల్ కిత్తార్.

23 రాజు యాక వెహిజ్ దేవుణుదిజ్ స్తుతి కిఎతాన్. వెటనె దేవుణు దూత వన్నిజ్ ఉండ్రె కన్ఠం పుటిస్తిజ్ వాండ్రు పిడుఃకు ఆజి సాతాన్.

24 గాని దేవుణు సువార్త మరి మంద లోకు వెహార్కాక దేవుణు ముస్సు సమకం ఇట్టార్.

25 బర్షబని నవులు యెరూసలేమ్దు సొన్ని వరి పణిజ్ వీస్తారె మార్కు ఇజి కూకె ఆని యెహానుజ్ కూడుఃష్టారె యెరూసలేమ్దాన్ మర్జి వాతార్.

13

బర్షబెజ్ని నవులుజ్ సువార్త సాటిస్తిజ్ దేవుణు సజమ్దికార్ ఏర్పాటు కిత్తార్.

1 అంతియొకయాదు మహి సజమ్దు, సెగొండార్ ప్రవక్తరు, మరి సెగొండార్ దేవుణు మాటెజ్ బోదిసినికార్ మహార్. వారు ఎయెర్

ఇషాజు, బర్నబు, నిగెర్ ఇజి కూకె ఆని సిమెయోను, కురేనదికాన్ లూకియ, హేరోదు అంతిపాస్*.

² వీరు దేవుణుడిజ్ పార్దనం కిజి ఉపాస్ కిజి మహివలె దేవుణు ఆత్మ వెప్టాన్, “బర్నబెజ్ని సవులుజ్ నాను కూక్తి పణి వందిజ్ మీరు ఏర్పాటు కిదు”.

³ వెప్టాజ్, సజం ఉపాస్ మంజి పార్దనం కితారె వరి ముస్కు కిక్కు-ఇట్టారె, దేవుణు వెప్టా పణి వందిజ్ పోక్టార్.

బర్నబని సవులు కుప్ర ఇని ద్వీపుదు సాహర్.

⁴ దేవుణు ఆత్మ పోక్తిజ్ బర్నబని సవులు డిఃగు సమ్దరం డగ్గు మన్నిసెలూకిన ఇని పట్నం సాహరె ఓడఃదు ఎక్కారె కుప్ర ఇని ద్వీపుదు† సాహర్.

⁵ వారు సలామి ఇని పట్నమ్దు సాహరె బాన్ మహి యూదురి మీటిజ్ కిని ఇల్కాజ్ సాహరె దేవుణు మాటెజ్ సాటిసి మహర్. మార్కు ఇజి కూకె ఆని యోహాను వరివెట వరిజ్ తోడుః లెకెండ్ మహాన్.

⁶ వారు అయ ద్వీపు విజు పయనం కితారె పాపు ఇని పట్నమ్దు వాతార్. బానె వారు బర్యేసు ఇజి కూకె ఆని ఒరెన్ యూద వన్నిజ్ సుడఃతార్. వాండ్రు ఒరెన్ సెట్టికాన్. వాండ్రు అబద్దం మాటెజ్ వెప్టా ప్రవక్త. దేవుణు మాటెజ్ వెప్టా ప్రవక్త ఇజి నాటిసినాన్ గాని అవన్.

⁷ వాండ్రు రోమ గవర్నరు ఆతి సెర్గిపవులు వెట మహికాన్. అయ రోమ గవర్నరు ఇహిజు వాండ్రు తెలివి మన్నికాన్. వాండ్రు దేవుణు మాటెజ్ వెనా ఇజి బర్నబెజ్ని సవులుజ్ కూక్పిస్తాన్.

⁸ గాని అయ సెట్టికాన్ వరిజ్ అడ్డు కిత్తాన్. (గ్రీకు బాసదు వన్ని పేరు ఎలీమ) రోమ గవర్నరు ఆతి సెర్గిపవులు యేసుప్రవు ముస్కు నమకం ఇడఃవండాదెజ్ సుడఃతాన్, యా గార్డి విదె కినికాన్.

* **13:1 13:1** హేరోదు అంతిపాస్. మార్కు సువార్దదు బాప్తినం సీని యోహానుజ్ జెలిదు ఇడ్డి వెనుక వన్నిజ్ సప్టెజ్ ఆత్మ సత్తి హేరోదు రాజు వీండ్రి. (మార్కు 6:14-28) రాజు వెట కూడఃజి పిరితి మనయేను, సవులు ఇనికార్ † **13:4 13:4** ద్వీపు. సురుల సమ్దరం మన్ని ఇజిరి దేసెం

9-10 అయావలె సవులు (వన్నిజ్ పవులు ఇని పేరుబా మహాద్) దేవుణు అత్తుదాన్ నిండ్రితాండ్రె ఎలిమేజ్ తినాజ్ సుడేజి వెహ్లాన్, “నీను సయ్యూన్ పొటాదికాన్, నీతి నిజాయితి ఆతి విజు దన్నిజ్ పడేఱకి. నీను పూర్తి సెఱకి, గొప్ప మొసెం కినికి. నిజమాతి దేవుణు మాటేజ్ నిజం ఆఱకెజ్ ఇజి తోరిసిని.

11 ఇదిలో, దేవుణు ఎలు నిజి తీర్పు సీజి సిక్కు సీజినాన్. నీను సెగం కాలం గుడ్డి ఆజి పొద్దుదిజ్ సుడేదెజ్ అట్వండ ఆనిలె” వెటెనె వాండ్రు గుడ్డి ఆతాన్. గోయ్ నన్ని గాందుదాన్ వన్ని కణెకెజ్ సీకటి ఆతె. ఎయెర్బా కికాజ్ అసి బుల్లెయ్ కిబిస్సారా ఇజి అతాల్ ఇతాల్ బూలాజి మహాన్.

12 అయ రోమ గవర్నరు జర్గితిక సుడేతివలె యేసుప్రబు ముస్కు. నమకం ఇత్తాన్. ఎందనిజ్ ఇహిజ యేసుప్రబు - వందిజ్ బోద వెంజి బమ్మ ఆతాన్.

పవులుని బర్నబ పిసిదియ దేసమ్దు మన్ని అంతియోకయాదు సువార్త వెహ్లానార్

13 వెనుక పవులుని వన్నివెట మహికార్ ఓడఱ ఎక్తారె పాపుదాన్ పంపులియాదు మన్ని పెర్గ ఇని పట్నం సొహార్. బానె యోహాను వరిజ్ డిస్తారె యెరూసలేమ్దు మర్జి సొహాన్.

14 వారు పెర్గు పట్నమ్దాన్ సొత్తారె పిసిదియ దేసమ్దు మన్ని అంతియోకయాదు సొహార్. బానె వారు విస్త్రాంతి దినమ్దు యూదురి మీటిజ్ ఇండ్రొ సొహార్ బస్త్రార్.

15 మోసె సిత్తి రూలుదాన్, ప్రవక్తరు రాస్తి మాటెజ్దాన్ సెగం సద్వితి వెనుక మీటిజ్ ఇండ్రొణి అతికారిజు పవులుని బర్నబ వెట. “దాదారండె, లోకాజ్ బోదిస్తెజ్ ఇని మాటేజ్బా మహిజ వెహ్లాన్” ఇహార్.

16 అయావలె పవులు నిజితండ్రె విజేరె అలెజి మండ్రు ఇజి కియు సయ్న కితాండ్రె వరివెట వెహ్లాన్, “ఇస్త్రాయేలు లోకాండె, దేవుణుదిజ్ తియెల్ ఆని యూదురు ఆఱ లోకాండె, నా మాట వెండ్రు.

17 మా ఇస్రాయేలు లోకు పార్దనం కిని దేవుణు, మా అనిగొగొరిజ్, వన్ని లోకుర్ ఇజి మండ్రెజ్ ఏర్పాటు కిత్తాన్. వారు అయ్గుప్ప దేసమ్దు ఆఇదేసెమ్దివరిలెకెండ్రె ముహివలె వరిజ్ నండ్రె లోకు ఎల్పిస్తాన్. వెనుక గొప్పసత్తుదాన్ వరిజ్ అబ్బెణాన్ గెల్పిసి తత్తాన్.

18 రమారమి నలపయ్ పంటెజ్ వారు బిడిఃమ్ బూమిదు సొన్ని ముహివలె దేవుణు వరిజ్ ఓరిసి మహాన్.

19 కనాను దేసమ్దు ముహి ఏడు జాతిజాణి వరిజ్ విదెం కిజి గెల్పిస్తాండ్రె వరిజ్ పాడు కిజి వరి దేసెం వన్ని లోకాజ్ అక్కు లెకెండ్రె సిత్తాన్.

20 యాకెజ్ విజు నాల్లి వందెజ్ యబాయ్ పంటెజాణ్ జర్గితె.

వెనుక సముయేలు ఇని ప్రవక్త వాతి కాలమ్దాక వరిజ్ ఏలుబడిః కిదెజ్ తీర్పు తీరిన్ని నెయ్యి లోకాజ్ దేవుణు ఏర్పాటు కిత్తాన్.

21 దన్ని వెనుక ఇస్రాయేలు లోకుర్ 'మజి ఉండ్రె రాజుజ్ ఏర్పాటు కిఅ' ఇజి వెప్తిజ్ దేవుణు వరిజ్ బెన్యమిను కుటుమ్దికాన్ కిసు మరిసి ఆతి సవులుజ్ నలపయ్ పంటెజ్ ఏలుబడిః కిదెజ్ ఏర్పాటు కిత్తాన్.

22 వెనుక సవులుజ్ లాగితాండ్రె దావీదుజ్ రాజువజ దేవుణు ఏర్పాటు కిత్తాన్. దావీదు వందెజ్ దేవుణు ఇని సొసి వెప్టాన్ ఇహిజ, 'యెసెయి మరిసి ఆతి దావీదు ఇహిజ నాను ఒడిఃబిని లెకెండ్రె ఒడిఃబిజినాన్. నాను ఇస్టం ఆనికెజ్ వాండ్రు ఇస్టం ఆజినాన్. వాండ్రు ఇనిక కిదెజ్ ఇజి నాను కోరిజినానో అక్కెజ్ వాండ్రు కినాన్'.

23 యా దావీదు పొటెజాణిజె మా అనిగొగొర్ వెట దేవుణు ఒట్టుకిత్తి లెకెండ్రె ఇస్రాయేలు లోకాజ్ తప్రిన్నికాన్ ఆతి యేసుజ్ పుట్టిస్తాన్.

24 యేసు వాని ముందాల యోహాను ఇస్రాయేలు లోకాజ్ బోదిస్తాన్. ఇనిక ఇహిజ 'విజేరె పాపమ్కు ఒప్పుకోడఃజి డిఃసిసిజి బాప్తినం లాగె ఆదెజ్' ఇజి.

25 యోహాను వన్ని పణి వీన్నివలె లోకాజ్ వెప్టాన్, 'నాను ఎయెన్ ఇజి మీరు ఒడిఃబిజనిదెర్? మీరు ఒడిఃబిజనికాన్ ఆవన్ నాను. మీరు ఎద్దు సుడఃజి ముహికాన్ వెన్కా వాజినాన్. వన్ని జోడ్కుబెట్టు కూతెజ్బా నాను ఏపటిదిక ఆవ'.

26 తంబెరిజాండె, అబ్రాహాం కుటుమ్దికిదెరా, దేవుణుదిజ్ తియెల్ అనికిదెరా, దేవుణు లోకాజ్ ఎలాగ గెల్పిస్తానై ఇజి కబ్రు దేవుణు మజి విజేరిజె పోక్తాన్.

27 ఎందనిజ్ ఇహిజ యెరూసలేమ్దు మహికార్, వరి అతికారి లోకుర్, యేసు, దేవుణు పోక్తాన్ ఇజి గుర్తు అన్వితార్. విజు విస్త్రాంతి దినమ్దు వారు ప్రవక్తరు రాస్తి మాటెజ్ సద్వితార్ గాని అర్లం కివితార్. గాని ప్రవక్తరు ముందాల్పె వెప్తా అయ మాటెజ్ వజ జర్పిస్తార్. ఎలాగ ఇహిజ యేసుజ్ సప్తెజ్ వారు తీర్పు కిత్తార్.

28 యేసుజ్ తీర్పు కిని వన్నిడగు తసి సావుదిజ్ తగితి తప్పు ఇనికబా కివితాన్ ఇజి సుడెఃతిజ్బా గాని విన్నిజ్ సిలువ డెయేజి సప్పు ఇజి వారు పిలాతుజ్ బతిమాలితార్.

29 యేసుజ్ యూదురు ఇనికెజ్ ఇనికెజ్ కినారొ ఇజి ప్రవక్తరు రాస్తి మహికెజ్ విజు వారు కిత్తి వెనుక వన్ని సిసూర్ వన్ని పీనుగుదిజ్ సిలువదాన్ డిప్తారె సట్టుపణుకుదు దొలిస్తి సాలమ్ లొఇ ఇత్తార్.

30 గాని దేవుణు యేసుజ్ సాతి వరిబాణిజ్ నిక్తాన్.

31 గలీలయదాన్ యెరూసలేమ్దు వన్నివెట సొన్ని మహి వరిజ్ యేసు నండొ రోస్కు తోరె ఆతాన్. వారు ఏలు మాటు ఇస్తాయేలు లోకాజ్ నడిమి యేసుజ్ సాసిర్.

32-33 ఏలు మాపు మిజి సువార్త వెహినావ్. అయ సువార్త ఇనిక ఇహిజ దేవుణు యేసుజ్ సాతి వరిబాణిజ్ నిక్తాన్. యాక మా అనిగొగొర్ వెట దేవుణు కిత్తి ఒట్టు. వరిజ్ కిత్తి ఒట్టు వరి పొటెజాణికార్ అతి మా వందిజ్ ఏలు జర్గితాద్. “నీను నా మరిన్, నేండ్రు నాను నీ బుబ్బు ఆత మన్ను”, ఇజి కీర్తన రుండిదు రాస్తి మనిక దిన్నివందిజె.

34 దేవుణు వన్నిజ్ సాతి వరిబాణిజ్ నిక్తాన్. వన్ని పీనుగు సబ్విద్ ఇజి వన్నివందిజ్ దేవుణు మాటాదు ఈహు రాస్త మనాద్. “దావీదుజ్ సీనా ఇజి ఒట్టు కిత్తి నెగ్గి దీవెనమ్కు నాను మిజి తప్విండ సీనా”.

35 కీర్తన పుస్తకమ్దు మరి రాస్త మనాద్. అక్క ఇనిక ఇహిజ “నీను పొక్తివన్ని పీనుగు సబ్జి సొండ్రెజ్ నీను సరి సిఇ”.

36 అపొజు దావీదురాజు దేవుణు ఓర్పాటు కిత్తి వజు వన్ని తరమ్ది వరిజ్ సేవ కిజి వీస్తాండ్రె సాత సాహాన్. వన్ని అనిగొగొరిబాన్ వన్నిజ్ బా ముస్తార్. వన్ని పీనుగు సబిత సాహాద్.

37 గాని సాతి వరిబాణిజ్ దేవుణు నిక్తి యా యేసు పీనుగు సబజ్ సాన్ ఏతాద్.

38 అందెజె తంబెరిజాండె, మిజి వెప్పిని సువార్త యాకాదె. పాపమ్ కు సెమిస్తెజ్ యేసు అట్నాన్. యాక మీరు నెగ్రెండ నెస్తెజ్ ఇజి నాను ఆస ఆజిన.

39 మోసె సిత్తి రూలుజ్ ఒరెన్ వన్నిజ్ వన్ని పాపమ్ కాణ్ డిబిస్తెజ్ అట్ ఉ. గాని యేసు ముస్కు నమకం ఇడ్చి వరిజ్ వరి పాపమ్ కాణ్ యేసు పూర్తి డిబిస్తాన్.

40 ప్రవక్తరు వెప్తివజు మిజి రెవండ సుడెదు. వారు ఇనిక వెప్టార్ ఇపొజు.

41 “సుడెదు, వెక్తిసినికిదెరా, మీరు బమ్మ నిదెర్లె గాని పాడాజి సానిదెర్లె. ఎందనిజ్ ఇపొజు మీ కాలమ్దు నాను ఉండ్రె బమ్మాని పణి కిని. గాని అయ పణి వందిజ్ ఎయెర్ బా వెప్తిజ్ బా మీరు నమ్ ఇదెర్”.

42 పవులుని బర్నబ యూదురి మీటిజ్ ఇండ్రెణిజ్ సొత్తిజ్, “వాని విస్తాంతి దినమ్దు వాజి యా మాటెజ్ మజి మరి వెప్పి సిదాట్”, ఇజి బానె కూడితి మహికార్ వరిజ్ బతిమూలితార్.

43 మీటిజ్ ఆతి వెనుక నండొండార్ యూదురు, నండొండార్ యూద మతమ్దు కూడితి యూదురు ఆఇ బక్తి మన్నికార్ పవులుని బర్నబ వెట సాహార్. పవులు, బర్నబ వరివెట వర్గితార్. దేవుణు మిజి తోరిస్సి దయాదర్నమ్దిజ్ డిస్ ఏండ ఎలాకాలం నడిదు ఇజి పవులుని బర్నబ వరిజ్ ఉసార్ కిబిస్తార్.

44 మరి వాతి విస్తాంతి దినమ్దు పట్నమ్దికార్ విజేరె సొహి లెకెండ మంద లోకుర్ దేవుణు మాట వెండ్రెజ్ ఇజి యూదురు మీటిజ్ కిని ఇండ్రె కూడెజి వాతార్.

45 పవులు వెప్పి మాటెజ్ వెండ్రెజ్ మంద లోకుర్ కూడెజినార్ ఇజి సుడెతారె యూదురు గోస ఆతార్. వారు పవులు వెప్తి మాటదిజ్ మరజి వెప్టారె వన్నిజ్ దూసలాడితార్.

46 అయావలె పవులు, బర్నబ తియెల్ ఆవిండ వెహ్టార్, “దేవుణు మాట ముందాల మిజి వెహ్టాజ్వలె. అందెజె మాపు ముందాల మిజి వెహ్టాప్. గాని మీరు, ఎలాకాలం బత్కిని బత్కు దోహ్క్విక్వాప్ ఆవిప్ ఇజి మిజి మీరె నెక్కి పొక్తిదెరె తీర్పు కిజినిదెర్ కక మాపు మిజి డిసి యూదురు ఆఇ లోకుర్ బాన్ సొన్సినాప్.

47 దేవుణు మజి సిత్తి ఆడ్ర ఇనిక ఇహిజ, ‘యూదురు ఆఇ వరిజ్ ఉండ్రె జాయ్ వజ మిజి ఇట్టా మన్ను. ఎందనిజ్ ఇహిజ యా లోకమ్దు మన్ని విజు లోకాజ్, వరి పాపమ్కాణ్ వాని సిక్నదాన్ గెల్పిస్తెజ్’ ఇజి వెహ్టా మనాన్.

48 యూదురు ఆఇ లోకుర్ విజేరె యా మాటెజ్ వెహరె సర్ద ఆతార్. దేవుణు మాటెజ్ ఎస్సానొ నెగ్గికెజ్ ఇజి వారు వెహ్టార్. ఎలాకాలం బత్కిని బత్కుదిజ్ ఏర్పాటు ఆతికార్ విజేరె దేవుణు మాటెజ్ నమ్మితార్.

49 దేవుణు మాట అయ దేసమ్దు విజు సాటె ఆతాద్.

50 గాని యూదురు ఆ పట్టుమ్దు బక్తి మన్ని పల్కుబడిః మనికెజ్ ఆతి అయ్లి కొణ్ణొక వెట, పెరికార్ ఆతి మొగవరి వెట వర్గిజి కోపం రేప్తారె పవులు ముస్కు, బర్నబ ముస్కు మాలెజ్ కితారె వరిజ్ అయా పట్టుమ్దాన్ నెక్త పొక్తార్.

51 అందెజె పవులుని బర్నబ, వరి కాల్యాణి దూల్లి అయ పట్టుమ్ది వరి ఎద్దు దుల్ప్వార్. ఎందనిజ్ ఇహిజ వారు దేవుణు మాట నెక్కిపొక్తిజ్ వరిజ్ వాని సిక్న వారె తపిస్తార్ ఇజి సాసి లెకెండ్ మండ్రెజ్ ఇజి. వెనుక వారు ఇకోనియ ఇని పట్టుమ్దు సొహార్.

52 అంతియొకయాదు మన్ని సిసూర్ ఎస్సానొ సర్ద ఆతార్. దేవుణు ఆత్మ వరి ముస్కు పూర్తి వాతాద్.

14

పవులు, బర్నబ ఇకొనియాదు సువార్త వెహ్సినార్

1 పవులుని బర్నబ కూడఃజి ఇకొనియాదు సొహరె అంతియొకయాదు కిత్తిలెకెండ్ యూదురు మీటిజ్ కిని ఇండ్రొ సొహార్.

వారు నెగ్రెండ బోద వెహ్టాజ్ నండొండార్ యూదురు, నండొండార్ యూదురు ఆఇకార్బా నమ్మితార్.

2 గాని నమ్మిఇకార్ యూదురు, యూదురు ఆఇ వరిజ్ రేప్తారె అపొస్తరుజ ముస్సు కోపం పుటిస్తార్.

3 గాని పవులు, బర్నబ నండొ రోస్సు బానె మహార్. యేసువందిజ్ దయ్‌రమ్‌దాన్ వర్గితార్. వారు ప్రబు దయాదర్‌మమ్ వందిజ్ వెహ్టా మాటెజ్ నిజం ఇజి ప్రబు విజెరిజ్ తోరిస్తాన్. ఎలాగ ఇహిజ బమ్మాతి పణిజ్ బమ్మాతి గుర్తుజ్ కిదెజ్ పవులుజ్ బర్నబెజ్ సత్తు సిత్తాన్.

4 అయ పట్నమ్‌దు మహి లోకుర్ రుండి గుంపుజ్ ఆతార్. సెగొండార్ యూదురు పడకాద్, మరి సెగొండార్ అపొస్తరి పడకాద్.

5 అయావలె సెగొండార్ యూదురు ఆఇకార్, మరి సెగొండార్ యూదురు, యూదురి అతికారిజు వెట కూడఃజి అపొస్తరుజ్ అసి వరిజ్ సిగు కిజి పణుకుజాణిజ్ డెయ్‌జి సప్తెజ్‌వలె ఇజి ఒడిఃబిజి మహార్.

6-7 అపొస్తరు అయ సజతి నెస్తారె లుకయొనియాదు మహి లున్‌త్ర, దెర్బ ఇని పట్నమ్‌కాణ్, వన్కా సురుల మన్ని దేసమ్‌కాజ్ ఉహ్‌సాసి సాహారె అబ్బె సువార్త సాటిస్తార్.

లున్‌త్ర దెర్బ ఇని పట్నమ్‌కాజ్ సాన్‌సినార్

8 లున్‌త్ర ఇని పట్నమ్‌దు, నడిఃదెజ్ అట్‌ఇ సొట వాండ్రు ఒరెన్ మహాన్. వాండ్రు పుట్టిబాణిజ్ మొదొల్ని సొటాదికాన్ ఆతండ్రె ఎసెజ్‌బా నడిఃదెజ్ అట్‌ఏండ బసినె మంజినాన్.

9 పవులు బోదిసి మహిజ్ వాండ్రు వెంజి మహాన్. పవులు వన్నిజె సుడఃతిజ్ నెగెండ్ ఆన ఇజి వన్నిజ్ నమకం పుట్టినాద్ ఇజి నెస్తాన్.

10 అయావలె పవులు వన్నిజ్, “నిజ్‌అ, నీ పాదమ్‌కు బూమిదు మొప్పి నిల్‌అ”, ఇజి డటం వెహ్టాజ్ అయ సొటాదికాన్ లిట్టె నిజేతండ్రె డాట్టెజ్ మొదొల్స్తాన్.

11 పవులు కిత్తి బమ్మాతి పణి సుడఃతారె బాన్ మహి లోకుర్ లుకోనియ భాసాదు గగోలాతార్. “దెయమ్‌కు లోకు లెకెండ్ ఆతెనె మాడగ్రు డిఃగ్‌జి వాతె”, ఇజి డటం గగోలాతార్.

12 బర్నబెజ్ బ్రుహాన్పతి ఇజి పేరు ఇట్టార్. నండొ బోద వెహ్తా వందిజ్ పవులు హెర్మ ఇజి పేరు ఇట్టార్.

13 పట్నం వెల్లి మహి బ్రుహాన్పతి గుడిడిది పుజేరి వాతండ్రె డాకుజ్, పూబుదండెజ్ అస్తాండ్రె పట్నం వెల్లి మహి సేహ్లా డగ్రు తత్తాన్. మంద లోకు కూడేజి వాతారె పూజ కినాట్ ఇజి అయ పుజేరిని, కూడితి మహి లోకుర్ ఒడేబితార్.

14 బర్నబని పవులు యాక నెస్తారె వారు కిని పణిదిజ్ ఒప్పుకోడేఎప్ ఇజి తోరిసిని వందిజ్ వరి సొక్కెజ్ పాతెజ్ కిస్తారె లోకురి నడిమిదు ఉహ్కీ సొహరె డటం వెహ్తార్.

15 “తంబెరిజాండె, మీరు ఎందనిజ్ ఈహు కిజినిదెర్? మాపుబా మీ నన్ని లోకునె. మీరు యా పణిదిజ్ రెఇకెజ్ డిసిసిజి ఆగానం, బూమి, సమ్దరం, బాన్ మన్ని విజు వనకాజ్ పుటిసి బత్కిజి మంజిని దేవుణుదిజ్ నమ్మిదు ఇజి మిజి సువార్త వెహ్తాన్.

16 గడ్డిసి కాలమ్దు విజు జాతిజ్ వరిజ్ వరిజ్ ఇన్లమాతి వన్కాజ్ పొగిడిజి మాడిస్తెజ్ దేవుణు డిస్తె నిత్తాన్.

17 అహ్జేబా దేవుణు ఆగానమ్దాన్ మిజి పిరు, ఎమేణివేల వంట అయావలె కనికారం అజి సీజినాన్. తక్కు సిల్లెండ బోజనం సీజినాన్. మీ మన్నుదిజ్ సర్ల కిబిసి పొస కిజినాన్. ఈహు వాండ్రు ఎలాగ మహ్తా దేవుణు ఇజి లోకాజ్ తోరిస్తాన్”.

18 అపొస్తురు యాలెకెండ వెహ్తాజ్బా వారు విరిజ్ పూజ కివిండ ఆదెజ్ ఇజి లోకురిజ్ అడ్డు కిదెజ్ గొప్ప కస్టం ఆతాద్.

19 అయావలె అంతియోకయదాన్, ఇకొనియదాన్ సెగొండార్ యూదురు వాతారె వరి మాటెజాణిజ్ నండొ లోకాజ్ వరి పడకాదు కూడుస్తారె. కూడుస్తారె, పవులు ముస్కు పణుకుజ్ డెయ్యూర్. వాండ్రు సాతాన్ ఇజి ఒడిబితారె పట్నం వెల్లి వన్నిజ్ ఈడ్డిస్తారె బానె డిస్తారె.

20 గాని సిసూర్ వన్ని సురుల కూడితి మహివలె పవులు నిజేతండ్రె పట్నమ్ లోఇ మర్జి సొహాన్. మహ్సా నాండిజ్ పవులు, బర్నబు కూడితారె దెర్బ ఇని పట్నమ్దు సొహార్.

పవులుని బర్నబ సిరియాదు మన్ని అంతియొకయాదు మర్జి సొహార్

21 పవులుని బర్నబ దెర్బ ఇని పట్టుమ్దు సువార్త బోదిస్తార్. నండో లోకుర్ యేసుప్రబుజ్ నమ్మితార్. వెనుక పవులుని బర్నబ, లుస్త్త, ఇకొనియ, అంతియొకయాదు మర్జి వాతార్.

22 వాతారె, ఎవేణి పట్టుమ్ది వరిజ్ బానె సిసూరిజ్ ఉసార్ కిబిస్తార్. “మీ నమకం డిన్వండ మండ్రు. మాటు నండో మాలెజ్ ఓరిసి దేవుణు రాజెమ్దు సొండ్రెజ్ వలె”, ఇజి మరి మరి పణిసి వెప్తార్.

23 పవులు, బర్నబ విజు సజమ్కాజ్ పెద్దెల్జ ఏర్పాటు కితారె ఉపాస్ మంజి పార్దనం కిజి, వారు నమ్మిత్తి దేవుణుదిజ్ వరిజ్ ఒపజెప్తార్.

24 వెనుక పిసిదియ దేసిం డాట్టారె పంపులియాదు వాతార్.

25 పెర్గ ఇనిబాన్ దేవుణు మాటెజ్ బోదిసి వెనుక అతలియ పట్టుమ్దు డిగ్గిజి సొహార్.

26 అబ్బెణిజ్ ఓడః ఎక్తారె వారు మొదోహి సోత్తి సొహి అంతియొకయాదు మర్జి వాతార్. యా అంతియొకయాదునె దేవుణు పణివందిజ్, వన్ని దయాదర్మమ్దిజ్ ఒపజెపె ఆతార్. అయ పణి వీస్తారె ఏలు బానె మర్జి వాతార్.

27 మర్జి వాతారె సజమ్ది వరిజ్ విజెరిజ్ కూడుఃవ్తారె, దేవుణు వరి వెటనె కిత్తి పణిజ్ విజు వెప్తార్. యూదురు ఆఇకార్ దేవుణుదిజ్ నమ్మిదెజ్ వాండ్రు ఎలాగ సరి సిత్తాన్ ఇజి వెప్తార్.

28 వారు నండో కాలం బానె మంజి సిసూరి వెట బత్తిత్తార్.

15

అపొస్తురు, పెద్దెలుజు ఆలోసనం కిదెజ్ యెరూసలేమ్దు కూడఃజి వాతార్

1 సెగొండార్ యూదయ దేసెమ్దికార్ అంతియొకయాదు వాతార్. వారు అబ్బె మన్ని లోకాజ్ ఈహు నెస్సిస్తెజ్ మొదోల్స్తార్. ఇనిక ఇహిజ

మోసె సిత్తి రూలు వజ సునతి కిబె ఆవిండ మహిజ మీరు సిక్చదాన్ గెలిస్సెజ్ అట్ ఇదెర్ ఇజి నెస్ పిస్తార్.

² పవులుని బర్నబ యా సజతి వందిజ్ కూడితారె యూదయ దేసెమ్ది వరివెట నండొ వర్గిజి ఆహె తర్కిస్తార్. అందెజె యా మాటెజి వందిజ్ పవులు, బర్నబ, వరివెట అంతియొకయ దేసెమ్దు మన్ని మరి సెగొండార్ ఎక్కు యెరూసలేమ్దు సొన్ని అబ్బె మన్ని అపొస్తురుజ, పెద్దెల్జి డగ్రు సొండ్రెజ్ వలె ఇజి తీర్మానం ఆతార్.

³ ఆహె అయ సజమ్ది లోకుర్ వరిజ్ పోక్తార్. వారు పినెకె, సమరియ ఇని దేసెమ్క సరి సొహారె బానె మహి వరివెట యూదురు ఆఇకార్ దేవుణు దరోట్ మహ్తా వాతారె దేవుణుదిజ్ నమ్మిజినార్ ఇజి విజు వెహ్తారె సొహార్. అబ్బె మహి నమ్మితికార్ యాక వెహారె గొప్ప సర్ద ఆతార్.

⁴ వారు యెరూసలేమ్దు వాతివలె సజమ్దికార్, పెద్దెలుజు, అపొస్తురు విజేరె వరిజ్ గవరం సీజి బనె కిత్తార్. దేవుణు వరివెట కిత్తి పణిజి వందిజ్ విజు వారు వెహ్తార్.

⁵ గాని బాన్ పరిసయ్దురు ఇని జటుదు మహి నమ్మితికార్ సెగొండార్ నిజ్జి వెహ్తార్, “నమ్మిత్తి వరి లోఇ యూదురు ఆఇ లోకుర్ సునతి కిబె ఆదెజ్ వలె. మోసె సిత్తి రూలుదు మన్ని ఆడ్రెజ్ విజు వారు బప్పుకోడెజి ఆహె కిదెజ్ వలె ఇజి మాటు వరిజ్ వెహ్తాజ్ వలె”, ఇజి వెహ్తార్.

⁶ అయావలె అపొస్తురు, పెద్దెలుజు యా సజతి వందిజ్ ఆలోసనం కిదెజ్ కూడెజి వాతార్.

⁷ నండొ తర్కిసి వెనుక పేతురు నిజితండ్రె వరివెట ఈహు వెహ్తాన్. “తంబెరిజాండె, సెగం కాలమ్కాజ్ ముందాల్పై* యూదురు ఆఇ లోకాజ్ సువార్త వెహ్తాజ్ మీ నడిమిహానె దేవుణు నజి ఏర్పాటు కిత్తాన్ ఇజి మీరు నెసినెదెర్. ఎందనిజ్ ఇహిజు వారుబా దేవుణు మాట వెంజి దేవుణుదిజ్ నమ్మిదెజ్.

* 15:7 15:7 యూదురు ఆఇవరివెట సొన్ని సువార్త వెహ్తాజ్ దేవుణు పేతురువెట వెహ్తా కతవందిజ్ అపొస్తురు కిత్తి పణిజ్ 10:1-1; 1:18. దు నద్విదు.

8 లోకు ఒడిఃబినికెజ్ విజు నెసిని దేవుణు, దేవుణుదిజ్ నమ్మితి యూదురు ఆఇ లోకాజ్ బా వన్నిబాన్ కూడుఃప్పాన్ ఇజి తోరిస్తాన్. ఎలాగ తోరిస్తాన్ ఇహిజ మజి సిత్తివజనె యూదురు ఆఇ లోకాజ్ బా దేవుణు వన్ని ఆత్మ సిత్తాన్.

9 యూదురు ఆతి మజిని ఆఇ లోకుర్ ఆతి వరిజ్ ఇని తేడ సిల్లెండ దేవుణు ఉండ్రె వజనె కిత్తాన్. ఎలాగ ఇహిజ వారు నమ్మితిజ్ వరి మన్నుదు మన్ని పాపమ్ కు విజు లాగితండ్రె నుబరం కిత్తాన్.

10 అహిజ, మాపు గాని, మా అనిగొగొర్ గాని పిండిదెజ్ అట్ ఇ బరుదిజ్ ఎందనిజ్ యా నమ్మితి వరి మున్ను మొప్పినిదెర్? ఆహె మీరు కిత్తిజ మీరు దేవుణుదిజ్ కోపం రేప్పినిదెర్.

11 గాని ప్రబు ఆతి యేసు దయాదర్ మమ్ దానె మాటు గెలిస్తమనాట్ ఇజి మాటు నమ్మిజినాట్. అయావజనె వారుబా గెలస్త మనార్”, ఇహాన్.

12 ఆఇ జాతి లోకుర్ నడిఃమి దేవుణు వరివెట కిత్తి గొప్ప బమ్మాతి పణిజ వందిజ్ గొప్ప బమ్మాతి గుర్తుజ వందిజ్ పవులు, బర్లుబ వెప్తాజ్, అబ్బె మహి లోకుర్ విజేరె జమ్ న అలెతారె వెహార్.

13 వారు వెప్తా వీస్తి వెనుక యాకోబు ఈహు వెప్తాన్. “తంబెరిజాండె, నా మాట నెగ్గెండ వెండ్రు.

14 ఆఇ జాతి లోకుర్ వెట దేవుణు ముందాల్నె దయ తోరిస్తాన్. అక్క ఎలాగ ఇహిజ వరి బాణిజ్ ఉండ్రె జటు వన్ని సొంత లోకు వజి ఏర్పాటు కిదెజ్ దేవుణు వరిజ్ దయ తోరిస్తాన్. అక్క విజు పేతురు యెలె వెప్తా మనాన్.

15 ప్రవక్తరు ముందాల్నె వెప్తాకెజ్ యాకదె. ఇని తేడ సిల్లెద్. వారు ముందాల్నె వెప్తా మాట ఇనిక ఇహిజ.

16 “దిన్ని వెనుక నాను మర్జి వాజి దావీదురాజుది అర్తి సొహి ఇల్లు తొప్ప. లాగ్టి విసిర్జి దన్నిజ్ నాను మర్జి తొప్పి దన్నిజ్ నాను ముందాల్ మహిలెకెండ కిన.

17-18 అయావలె ఆఇ జాతి లోకుర్ విజేరె నజి రెబానార్లె. ఆఇ జాతి లోకుర్ బాణిజ్ నా పేరు అస్తెజ్ నాను ఏర్పాటు కిత్తికార్

విజేరి నజీ రెబానార్లె ఇజి దేవుణునె వెహ్పినాన్”, “యాక నంఠో కాలమ్కాజ్ ముందాల్వై దేవుణు వెహ్తా మనాన్”.

19 యాకోబు మరి వెహ్తాన్, “నా మన్నుదు ఇనిక ఇహిజ, దేవుణు దరోట్ మహ్తి వాతి ఆఇ జాతి లోకురిజ్ మాటు మాలెజ్ కినిక ఆవిద్.

20 మాటు వరిజ్ ఉండ్రి ఉత్తం రాసి పోక్తెజ్. అబ్బై ఇనిక రాస్తెజ్ ఇహిజ, బొమ్మెజ వూజ సిత్తి కండ తినిక ఆవిద్. అక్క సెఇక. సాని బూలానిక ఆవిద్. గొత్తిక పిడిఃక్కి సప్తిక తినిక ఆవిద్. నల తినిక ఆవిద్. యాక విజు డిఃసిసిదెజ్. అక్కెజె. మరి ఇనిక సిల్లెద్.

21 ఎందనిజ్ ఇహిజ యాక విజు రాస్తిమని మోసె సిత్తి రూలుజ్ ప్రతి విస్త్రాంతి దినమ్దు, నంఠో కాలమ్కాణిజ్† యూదురు మీటిజ్ కిని ఇల్కాజ్ సదివిజి మంజినాద్. మోసె వెహ్తి మాటెజ్ విజు వట్టుమ్దు బోదిసి మంజినాద్, అందెజె వన్నాజ్ విజు వారు లోబడెదెజ్”, ఇజి వెహ్తాన్.

అపొస్తరు ఉండ్రి ఉత్తం రాస్త పోక్తార్

22 అయావలె అపొస్తరు, పెద్దెలుజు, సజమ్దికార్ విజేరి కూడితారె నమ్మిత్తి వరిలోఇహాన్ సెగొండారిజ్ ఏర్పాటు కిజి పవులుని బర్నబవెట అంతియొకయాదు పోక్తెజ్ ఇజి తెగిస్తార్. వారు బర్నబ ఇని మరి ఉండ్రి పేరు మన్ని యూద వన్నిజ్, సీలెజ్ ఏర్పాటు కిత్తార్. యూదని, సీల రిఎర్. అయ సజమ్దు ముకెలమతికార్.

23 వరివెట సజమ్దికార్ ఉండ్రి ఉత్తం రాస్త పోక్తార్. అబ్బై ఇనిక రాస్త మనాద్ ఇహిజ, ‘మీ దాద్సీర్ ఆతి అపొస్తరు, పెద్దెలుజు, అంతియొకయాదు, సిరియాదు, కిలికియాదు మన్ని దేవుణుదిజ్ నమ్మిత్తి యూదురు ఆఇ జాతిజ విజేరిజ్ వందనమ్కు పోక్కినార్.

24 సెగొండార్ మా డగ్గుహాన్ సొహారె వరి బోదదాన్ మజి మాలెజ్ కిత్తార్, మీ మన్నుజ విజు బాద కిత్తార్ ఇజి మాపు నెస్తాప్. గాని వరిజ్ మాపు పోక్వితాప్, ఇని అతికారంబా సివితాప్.

† 15:21 15:21 నంఠో కాలం ఇహిజ, రమరమి 200 పంటెజాణిజ్ 300 పంటెజ్ దాక.

25-26 అందెజె, మా యేసు ప్రబు వందిజ్ పాణం సావుదిజ్ బపజెప్పి మా ప్రియమాతి బర్నబ, పవులు ఇని వరివెట మా డగ్రుహాన్ సెగొండారిజ్ మీ బాన్ పోక్వాప్ ఇజి మాపు ఉండ్రె మన్ను ఆత మనాప్.

27 అందెజె మాపు యూద, సీల ఇని రిఎరిజ్ పోక్సినాప్. వారు వాజి మాపు రాస్తి మాటనె వెహ్సార్లె.

28-29 మిజి అవ్సరం ఆతి ఆడ్రెజ్ ఇనికెజ్ ఇహిజ, దెయమ్కాజ్ పూజ కిత్తికెజ్ తిన్మాట్. నల తిన్మాట్. గొత్తిక పిడికిన్సి సప్తివనకాజ్ తిన్మాట్. సాని బూలాదెజ్ ఆవద్. యా పణిజ్ కిపిండ మీరు దూరం మహిజ మిజినె నెగెద్. మిజి అవ్సరం ఆతి యా ఆడ్రెజ్ ఆవిండ మరి నండొ ఆడ్రెజ్ వెప్పి మీ మున్ను బరు ఇడ్డిక ఆవద్ ఇజి దేవుణు అత్మని, మాపు ఉండ్రె మన్ను ఆజినాప్. మిజి మా వందనమ్కు.

30 అయావలె సజమ్దికార్ సెల్వు సిత్తిజ్ వారు సోత్తారె డిగు అంతియొకయాదు వాతార్. బానె నమ్మితి వరిజ్ విజెరిజ్ కూడుఃప్తారె ఉత్తం సితార్.

31 వారు అయ ఉత్తం సద్వితారె డటం సర్ల ఆతార్. ఎండనిజ్ ఇహిజ అయ ఉత్తం వరిజ్ దయ్సరం కిత్తార్.

32 యూద, సీల రిఎర్ దేవుణు మాటెజ్ వెప్పికార్. అందెజె వారు దేవుణు మాటెజ్ నండొ వెప్పి అబ్బె మహి దాద్సిరిజ్ తంబెరిసిరిజ్ దయ్సరం వెప్పి ఇడ్డార్. అక్క వెంజి వరి మన్నుదు బలం ఆతార్.

33-34 వారు అబ్బె సెగం రోస్సు గడఃప్తార్. వెనుక, బానె మహి నమ్మితికార్ వరిజ్ యెరూసలేమ్దు వరిజ్ పోక్తి వరిబాన్ మర్జి పోక్తార్. “దేవుణు సమదనం మీబాన్ మనీద్”, ఇహారె పోక్తార్.

35 గాని పవులుని బర్నబ అంతియొకయాదు మహారె మరి నండొ లోకుర్ వెట దేవుణు మాటెజ్ బోదిసి సువార్త వెప్పి మహారె.

మార్కు వందిజ్ పవులుని బర్నబ గొడఃబ ఆతార్

36 సెగం రోస్సు ఆతి వెనుక పవులు బర్నబెజ్, “ఏలు సొనాటె మాటు దేవుణు మాట వెప్తి విజు పట్నమ్కాజ్ మన్ని తంబెరిజు విజెరె ఎలాగ మనారొ ఇజి సూణ సొనాట్ ఇజి వెప్తాన్.

37 అయావలె మార్కు ఇజి ఆజ పేరు మన్ని యోహానుజ్ వరివెట కూక్కి ఒతెజ్ బర్లుబ ఇస్టం ఆతాన్.

38 గాని మార్కుజ్ వరివెట ఒతెజ్ ఆవద్ ఇజి పవులు వెహ్తాన్. ఎందనిజ్ ఇహిజ మార్కు ముందాల వరివెట పణిదిజ్ సొహిజ్ పూర్తి టయం మన్ ఏండ పంపులియదు వరిజ్ డిస్త సొహాన్.

39 మార్కు వందిజ్ పవులుని బర్లుబ నండొ గొడఃబ ఆతారె రియాజ సొహార్. బర్లుబ మార్కుజ్ వెట ఒతండ్రె ఓడః ఎక్కి కూప్త ఇని ద్విప్పుదు సొహార్.

40 గాని పవులు సీలెజ్ కూక్కి ఒతాన్. బాన్ మహి తంబెరిజు వారు రిఎరిజ్ దేవుణు దయాదర్మమదిజ్ ఒపజెప్తారె వరిజ్ పోక్తార్.

41 వారు సొత్తారె సిరియ కిలికియ పట్టుమ్కాజ్ మన్ని సజమ్కాజ్ సొహార్. బానె దేవుణు ముస్సు నమకం ఇడ్డివరి నమకం సత్తు కిబిస్తార్.

16

పవులుని సీల వెట తిమోతి కూడఃజినాన్

1 పవులు, సీల వెట దెర్బ, లున్త్ర ఇని పట్టుమ్కాణ్ వాతాన్. అబ్బె తిమోతి ఇనికాన్ ఒరెన్ యేసుప్రబుజ్ నమ్మిత్తికాన్ మహాన్. వన్ని అయ్సిబా నమకం ఇట్టా మహాద్. అది యూద జాతిదికాద్. వన్ని బుబ్బ ఆజ జాతిదికాన్. వాండ్రు గ్రీసు దేసెమ్దికాన్.

2 తిమోతి వందిజ్ లున్త్రదు, ఇకొనియాదు నమ్మిత్తికార్ వాండ్రు గొప్ప పేరు మన్నికాన్, ఇజి పొగ్డితార్.

3 తిమోతిజ్ వన్నివెట ఒతెజ్ ఇజి పవులు ఆస ఆతండ్రె వన్నిజ్ సునతి కిబిస్తాన్. ఎందనిజ్ ఇహిజ వన్ని బుబ్బ ఆజ జాతిదికాన్ ఇజి అబ్బె మహి యూదురు విజేరె నెస్త మహార్.

4 వారు పట్టుమ్కాణిజ్ సొన్ని మహిజ్, యేసుప్రబుజ్ నమ్మిత్తికార్ ఎలాగ నడిదెజ్ ఇజి యెరూసలేమ్దు మన్ని అపొస్తరు, పెద్దెలుజు ఏర్పాటు కిత్తి ఆడ్రెజ్ బోదిస్తారె అక్సెజ్ లోజీదెజ్ ఇజి వెహ్తార్.

5 ఆహో నజమ్దు మన్నివరి నమకం లావు పిరితాద్. వరి లెక్క రోజు రోజు లావు ఆజి మహద్.

పవులు మసిదోనియ దేసెమ్ది వన్నిజ్ దర్ననమ్దు సుడేజినాన్

6 ఆసియ ప్రాంతమ్దు దేవుణు మాటెజ్ వెప్పిక ఆవిద్ ఇజి దేవుణు ఆత్మ వరిజ్ అడ్డు కిత్తిజ్ వారు ప్రుగియ, గలతీయ దేసెమ్కాణిజ్ సాహర్.

7 అయావలె ముసియ బెతనియ డగ్గు వాతారె బెతనియ సొండ్రెజ్ ఇజి సుడేతార్. గాని బాన్ సొండ్రెజ్ యేసుప్రబు ఆత్మ వరిజ్ సరి సివితాన్.

8 అందెజె వారు ముసియ ప్రాంతం డాట్టారె డిగు సమ్దరం డగ్గు మని త్రోయ ఇని పట్టుమ్దు సాహర్.

9 అయ పొదోయ్ పవులు, బాన్ మహిజ్, ఉండ్రీ దర్ననం సుడేతాన్. అక్క ఇనిక ఇహిజ మసిదోనియ దేసెమ్దికాన్ ఒరెన్ నిల్సి, “నీను మసిదోనియాదు వాజి మజి సాయం కిఅ”, ఇజి బతిమాలితి వజ దర్ననం సుడేతాన్.

10 పవులు అయా దర్ననం వాతిజ్, మాపు వెటనె మసిదోనియ సొండ్రెజ్ తయార్ ఆతాప్. ఎందనిజ్ ఇహిజ, మసిదోనియాది వరిజ్ దేవుణు సువార్త వెప్పి వందిజ్ దేవుణు మజి కూక్త మనాన్ ఇజి మాపు నెస్తాప్.

లుదియ యేసుప్రబుజ్ నమ్మిజినాద్

11 మాపు త్రోయ పట్టుమ్దాన్ ఓడః ఎక్టాపె తినాజ్ సమొత్త ఇని ద్విపుదు సాహప్. మహ్సా నాండిజ్ నెయపొలి ఇని పట్టుమ్దు అందితాప్.

12 అబ్బెణిజ్ పిలిప్పి ఇని పట్టుం వాతాప్. మసిదోనియ దేసెమ్దు పిలిప్పి పట్టుం ఉండ్రీ ముకెలమాతి పట్టుం. అక్క నండొండార్ రోమాదికార్ బత్తిజి మహి పట్టుం. మాపు నెగం రోస్కు ఆ పట్టుమ్దు మహప్.

13 విస్త్రాంతి దినమ్మదు మాపు పట్నం వెల్లి వాతాపె గడ్డ ఒడ్డు దరోట్ యూదురు పార్లనం కిని బాడ్డి మనాద్ను ఇజి వాతాప్. వాతిజ్, బాన్ బస్తాపె కూడేజి వాతి మహి అయ్లి కొడొకవెట పర్గిదెజ్ మొదొల్స్తాప్.

14 అయావలె లుదియ ఇని ఉండ్డి అయ్లి కొడొక వెంజి మహాద్. అది తుయతయ్ల పట్నమ్దికాద్. అది లావు దరది ఊద రంగుది పాతెజ్ పొర్నికాద్. అది దేవుణుదిజ్ పార్లనం కినికాద్. దేవుణు మాటెజ్ అర్థం కిదెజ్ దేవుణు బుద్ది సిత్తిజ్ అది పవులు వెప్తి మాటెజ్ మన్నుదు ఇడేతాదె అయావజనె నడితాద్.

15 అది, దన్ని ఇండ్రొణికార్, విజేరె బాప్తినం లాగె ఆతార్. వెనుక అది, “నాను దేవుణుదిజ్ పూర్తి నమ్మిజిన ఇజి మీరు ఒప్పుకొటిజ నా ఇండ్రొ వాజి మండ్రు”, ఇజి మజి బతిమాలితాద్.

పవులుజ్ సీలెజ్ జెలిలోఇ ఇడ్తార్

16 ఒర్వెండు మాపు పార్లనం కిని బాడ్డిదు సొన్ని మహిజ్ ఉండ్డి వెట్టిపణి కిని ఇజిరి అయ్లి మా ఎద్రు వాతాద్. దన్నిజ్ పుతొన్* ఇని దెయం అస్త మహాద్. అది జాతకం వెహ్ని దన్ని ఎజుమానురిజ్ నండొ డబ్బు గణపిస్తాద్.

17 అది పవులుని మజి వెనుక వాజి డటం గగోల్ ఆజి వెప్తాద్, “యా లోకుర్, విజెరిజ్ ఇంక పెరి దేవుణుదిజ్ సేవ కినికార్. దేవుణు ఎలాగ మిజి గెల్చిస్తానై ఇజి వీరు వెహ్నై” ఇహాద్.

18 నండొ రోస్కు అది ఆహె కిజి మహిజ్, పవులు మన్నుదు గొప్ప బాద ఆతండ్రె అయ దెయమ్దిజ్ “నీను యా ఇజిరి దన్నిజ్ డిసి సొన్అ ఇజి యేసుక్రీస్తు అతికారమ్దాన్ వెహసిన”, ఇజి వెప్తాన్. వెటనె అయ దెయం అయ్లిదిజ్ డిస్త సొహాద్.

19 గాని దన్ని ఎజుమానిరు వరిజ్ వాని డబ్బు విజు సొహె ఇజి సుడేతారె పవులు సీలెజ్ పట్నం నడిమి, అతికారిజ డగ్రు ఈడిసి తతార్.

* 16:16 16:16 పుతొన్ ఇని దెయం యా అయ్లిదిజ్ వాని కాలమ్దు జగ్గిని నజతిజవందిజ్ నెస్సిసి మహాద్. అక్క వెప్తిజ్ లోకుర్ దన్నిజ్ డబ్బు సీజి మహాద్

20-21 కోర్టు నడిపిసిని వరిబాన్ తత్తారె, “వీరు యూదురు. వీరు బోదిసిని అలవాటుజ్ మజ్జి పడెఱకెజ్. మాటు రోమాదికాట్. మాటు అక్కెజ్ ఒపుకొణిక ఆవిద్, అయావజనె నడినిక ఆవిద్. మా పట్టుమ్దు వీరు గొప్ప కలిబిలి కిజినార్”, ఇజి వెహ్సార్.

22 అయావలె బాన్ కూడితి మహి లోకుర్ విజేరె పవులుజ్ని, సీలెజ్ ఎద్రు వాతారె నింద మొహ్తారె గగోల్ ఆతార్. వరి సొక్కెజ్ లాగ్జి వరిజ్ డెయ్యు ఇజి కోర్టు నడిపిసినికార్ ఆడ్ర సితార్.

23 వారు లావు దెబ్బెజ్ డెయ్యూరె పవులు సీలెజ్ జెలి లొఇ ఇడ్తార్. “వరిజ్ జాగర్త సుడెదు”, ఇజి జేలి ఎజుమానిజ్ ఆడ్ర సితార్.

24 అయ ఆడ్ర వాతిజ్ జెలి ఎజుమాని వరిజ్ జేలిదు లొఇ మన్ని గదిదు వరి కాల్యాజ్ డుకేజు లొఇ తొహ్తాండ్రె ఇట్టాన్.

25 రమారమి మదరెయ్తు పవులుని సీల దేవుణుదిజ్ పార్లనం కిజి పాటెజ్ పార్లి మహార్. వీరు పార్జి మహిజ్ జెలిదు తొహె ఆతి మహికార్ విజేరె వెంజి మహార్.

26 అయావలె వెటనె బూమి విజు డటం కద్దితాదె అయ జేలి పునాదిజ్ విజు కద్దితె. వెటనె సేహ్లాజ్ విజు రే ఆతె. జెలిదు మహివరి విజెరి కట్టు ఊడితె.

27 అయ జేలి ఎజుమాని తెలి ఆతండ్రె జెలిది సేహ్లాజ్ విజు రే ఆతిమనిక సుడెతాన్. సుడెతండ్రె జెలిదు మహికార్ ఉహ్క సాహార్ ఇజి ఒడిబిజి కుర్ల లాగితండ్రె వన్నిజ్ వాండ్రె గుత్తె ఆజి సాదెజ్ తయార్ ఆతాన్.

28 అయావలె పవులు, “నీను ఇని కూనిబా కిబె ఆమ. మాప్ విజెపె ఇబ్బెనె మనాప్”, ఇజి డటం గగోల్ ఆజి వెహ్సార్.

29 అయ జేలి ఎజుమాని, దీవ తగ్అ ఇజి వెహ్సి లొఇ ఉహ్కీ వాతాండ్రె వణిక్కి పవులు సీలారి పాదమ్కాజ్ డగ్రు అర్తాన్.

30 వాండ్రు పవులుజ్ని సీలెజ్ వెల్లి తతాండ్రె వెన్బాతాన్, “బాబురాండ్రె, నాను తపై ఆదెజ్ ఇహిజు ఏలు ఇనిక కిదెజ్?”.

31 “యేసుప్రబు ముస్సు నమకం ఇట్టిజు, అయావలె నీను నీ ఇండ్రెణికార్ విజిదెరె తపై ఆనిదెర్”, ఇజి పవులు సీల వెహ్సార్.

32 పవులుని సీల వన్నిజ్, వన్ని ఇండ్రోణి వరిజ్ యేసుప్రభు వందిజ్ సువార్త వెహ్టార్.

33 ఆ పొదొయ్ అయా గడియూదునె వాండ్రు పవులుని సీలెజ్ ఒతాండ్రె వరి దెబ్బెజ్ నొహ్టాన్. వెటనె వాండ్రు, వన్ని ఇండ్రోణికార్ విజేరె బాప్తీసం లాగె ఆతార్.

34 వాండ్రు పవులుజ్ని సీలెజ్ వన్ని ఇండ్రో కూక్కి తసి బోజనం సిత్తాన్. దేవుణు ముస్సు నమకం ఇట్టి వందిజ్ వాండ్రు వన్ని ఇండ్రోణికార్ విజేరె నండొ సర్త ఆతార్.

35 పెందల కోర్టు నడిపిసినికార్, “అయ లోకాజ్ డి:స్తు”, ఇజి ఆడ్ర సిత్తారె జమాన్జ జెలి ఎజుమానిబాన్ పోక్తార్.

36 జేలి ఎజుమాని అయ మాటెజ్ పవులు వెహ్టాన్. “మిజి డి:స్తు ఇజి కోర్టు నడిపిసినికార్ ఆడ్ర పోక్త మనార్. మీరు ఏలు జమ్న సొండ్రు”, ఇజి వెహ్టాన్.

37 గాని పవులు, “మాపు వర్గిదెజ్ అవకాసం సిఎండ వారు తీర్పు కిజి విజేరె ముందాల డెయ్యూర్. మాపు రోమాదిజ్ అక్కు మనికాప్ ఇహిజ్బా మజి జెలిదు ఇట్టూర్. ఏలు మజి ఎయెర్బా నెన్ఏండ పోక్తెజ్ సుడోజినార్. మాపు ఒప్ఏప్. వారె వాజి మజి వెల్లి తసి పోక్తెజ్”, ఇజి జమానుజ్ వెహ్టాన్.

38 యా మాటెజ్ అయ జమానుజ్ కోర్టు నడిపిసిని వరిజ్ వెహ్టార్. పవులుని సీల రోమాదిజ్ అక్కు మనికార్ ఇజి వెహారె వారు తియెల్ ఆతార్.

39 అయ కోర్టు నడిపిసినికార్ వాతారె పవులుజ్, సీలెజ్ సెమ లొస్తారె జెలిదాన్ వెల్లి కూక్కి తత్తారె ‘పట్టుం డి:ని సొండ్రు’ ఇజి వరిజ్ వెహ్టాన్ పోక్తార్.

40 వారు జెలిదాన్ వెల్లి వాతారె లుదియబాన్ సొహార్. అబ్బె నమ్మిత్తివరి వెట వర్గిజి వరిజ్ ఆదరిస్తారె వరి నమకందిజ్ నత్తు కిబిసి దయ్ రమ్ ముస్సు మండ్రు ఇజి వెహ్టార్. వెనుక వారు బాణిజ్ సొత్త సొహార్.

17

పవులు తెసలొనికదు సొహాన్

1 అయావలె పవులుని సీల పిలిప్పి పట్టుమ్దాన్ సొత్తారె అంపిపొలి, అపొలోనియ పట్టుమ్కు డాట్టి దెసలొనిక* ఇని పట్టుమ్దు వాతార్. అబ్బె యూదురు మీటిజ్ కిని ఇల్లు ఉండ్రి మహాద్.

2 పవులు, వాండ్రు ఒజ ఆతి లెకెండ్ యూదురి మీటిజ్ కిని ఇండ్రో సొహాన్. సొహాండ్రె, బానె మహి వరివెట మూండ్రి విస్త్రాంతి దినమ్కు దేవుణు మాట వెప్పిమహాన్. ఇనిక ఇహిజ,

3 “క్రీస్తు ఇనికాన్ మాలెజ్ ఆజి సానాన్లె. సాజి మర్జి నిజ్నాన్లె’ ఇజి ప్రవక్తరు రాస్తిక దేవుణు మాటాదు మనాద్. అయ లెకెండ్ జర్గిదెజె. నాను మీ వెట సాటిసి వెప్పి యా యేసుప్రబునె క్రీస్తు”. యా మాటెజాణిజ్ సదివిజి వెప్పి సిత్తాన్.

4 యూదురు - లొఇహాన్ సెగొండార్ పవులు వెప్తి మాటెజ్ ఒప్పకొటారె పవులుని సీల వెట కూడితార్. బక్తి మన్ని గ్రీకు జాతిదికార్ నండొండార్, ముకెలమాతి అయ్లికొడొక్ నండొండెక్బా వరివెట కూడితార్.

5 అహిజ యూదురు గోస ఆతార్. గోస ఆతారె ఇని పణి సిల్లెండ తిరిగిని సెఇ లొకాజ్ సర్దుహాన్ కూడుఃవ్తారె మందెజ్ ఆజి పట్టుమ్దు కలిబిలి కిజి యాసొను ఇని వన్ని ఇండ్రో సొహార్. ఇండ్రోణి సేప్లాదిజ్ డెయ్త పొక్తారె పవులుని సీలెజ్ లొకుర్ నడిమి అసి తనాట్ ఇజి లొఇ డుఃగితార్.

6 గాని పవులుజ్ని సీలెజ్ తోర్వెతార్కాక యాసొనుజ్ మరి నమ్మితి వరిజ్ సెగొండొంజ్ పట్టుం అతికారిజు డగ్రు లాగిత తతార్. “వీరు, యా లొకం విజు కలిబిలి కినికార్, ఇబ్బెబా వాత మనార్.

* 17:1 17:1 దెసలొనిక పట్టుం మసిదోనియ దెసమ్దు మహాద్. రోమదెసమ్దిజ్ రాజదాని ఆతాద్ యా పట్టుం. నండొ ఆస్తి మహాద్ బాన్. నండొండార్ రోమ లొకుర్ని యూదురు బాన్ బత్తిజి మహార్

7 విరిజ్ యా యాసాను వన్ని ఇండ్రో ఇట్టా మహాన్. వీరు విజేరె యేసు ఇజి మరి ఒరెన్ రాజు మనాన్ ఇజి వెప్పి కయ్సరు రూలుజు లోజీవండ నడిసినాన్”, ఇజి డటం గగోలాజి వెహ్టార్.

8 యాక వెహారె లోకుర్, పట్టుం అతికారిజు గొప్ప కలిబిలి ఆతార్.

9 అతికారిజు యాసాను బాణిజ్, అయ నమ్మిత్తి వరి బాణిజ్ డబ్బు తొప్పిస్తారె వరిజ్ డి:స్త సితార్.

పవులు బెరెయాదు సాహాన్

10 సికటి ఆతిజ్ వెటనె నమ్మితికార్ పవులుజ్, సీలెజ్ బెరెయ ఇని బాడ్డిదు పోక్తార్. వారు బానె వాతారె యూదురు మీటిజ్ కిని ఇండ్రో సాహాన్.

11 బెరెయాదు ముహికార్ తెసలోనికదు మహి వరిలెక్కెండ్ర ఆవర్. వారు గొప్ప ఆసదాన్ దేవుణు మాటెజ్ వెహారె వనక వందిజ్ ఒడిబిజి మహాన్. పవులుని సీల వెప్పి మహి సజతిజ్ నిజమనెనో ఆవీదో ఇజి వారు రోజు దేవుణు మాటాదు సుడఃజి సదివిజి మహాన్.

12 అందెజె వరి లోఇ నండెండార్ యూదురు నమ్మితార్. నండెండార్ గ్రీసు జాతిది వరి లోఇ పల్కుబడిః మన్ని అయ్లీ కొడొకిని మొగకొడొకి నమ్మితార్.

13 గాని బెరెయాదుబా పవులు దేవుణు మాటెజ్ సాటిసినాన్ ఇజి తెసలోనికదు మన్ని యూదురు నెస్తారె బాణిజ్ వాతారె బెరెయా లోకాజ్ కోపం పుటిస్తారె కలిబిలి కిత్తార్.

14 అయావలె నమ్మితికార్ పవులుజ్ వెటనె సమ్దరం డగ్రు సాన్అ ఇజి పోక్తార్. గాని సీలని, తిమోతి బెరెయాదునె నిహ మహాన్.

15 పవులుజ్ పోక్తెజ్ సాహికార్ ఏదెన్ను† పట్టుమ్దాకానె ఒతార్. సీల, తిమోతి వెటనె నా బాన్ రద్దు ఇజి కబ్బు సితంత్రె పవులు వరిజ్ మప్పి పోక్తాన్.

పవులు ఏదెన్ను పట్టుమ్దు సాహాన్

† 17:15 17:15 ఏలు ఏదెన్ను పట్టుం గ్రీకు దేసెమ్ది ముకెలమాతి పట్టుం

16 పవులు ఏదెన్ను పట్టుమ్దు సీలెజ్ తిమోతిజ్ ఎద్రు సుడేజి మహాన్. మహిజ్ అయ పట్టుమ్దు వారు మాడిస్తి మహి దెయమ్కాణి బొమ్మెజ్ †నండో మహిజ్ అక్కెజ్ సుడేజి మన్నుదు నండో బాద ఆతాన్.

17 అయావలె యూదురు మీటిజ్ కిని ఇండ్రో సాహండ్రె యూదురు వెట, బక్తి మన్ని యూదురు ఆఇ వరివెట పవులు వాదిస్తాన్. రోజు రోజు సత సహ్క కూడేజి వాతి వరివెట వాదిసి మహాన్.

18 అబ్బె లావు సద్వితి మన్నికార్ ఎపికూరియ జటుదికార్ సెగొండార్⁹ స్టాయికుల లోకుర్ లొఇ సెగొండార్ మహార్. వారు పవులు వెట వాదిస్తార్. సెగొండార్, యా బడాకి ఇనిక వెహ్నినాన్ ఇజి వెహ్నార్. యేసుప్రబు వందిజ్, సాతికార్ మర్జి నిజ్ని వందిజ్ పవులు నెస్పిస్తిజ్ అబ్బె మరి సెగొండార్ వీండ్రు ఆఇ దెయమ్కాజ్ వందిజ్ వెహ్నినాన్ ఇజి వెహ్నార్.

19 వారు పవులు అరెయొపగు ఇని సద్దుదు లాగిత తత్తారె, “నీను వెహ్నిని యా కొత్త మాట ఎలాగ మర్తికాదో, మాపుబా నెస్టెజ్ ఆనాదా?

20 నీను సెగం కొత్త మాటెజ్ వెహ్నిని. అక్కెజ్ మాపు ఎనెజ్బా వెన్ఇకెజ్. వన్నా అర్దం ఇనికాదో ఇజి నెస్టెజ్ మాపు కోరిజినాప్”, ఇజి వెహ్నార్.

21 ఆ ఏదెన్ను పట్టుమ్దికార్ విజేరె, అబ్బె బత్కిజి మహి ఏదెన్ను పట్టుమ్దికార్ ఆఇకార్బా ఇనికాదో ఉండ్రీ కొత్త మాట విని వందిజ్, వర్గిని వందిజ్ లావు ఇస్థమాజి వరి సమయం విజు బానె గడేప్పి మహార్.

22 అయావలె పవులు అరెయొపగు సద్దుదు నిహండ్రె ఈహు వెహ్నాన్, “ఏదెన్ను పట్టుమ్దికిదెరా, మీరు విజు పణిజి లొఇ గొప్ప బక్తి

† 17:16 17:16 యా బొమ్మెజ్ అయ పట్టుమ్దికార్ మాడిస్తిమహి దెయమ్కలెకెండ తోరితె

§ 17:18 17:18 ఎపికూరియ లోకుర్, స్టాయికుల లోకుర్. వీరు గ్రీకుజాతిలొఇ ఎక్కు సద్వితి లోకుర్. ఎపికూరియ లోకుర్ ఎపికురు ఇని ఒరెన్వన్ని బోదెజ్ వజ నడినికార్. వన్ని బోద ఇనిక ఇహిజ, ఒడోల్దిజ్ మన్నుదిజ్ సర్ద కిబిసి బత్కిదెజ్ ఇజి మా బత్కుది ఉదెనం ఇజి. స్టాయికుల లోకుర్ ఇహిజ జెనొ ఇనివన్ని బోదెజ్ వజ నడినికార్. బత్కుదు ఇనిక జర్గితిజ్బా జర్గిపిదీ ఇజి వాండ్రు బోదిస్తాన్. బాగ ఆలోసనం కిజినె వారు విజు సూణార్

మన్నికిదెర్ ఇజి నజి తోరిజినాద్.

23 ఎందనిజ్ ఇహిజ నాను బూలాజి బూలాజి మీ బొమ్మెజు నెగ్రిండ సుడొజి మహిజ్ ఉండ్రీ మాలి పీట సుడొత. దన్ని ముస్సు, 'నెన్ ఇ దెయమ్ దిజ్' ఇజి రాస్త మనాద్. అందెజె మీరు నెన్ ఏండ ఇని దన్నిజ్ మాడిసినిదెరో దన్ని వందిజ్ నాను మిజి బొదిసిన", ఇజి వెప్తాన్.

24 పవులు మరి వెప్తాన్, "యా బూ లోకమ్ దిజ్, దన్ని లోఇ మన్ని విజువ నకాజ్, దేవుణునె పుటిస్తాన్. అయ దేవుణునె పరలోకమ్ దిజ్, బూమిదిజ్ ప్రబు ఆత మనాన్. అయ దేవుణు లోకు తొప్తా గుడిడు బత్తిఎన్.

25 దేవుణునె విజు లోకాజ్ బత్తు, పాణం, విజు సీజినాన్. దేవుణుదిజ్ ఇనికబా తక్కు ఆవిండ మన్ ఎద్. అందెజె లోకు వన్నిజ్ ఇనికబా సిదెజ్ అవ్ సరం సిల్లెద్.

26 దేవుణు ఒరెన్ వన్ని వెట విజు జాతి లోకాజ్ పుటిస్తాన్. ఎందనిజ్ ఇహిజ యా బూలోకం ముస్సు విజుబాన్ బత్తిని వందిజ్ పుటిస్తాన్. వారు ఎంబె బత్తిదెజ్ ఇజి, ఎమేణి కాలమ్ దు బత్తిదెజ్ ఇజి దేవుణు ముందాల్నె ఏర్ పాటు కిత మనాన్.

27 ఎందనిజ్ ఇహిజ ఉండ్రీ వేలా వారు నజి రెబాజి వానార్పు ఇజి ఇక్సెజ్ విజు దేవుణు ఏర్ పాటు కితాన్. దేవుణు మా డగ్రుహాన్ దూరం మంజినికాన్ ఆవ్.

28 మాటు దేవుణు వెటనె బత్తినాట్, దేవుణు వెటనె నడిసినాట్, దేవుణు వెటనె మంజినాట్. మీ లోఇ పాటెజ్ రాస్సికార్ వెప్తావజ 'మాటు దేవుణు కొడొరె'.

29 అందెజె మాటు దేవుణు కొడొర్ ఆతిజ్, లోకు, వరి మన్నుదు మన్ని ఆలోసనం వజ, వారు నెస్తిమన్ని పణి వజ బజారమ్ దాన్, వెండిదాన్, పణుకుజాణ్ తయార్ కిత బొమ్మెజు వజ దేవుణు మనాన్ ఇజి ఒడిబిదిజ్ ఆవ్.

30 నస్తవలె మాటు నెన్ ఏండ మహివలె దేవుణు అక్కు సుడొతిజ్ బా సుడొఇ లెకెండ డిస్తాన్. ఏలు ఇహిజ ఎంబెబా సరినె, విజేరె

లోకుర్ వరి పాపమ్కు డిఃసిసీజి దేవుణుబాన్ రద్దు ఇజి దేవుణు ఆడ్ర సీజినాన్.

31 ఎందనిజ్ ఇహిజ, దేవుణు విజేరె లోకాజ్ నీతినిజయ్దాన్ తీర్పు కిదెజ్ ఉండ్రీ రోజు ఏర్పాటు కిత మనాన్. అయా రోజు దేవుణు ఏర్పాటు కిత్తి ఒరెన్ లోకువెట తీర్పు తీరిస్సాన్. దేవుణు ఆ లోకుదిజ్ సావుదాన్ మర్జి నిక్త మనాన్. ఎందనిజ్ నిక్తాన్ ఇహిజ ఆ లోకుదిజ్ తీర్పు కిదెజ్ అతికారం మనాద్ ఇజి విజేరిజ్ రుజుప్ కిదెజ్”.

32 లోకు సాజి మర్జి నిజ్ని వందెజ్ వెహారె వరి లోఇ సెగొండార్ కరాయితార్. గాని మరి సెగొండార్ “దిన్ని వందెజ్ మరి వెహాఅ, వెనాప్”, ఇజి పవులుజ్ వెహార్.

33 ఆహె మహిజ్ పవులు పరిబాణిజ్ సాహాన్.

34 అహిజ సెగొండార్ పవులు వెహ్తా మాటెజ్ నమ్మిత్తారె వన్ని వెట కూడితార్. పవులు వెట కూడితి మహి వరి లోఇ అరెయొపగు సద్దుదికాన్ ఒరెన్ దియెనుసియు, దమరి ఇని ఉండ్రీ అయ్లి కొడోః, మరి సెగొండార్ మహార్.

18

పవులు కొరింతు పట్నమ్దు సువార్త వెహ్సినాన్

1 వెనుక, పవులు ఏదెన్పు పట్నమ్దాన్ సొతాండ్రె కొరింతు ఇని పట్నం సాహాన్. అయ కొరింతు పట్నమ్దు సాహిజ్ బానె పొంతు దేసెమ్దికాన్ అక్కుల ఇని ఒరెన్ యూదు వన్నిజ్ని వన్ని ఆల్ని ఆతి ప్రిస్కిలదిజ్ సుడోతాన్.

2 యూదురు విజేరె రోమ పట్నం డిఃసి సొండ్రెజ్వలె ఇజి క్లవుదియ ఇని రోమ పెరిరాజు ఆడ్ర సితాన్. ఆడ్ర సిత్తిజ్ యా ఆల్ని మాసిర్ ఇటలి దేసెం డిఃస్తారె కొరింతు పట్నమ్దు కొత్తాజ్ వాతార్. పవులు వరిజ్ సుడోదెజ్ సాహాన్.

3 పవులు వరివెట బత్తిజి వరివెట కూడోజి పణి కితాన్. ఎందనిజ్ ఇహిజ వారుని పవులు టంబుజ్ గుత్తికార్.

4 ప్రతి విస్త్రాంతి దినమ్దు పవులు యూదురు మీటిజ్ కిని ఇండ్రో సోహండ్రె, యూదురు వెట, గ్రీసు వరివెట తర్కిసి వెప్పి వాండ్రు వెప్టాకెజ్ నిజం ఇజి ఒపిసి మహాన్.

5 సీలని తిమోతి మసిదోనియదాన్ వాతారె పవులు వెట కూడితార్. అయావలె పవులు పూర్తి టయం దేవుణు మాటెజ్ బోదిసి మహాన్. యేసునె క్రీస్తు ఇజి యూదురుజు డటిసి సోసి వెప్పి మహాన్.

6 పవులు వెప్టా మాటెజ్ యూదురు నెక్కపొక్తారె పవులుజ్ దుసలాడితార్. అయావలె పవులు, “దేవుణు మిజీ సిక్ససిత్తిజు ఆక్కు మీరె మీ ముస్కు తపిసినిదెర్. దిన్ని వందిజ్ నా బాన్ తప్పు సిల్లెద్. ఇబ్బెహాన్ నాను యూదురు ఆఇ వరిబాన్ సోనానె దేవుణు మాటెజ్ నెప్పిస్తాలె”, ఇజి వెప్టాండ్రె, సొక్కెజు దూల్లి దుల్ఫ్రాన్.

7 పవులు యూదురు మీటిజ్ కిని ఇండ్రోహాన్ సోత్తాండ్రె పడకాద్ మహి తీతియు యూస్తు ఇని వన్ని ఇండ్రో సోహాన్. తీతియు దేవుణుదిజ్ పార్దనం కినికాన్. వన్ని ఇల్లు యూదురు మీటిజ్ కిని ఇల్లు డగ్రునె మహాద్.

8 యూదురి మీటిజ్ ఇల్లు నడిపిసినికాన్ ఆతి క్రీస్తును, వన్ని ఇండ్రోణికార్ విజేరె యేసుప్రబుజ్ నమ్మితార్. మరి కొరింతు పట్టుమ్దికార్ నండొండార్బా దేవుణు మాట వెహారె నమ్మితారె బాప్తీసం లాగె ఆతార్.

9 ఒర్నెండ్ర పొదొయ్, దర్సనమ్దు యేసుప్రబు, “నీను తియెల్ ఆవిండ వర్గిఅ. అలెజి మన్అ.

10 ఎండనిజ్ ఇహిజు నాను నీవెటనె ముంజిన. నిజీ పాడు క్రిదెజ్ నీ ముస్కు ఎయెన్బా రెవన్. ఎండనిజ్ ఇహిజు యా పట్టుమ్దు నాలోకుర్ నండొండార్ మనార్”, ఇజి పవులుజ్ వెప్టోన్.

11 అందెజె పవులు దేవుణు మాటెజ్ నెప్పిసి వరి నడిమి ఉండ్రీ ఏండుని ఆరు నెలెజ్ దాక మహాన్.

12 గ్రాని గలియోను ఇనికాన్ అయ అకాయ దేసెమ్దిజ్ ఏలుబడి: కినికాన్ ఆతివలె యూదురు ఉండ్రె జటు ఆతారె పవులు ముస్కు వాతార్. పవులుజ్ అస్తారె కోర్డుదు ఒతార్.

13 వారు పవులు మున్ను పిరాద్ కిత్తార్. ఇనిక ఇహిజ, “దేవుణుదిజ్ ఎలాగ పార్లనం కిదెజ్ ఇజి మజి మన్ని రూలుదిజ్ ఎదిరిసివెప్పి వీండ్రు ఒపిసి మారిన్నిలెకెండ్ వెప్పినాన్”

14 పవులు వర్గిదెజ్ సుడఃతాన్. అయావలె గలియోను యూదురిజ్ ఈహు వెప్తాన్, “యూదురాండె, ఇక్క ఉండ్రీ తప్పు పణి వందిజ్ ఇహిజ, ఉండ్రీ నెఇ పణి వందిజ్ ఇహిజ నాను మీమాటెజ్ నెగ్రెండ వెండ్రెజ్ ఆనాద్.

15 గాని ఇక్క ఇనికాదొ ఉండ్రీ మాటవందిజ్, పేర్కువందిజ్, మీ రూలుజ్ వందిజ్ తర్కిస్తెజ్ ఇహిజ మీరె పన్నిజ్ సుడఃదు. నిన్ని సజతిజ వందిజ్ తీర్పు తీరిస్తెజ్ నజి ఇస్టం సిల్లెద్”, ఇజి యూదురు వెట వెప్తాన్.

16 ఈహు వెప్తాండ్రె వరిజ్ కోర్టుదాన్ పేర్తాన్.

17 అయావలె విజేరె కూడితారె యూదురి మీటిజ్ ఇల్లు నడిపిసినికాన్ ఆతి సొస్తానేను ఇనివన్నిజ్ అస్తారె కోర్టు డగ్రు తత్తారె డెయ్యార్. అహిజ్బా గలియోను యా సజతిజ వందిజ్ ఇనికబా ఇన్వెతాన్.

ప్రిస్కిలని అక్కుల

18 పవులు దేవుణువెట మొకిత మహాన్కాక అక్క వీస్తివలె బుర్ర కత్తె ఆతాన్. కొరింతు పట్టమదు మరి నండొ రోస్కు మంజి వెనుక నమ్మిత్తివరిబాణిజ్ సెలవ లొస్తాండ్రె సొహాన్. కెంకెయూదు సొహారె బుర్ర కత్తె ఆతాన్. బాణిజ్ ఒడః ఎక్కాండ్రె సిరియ ఇని దేసెమ్దిజ్ ప్రిస్కిల, అక్కుల వెట సొహాన్.

19 వారు ఎపెసు పట్టమదు వాతార్. ప్రిస్కిల అకులరిజ్ డిసి పవులు సొనివలె వీరు యా పట్టమదునె మంజినార్. పవులు ఇహిజ ఒరెండ్రె బానె మహి యూదురి మీటిజ్ ఇండ్రొ సొహాన్. సొహాండ్రె యూదురు వెట తర్కిసి వర్గిజి మహాన్.

20 నెగం రోస్కు మా వెట మన్అ ఇజి యూదురు పవులు వెన్బాతిజ్ పవులు కెవెతాన్.

21 వరిజ్ డిఃసి సొహివలె, “దేవుణు ఇన్ఱం ఇహిజ మీ డగ్రు మర్జి వాన”, ఇజి వెప్తాండ్రె సోత్తాన్. ఓడః ఎక్తాండ్రె ఎపెసుదాన్ సొహాన్.

22 కయ్సరియాదు అందితాండ్రె పవులు యెరూసలేం పట్నమ్దు ఎక్త సొహాన్. బానె మహి సజమ్దివరిజ్ సుడిః సొహాన్. వెనుక అంతియొకయాదు సొహాన్.

23 బానె సెగం కాలం మహి వెనుక సోతాండ్రె గలతియ పుగియ ఇని దేసమ్కాణిజ్ వర్చ బూలాతాండ్రె నమ్మితి వరిజ్ నెస్పిస్తాన్. దేవుణుదిజ్ డిఃన్విండ నెగ్రెండ మండ్రు ఇజి వెహ్ని వరిజ్ దయ్ఱం సిత్తాన్.

అపొలో ఇనికాన్

24 అయావలె అలక్సంత్రియదికాన్ అపొలో ఇని ఒరెన్ యూదవాండ్రు ఎపెసు పట్నమ్దు వాతాన్. వాండ్రు గొప్పు సద్వితికాన్. దేవుణు మాటదు రాస్తిమన్నికెజ్ విజు బాగ నెస్తిమనికాన్. దేవుణు మాట నెగ్రెండ వర్గిదెజ్ వాండ్రు అట్నాన్.

25 వాండ్రు యేసు ప్రబువందిజ్ నెగ్రెండ సుర్కుదాన్ నెన్పిస్తాన్. ఎలాగ బత్తిదెజ్ ఇజి యేసుప్రబు నెన్పిస్తి మాటెజ్ వాండ్రు నెస్తిన్. గాని యోహాను లోకాజ్ సిత్తి బాప్తిసం వందిజె వాండ్రు నెస్తి మహాన్.

26 యూదురు మీటిజ్ కిని ఇండ్రె దయ్ఱమ్దాన్ దేవుణు మాటెజ్ వర్గితాన్. ప్రిస్కిల అక్కుల విన్ని మాటెజ్ వెహారె విన్నిజ్ వరి ఇండ్రె కూక్త ఒత్తార్. ఒత్తారె దేవుణు వరిజ్ సిత్తి సువార్త వందిజ్ విండ్రు నెన్ఇ వనకవందిజ్ వన్నిజ్ నెన్పిస్తార్.

27 వెనుక అపొలో అకాయ దేసమ్దు సాండ్రెజ్ సుడఃతిజ్, ఎపెసుదు మన్ని నమ్మితికార్, నీను సాన్అ ఇజి వెహ్ని, అక్కాయాదు మహి నమ్మితివరిజ్, ‘విన్నిజ్ మీ వెట కూడుఃప్పు’ ఇజి ఉత్తం రాస్తార్. వాండ్రు అబ్బె సొహాండ్రె దేవుణు దయాదర్మమ్దాన్ నమ్మితి వరిజ్ నండొ సాయం కిత్తాన్.

28 విజేరె కూడిఃతి మహి బాడ్డిదు అపొలో యూదురువెట వాదిస్తాండ్రె వరి వాదం తప్పు ఇజి గటిజ వెప్తాన్. యేసునె క్రిస్తు ఇజి దేవుణు మాటదు రాస్తికెజ్ వెహ్ని రుజుప్ కిత్తాన్.

19

పవులు ఎపెసు పట్టమీదు యేసువందిజ్ వెప్పినాన్

1 అపొలో కొరింతు పట్టమీదు మహివలె పవులు, ముస్కుమన్ని దేసెమ్ది నాహ్కాణిజ్ బూలాజి సువార్త వెప్పి ఎపెసు పట్టమీదు వాతాన్. బాన్ సెగొండార్ సిసూరిజ్ నుడేతాన్.

2 “మీరు నమ్మిత్తివలె దేవుణు ఆత్మ సత్తు మీ ముస్కు వాతాదా సిల్లెదా?”, ఇజి వరిజ్ వెన్బాతాన్. వెన్బాతిజ్ సిల్లెద్, దేవుణు ఆత్మ మనాద్ ఇజి మాప్ ఎసెజ్బా నెన్ఏప్”, ఇజి వారు వెహ్తార్.

3 దన్నిజ్ పవులు, “మీరు ఎమేణి బాప్తినం లాగె ఆతిదెర్”, ఇజి వెన్బాతిజ్, “మాపు యోహాను సిత్తినన్ని బాప్తినం లాగె ఆతాప్” ఇహ్తార్.

4 పవులు మరి వెహ్తాన్, “పాపమ్కు ఒప్పుకోడేజి డిసివరిజె యోహాను బాప్తినం సిత్తాన్. నా వెనుక వాని యేసు ముస్కు నమకం ఇడదు”, ఇజి వెహ్తాండ్ర బాప్తినం సిత్తాన్.

5 యాక వెహ్తె వారు యేసుప్రబు పేరు అస్తారె బాప్తినం లాగె ఆతార్.

6 పవులు వరి ముస్కు కికు ఇడ్డిజ్ దేవుణు ఆత్మ వరి ముస్కు వాతాద్. వాతిజ్, వారు వరిజ్ నెన్ఇ ఆఇ బాసెజ్ వర్గితార్. దేవుణుబాణిజ్ వాతి మాటెజ్ వెహ్తాజ్ మొదొల్స్తార్.

7 వారు డగ్రుడగ్రు పన్నెండు మణిసిర్ మొగకొడెర్ మహ్తార్.

8 పవులు అయ ఎపెసు పట్టమీదు మన్ని యూదురి మీటిజ్ ఇండ్రొ సొహండ్రె దేవుణు ఏలుబడిః వందిజ్ తర్కిసి వర్గిజి వరిజ్ ఒపుకొడిసి దయ్ఠమదాన్ వర్గితాన్. ఆహె మూండ్రె నెలెజ్ బాన్ మహ్తాన్.

9 గాని సెగొండార్ గర్త ఆజి అసల నమ్మివ్తార్. వారు పవులు వెప్తా సువార్త వందిజ్ విజెరి ముందాల దుసలాడిఃజి వర్గితార్. అందెజె పవులు వరిజ్ డిసి నమ్మిత్తి వరిజ్ వన్నివెట ఒతండ్రె రోజు రోజు తురాను ఇని ఒరెన్ వన్ని బడిః ఇండ్రొ నెస్పిస్త మహ్తాన్.

10 రుండి పంటిజ్ దాక పవులు యాలెకెండ్ వెహ్నిసిత్తిమహిజ్ అయ ఆసియ ప్రాంతమ్దు బత్తిజని యూదురు, యూదురు ఆఇకార్, విజేరె దేవుణు మాట వెహార్.

11 దేవుణు పవులువెట ఒద్దె గొప్ప బమ్మాతి పణిజ్ జర్గిస్తాన్.

12 వన్ని తువాలిజ్, నడుఃముదు తొప్పి కటు జబ్బు మన్నివరి డగ్రు తత్తిజ్ వారు నెగెండ ఆతార్. దెయమ్కు విజు డిస్తె సొహె.

13 అయావలె యూదురు లొఇ సెగెండార్ మోటిగురుజ్ బూలాజి దెయమ్కాజ్ పేర్జి మహార్. దెయమ్కాజ్ పేర్జెజ్ నెస్తికార్ వారు. వారు యేసుప్రబు పేరు అసి దెయమ్కాజ్ పేర్జెజ్ సుడెఃతార్. “పవులు వెహ్ని యేసు సత్తుదాన్ వెహ్నిన, నీను విన్నిజ్ డిసిసి సొన్అ ఇజి నాను ఆడ్ర సీజిన”, ఇజి వారు దెయమ్కాజ్ అస్తి వరిజ్ వెహ్ని మహార్.

14 స్కెవ ఇని ఒరెన్ యూదపెరిపుజేరి మరిసిర్ ఏడుగురు యాలెకెండ్ దెయమ్కాజ్ పేర్దెజ్ సుడెఃజి మహార్.

15 గాని ఆ దెయం వరివెట, “నాను యేసుజ్ నెస్సా, పవులు నెసిన్, గాని మీరు ఎయిదెర్?” ఇజి వెన్బాతాన్.

16 అయ దెయం అస్తిమహికాన్ వరిముస్కు ఎగ్రితాండ్రె విజెరిజ్ అడిఃగి అర్ప్తాండ్రె గెలిస్తాన్. వరి పాతెజ్ కిస్త విసిర్తాండ్రె గొప్ప దెబ్బెజ్ డెయ్తాన్. అందెజె వారు ఏడుగురు లోకుర్ డుమ్డ ఆతారె దెబ్బెజ్ తాక్తిజ్ అయ ఇండ్రొణిజ్ సొత్తారె ఉహ్కార్.

17 అయ ఎపెసు పట్టమ్దు మహి విజేరె యూదురు, యూదురు ఆఇ జాతిదికార్ యాక వెహరె గొప్ప తియెలాతార్. యేసుప్రబు పేరుదిజ్ గొప్ప గవరం సిత్తార్.

18 కొత్తజ్ నమ్మితికార్ నండొండార్ వాతారె వారు కిత్తి సెఇ పణిజ్ విజు విజెరి ముందాల వెహ్తారె ఒప్పుకొటార్.

19 కొత్తజ్ నమ్మితి సెట్టిపణికినికార్ నండొండార్ మంత్రమ్కు రాస్తిమని వరి పుస్తకమ్కు తత్తారె విజెరి ముందాల అక్కెజ్ సుర్తార్. వారు లెక్క సుడెఃతిజ్ వనక దర యబాయ్ వెయిజ్ వెండిరుపాయిజ్ *వాతె.

* 19:19 19:19 ఉండ్రె వెండి రుపాయి ఉండ్రె రోజుది కూలి

20 ఈవో దేవుణు - మాట విజుబాన్ సాటె ఆతాదె నండొండార్ నమ్మితికార్ ఆతార్.

21 ఇక్కెజ్ విజు జర్గితి వెనుక పవులు మసిదోనియ అకాయ ఇని దేసమ్కాజ్ సొన్ని దేవుణు సజమ్కాజ్ సుడిః సొన్ని వెనుక బాణిజ్ యెరూసలేం పట్నమ్దుబా సొండ్రెజ్వలె ఇజి ఒడిఃఒడిఃబితాన్. వెనుక రోమ పట్నమ్దుబా సొండ్రెజ్వలె ఇజి ఒడిఃబితాన్.

22 వన్నివెట కూడఃజి పణి కిజిమహి తిమోతి, ఎరాస్తూ ఇనివరిజ్ మసిదోనియాదు పొక్తాండ్రె పవులు సెగం కాలం ఆసియ ప్రాంతమ్దు బత్తితాన్.

ఎపెసు పట్నమ్దు గొడఃబ జర్గితాద్

23 అయ కాలమ్దు యేసుప్రబు ముస్సు లోకుర్ నమకం ఇట్టి వందిజ్ ఉండ్రె గొప్ప గొడఃబ వాతాద్.

24 ఇక్క ఎలాగ ఇహిజ, దెమెత్రి ఇని ఒరెన్ సరాబు మహాన్. వాండ్రు వెండిదాన్ అర్తెమి ఇని దెయమ్దిజ్ ఇండ్రొ ఇడ్ని ఇజిరి గుడిఃజ్† తయార్ కినికాన్. యా దెమెత్రిజ్, వన్నివెట మహి సరాబురిజ్ విజెరిజ్ యా పణిదాన్ నండొ లాబం దోహాక్కి మహాద్.

25 యా దెమెత్రి యా పణికినివరిజ్ని, వరిలెకెండ్ర్ ఆఇపణిజ్ కిని వరిజ్బా కూడుఃప్రాండ్రె ఈహు వెహ్లాన్, “బాబురాండ్రె, యా పణిదానె ఎక్కు ఆస్తి మజి వానాద్ ఇజి మీరు నెసినిదెర్గదె.

26 గాని కికాణిజ్ తయార్ కినికెజ్ దెయమ్కు ఆఉ ఇజి యా పవులు వెహ్ని, ఎపెసు పట్నమ్దు ఉండ్రె ఆవద్, ఆసియ ప్రాంతమ్దు విజుబాణిలెకెండ్ర్ నండొండారిజ్ నమ్మిసి మహ్లాన్. ఇక మీరు సుడఃజినిదెర్. వెంజినిదెర్.

27 ఏలు గొప్ప ప్రమాదం ఆజినాద్. మా పణి వందిజ్ మన్ని నెగ్గి పేరు పాడాఃనాద్దె. అక్కాదె ఆవండ్రె పెరి దెయమాతి యా అర్తెమి దెయమ్ది గుడిఃబా ఎయెరిజ్బా అవ్సరం సిల్లెండ్ర ఆనాద్. ఆసియ దేసెమ్దికార్

† 19:24 19:24 ఇజిరి గుడిజ్ ఇహిజ అర్తెమి దెయమ్ది గుడిఃది ఇజిరి బొమ్మెజ్

విజేరె, బూలోకం విజు పూజ కిని యా అర్తెమి దెయమ్మది గొప్ప పేరు సిల్లెండ ఆనాద్లె”, ఇజి యా దెమెత్రి వరివెట వెహ్లాన్.

28 యాక వెహారె వారు గొప్ప కోపం ఆతారె, “ఎపెసుదికార్ పూజకిని అర్తెమి దెయం గొప్ప పెరి దెయం”, ఇజి గొప్ప గగోల్ ఆతారె.

29 అయ పట్నమ్మదు గొప్ప కలిబిలి ఆతాద్. వారు ఉండ్రె మన్ను ఆతారె పవులువెట బూలాజి మహి మసిదోని - యాదికార్ గాయి, అరిస్తర్కు ఇని రిపిరిజ్ అస్తారె అయ పట్నమ్మదు మన్ని పెరి సద్దుదు[‡] లాగిత ఒతారె.

30 మంద కూడితి మహి అయ సద్దుదు సొండ్రెజ్ ఇజి పవులు బడిబడిబితాన్. గాని నమ్మితికార్ వన్నిజ్ సరి సివితారె.

31 పవులు కూలయెర్ ఆతి అయ ఆసియ ప్రాంతమ్మది అతికారి లోకుర్ సెగొండార్బా లోకుర్ కూడజివతిమహిబాన్ సొన్నా ఇజి కబ్బు పొక్కారె బతిమాలితారె.

32 అయ సద్దుదు గొప్ప కలిబిలి జర్గితాద్. సెగొండార్ అహు వెహ్ని, మరి సెగొండార్ ఈహు వెహ్ని గగోల్ ఆతారె. గాని వారు ఇని దన్నిజ్ కూడిత మనారొ ఇజి నండో లోకుర్ నెన్వితారె.

33 యూదురు అలెక్జెండర్ ఇనివన్నిజ్, విజెరె వందిజ్ నీన వర్గిఅ ఇజి లోకుర్ నడిమిహాన్ ముందాల నిల్వారె. అలెజి మండ్రు ఇజి వాండ్రు కియు సాప్తాండ్రె ఉండ్రె మాట సీవెహ్ని ఇజి సుడజి మహాన్.

34 గాని వాండ్రు యూద వాండ్రు ఇజి నెస్తారె వారు రుండి గంటజ్ దాక, ‘ఎపెసువరి అర్తెమి దెయం గొప్ప దెయం’ ఇజి ఉండ్రెలెకెండ గగోల్ ఆతారె.

35 అయావలె అయ పట్నం కర్ణం *వాతాండ్రె లోకాజ్ విజెరిజ్ గగోల్ ఆవండ్రు మండ్రు ఇజి వెహ్లాన్. “ఎపెసు పట్నమ్మదికిదెరా, మాపు అర్తెమి పెరి దెయమ్మది గుడిడిజ్ కాప్ కినికాప్ ఇజి విజేరె నెసినార్గదె.

‡ 19:29 19:29 సద్దు ఇహిజి స్టేడియం లెకెండ మహాద్. బానె లోకు కూడనారె బేను కర్ణినార్. లోకు సురుల బస్సార్. ఇరువయ్ఆరువెయి లోకుర్ బస్సెజ్ ఆనాద్ అయ సద్దుదు. కొడెవేలి నని గుండ్రాజ్ మనాద్ అయ సద్దు. గాని మేడః సిల్లెద్. ఎపెసు పట్నం నడిమిద్ మహాద్ యా సద్దు. § 19:33 19:33 గొడబ కినికార్ మాపు యూదురు ఆవప్, పవులుని వన్నివెట మన్నికారె ఇజి వెహ్లాజ్ సుడతాన్ * 19:35 19:35 ముకెలమాతి ఒరెన్ అతికారి

§ 19:33 19:33 గొడబ కినికార్ మాపు యూదురు ఆవప్, పవులుని వన్నివెట మన్నికారె ఇజి వెహ్లాజ్ సుడతాన్ * 19:35 19:35 ముకెలమాతి ఒరెన్ అతికారి

అగాసమ్దాన్ అర్థి అర్థెమి దెయమ్ది పణుకుదిజ్బా కాపు కినికార్ మాపె ఇజి విజేరె నెసినార్గదె.

³⁶ యా సజతిజ విజు ఎద్రిసినిక ఆవద్. అహిజ మీరు ఏలు అలెజి మండ్రెజ్ వలె. ఇనికబా గజిబిజి ఆజి కిదెజ్ ఆవద్.

³⁷ మీరు యా లోకాజ్ లాగితి తత్తిదెర్. గాని మీరు గుడిజు డొజు కినికార్ ఆవర్. మా దెయమ్దిజ్ దుసలాడ్జివర్.

³⁸ దెమెత్రిజ్, వన్నివెట కూడితి మహి పణిమణిసిరిజ్ ఎయెన్ మున్కుబా నేరం మొవైజ్ ఇహిజ, కోర్టుజ్ నడిసిసె, అతికారి లోకుర్ మనార్. బానె సొన్ని వారు ఒరెన్మున్కు మరి ఒరెన్ నేరమ్కు సిదెజ్.

³⁹ గాని మరి ఇనివందిజ్ ఇనికబా తగ్గు మహిజ అక్క రోజు జర్గిని సద్దుదు వర్గిజి తీర్పు తీరిసైజ్.

⁴⁰ నేండ్రు జర్గితి గొడజుబవందిజ్ రోమ అతికారిజు మా మున్కు కేసు పొక్వారొ ఇజి నాను తియెలాజిన. జర్గితి గొడజుబవందిజ్ వెవైజ్ ఇని మాటబా సిల్లెద్. ఎందానిజ్ ఇహిజ యావజ కూడ్జి గగోలాజి వర్గినిదన్నిజ్ వెవైజ్ అసల కారణం సిల్లెద్”, ఇజి వరివెట వెవ్హాన్[†].

⁴¹ వాండ్రు ఈహు వెప్పి కూడితి మహి వరిజ్ విజెరిజ్ సాండ్రు ఇజి పోక్వాన్.

20

పవులు మసిదోనియ గ్రీసు దేసెమ్కాజ్ సాహాన్

¹ అయ గొడజు అణస్తి వెనుక పవులు నమ్మిత్తివరిజ్ కూకపిస్తాండ్రె వరి నమకమ్దిజ్ సత్తు కిబిస్తాన్. దయ్ రమ్మున్కు మండ్రు ఇజి వెప్పి సెల్వ లొస్తాండ్రె మసిదోనియదు సాండ్రెజ్ సోత్తాన్.

² పవులు ఆ దేసెం విజు బూలాజి నమ్మిత్తి వరిజ్ సుడ్జి సాహాన్. వరి నమకమ్దిజ్ సత్తు కిబిస్తాన్. వెనుక అకాయ ఇజి కూక్సి గ్రీసు దేసెమ్దు వాతాన్

[†] 19:40 19:40 ఎపెసు పట్టుమ్దు మన్ని లోకుర్వందిజ్ యా ముకెలమాతి అతికారి, రోమ అతికారిజు వెట వర్గినికాన్. లోకు గొడజు పుటిస్తిజు వరిజ్ వాని అవుకాసమ్కు సిల్లెండ ఆనె

3 పవులు అబ్బై మూండ్రి నెలెజ్ మహాన్. ఓడః ఎక్కి సిరియాదు సొన ఇజి మహిజ్ యూదురు వన్నిజ్ సప్తెజ్ కుట్ర ఆజి మహార్ ఇజి వెహాన్. అక్క నెస్తాండ్రె మసిదోనియదాన్ నడిఃజి సొన్ని అబ్బెణాన్ ఓడః ఎక్కి సొండ్రెజ్ ఒడిఃబితాన్.

4 పురు మరిసి ఆతి బెరెయ పట్టుమ్దికాన్ సొపత్తు ఇనికాన్, దెసలోనియదికార్ అరిస్తర్కు, సెకుందు ఇనికార్, దెర్బ పట్టుమ్దికాన్ గాయి ఇనికాన్, మరి తిమోతి, ఆసియ దేసెమ్దికార్ ఆతి తుకికు, త్రోపిము ఇనికార్ పవులు వెట సొహార్.

5 వీరు ముందాల్నె సొహారె త్రోయ ఇని పట్టుం మా వందిజ్ సుడఃజి మహార్*.

6 పులాజ్ ఆఇ రొట్టెజి పండోయ్ ఆతి వెనుక మాపు పిలిప్పి పట్టుం డిఃసి ఓడః ఎక్కి అయ్దు రోస్కాణ్ త్రోయ† పట్టుం వాతావ్. అబ్బై ముందాల సొహిమహివరివెట ఏడు రోస్కు మహావ్.

పవులు సాతివన్నిజ్ నిక్లాన్

7 వారమ్ది మొదోహి రోజు †ప్రబు ఏర్పాటు కిత్తి బోజనం తిండ్రెజ్ మాపు కూడిఃత వాతావ్. అయావలె పవులు మర్న నాండిజ్ సొనాలె ఇజి వరిజ్ నెస్పిస్తాన్. మదరెయ - దాక నండో మాటెజ్ వర్గిజి మహాన్.

8 మాపు కూడిఃతి మహి మేడః గదిదు నండో దీవెజ్ మహె.

9 అయావలె అయ్దుకు ఇని ఒరెన్ దజ్డాఃయెన్ కిటికిదు బస్తాండ్రె వెంజిమహాన్. వెంజిమహిజ్ నిద్ర వాతాద్. పవులు లావు సుట్కు నెస్పిస్తా మహిజ్ యా దజ్డాఃయెన్ నిద్ర లావాత్తిజ్ జోజితాండ్రె మూండ్రి అంత్రంకాణిజ్ అడిఃగి అర్దాన్. వెప్తి సుడఃతిజ్ సాత మహాన్.

* 20:5 20:5 యా పుస్తకం రాస్తిమహి లూక పవులువెట పయనం కిదెజ్ మర్రి వాతాన్
 † 20:6 20:6 మసిదోనియ దేసెమ్దు మన్ని పిలిప్పి ఇనిబాణిజ్ ఓడః ఎక్కార్. గాలి వరి ఎద్దు డెయ్తిజ్ త్రోయ అందిదెజ్ అయ్దు రోస్కు ఆతె. సొహివలె రుండి రోస్కునె ఆతె మహె.
 16:11 † 20:7 20:7 యూదురి దినమ్కు లెక్క కినిక ఎలాగ ఇబాజి సనివారం పొదోయ్ ఆరు గంటెజ్ కొత్త వారం మొదొల్నినాద్. లూక యా పుస్తకం రాస్తివలె యాలెకెండె లెక్క కిత్తాన్ ఇజి బయ్బిల్వందిజ్ ఎక్కు సదు కిత్తికార్ నండోడార్ వెస్పినార్

10 గాని పవులు అడ్డి డిఃగితాండ్రై వన్ని మున్కు అర్ని వన్నిజ్ పొంబిజి అస్తాన్. “మీరు బాద ఆమాట్. వన్ని పాణం వన్నిలోఇనె మనాద్”, ఇజి వరివెట వెప్తాన్.

11 పవులు మరి మేడఃమున్కు సొహాండ్రై రొటె రుక్సి వరివెట బోజనంకిత్తాన్. జాయానిదాక నండొ మాటెజ్ వర్గిజి సొతాండ్రై సొహాన్.

12 వారు బత్కితి మహి అయ దజ్డెజ్ ఇండ్రొ తతార్ గొప్ప నర్ల ఆతార్.

పవులు ఎపెసు పట్నమ్ది పెద్దెలుజవెట నెలవ లొస్తాండ్రై యెరూసలేమ్దు సొహాన్.

13 పవులు అసొసు ఇనిబాన్ నడిఃజి సొండ్రైజాతిజ్ మాపు వన్నిముందాల ఓడః ఎక్సి అసొసు సొహాప్. పవులుజ్ బానె ఓడఃదు ఎక్సాప్ ఇజి మాపు ఒడిఃబిత్తాప్.

14 అసొసుదు పవులు మా వెట కూడిఃతివలె మాపు వన్నిజ్ ఓడఃదు ఎక్సిస్తాపె మితులె ఇని బాడ్డిదు వాతాప్.

15 బాణిజ్ సొసి మహ్నా నాండిజ్ కియోసు ఇని బాడ్డిజు ఎద్రు వాతాప్. మహ్నా నాండిజ్ సమోసు ఇనిబాన్ సొహాపె బాణిజ్ మహ్నా నాండిజ్ మెలితె ఇని బాడ్డిదు వాతాప్.

16 పెంతెకోస్తు ఇని పండొయ్నాండిజ్ యెరూసలేమ్దు అందిదెజ్వలె ఇజి పవులు తొంత్ర ఆతాన్. ఆసియదు సొహిజు అలస్యం ఆనాద్ ఇజి ఎపెసు పట్నమ్దు సొన్ఎండ తినాజ్ సొండ్రైజ్ ఒడిఃఒడిఃబితాన్.

17 అందెజె పవులు మిలెతుదు అందితివలె ఎపెసు పట్నమ్దు మన్ని సజమ్ది పెద్దెల్జు వన్నిబాన్ కూక్పిస్తాన్.

18 వారు వన్ని డగ్రు వాతిజ్ పవులు వరివెట ఈహు వెప్తాన్, “నాను ఆసియదు వాతి మొదొల్ దినమ్కాజ్ ఎలాకాలం మీ నడిఃమి ఎలాగ బత్కిజి మహానొ ఇజి మీరె నెస్సిదెర్గదె.

19 యూదురు నజీ సప్తెజ్ కుట్ర కిజి నజీ మాలెజ్ కిత్తార్ గాని నాను గొప్ప వాండ్రు ఇజి ఒడిఃబిఎండ కణెరు వాక్సి దేవుణు పణి కిజి ఎలాగ మహానొ ఇజి నిజినె తెలినాద్.

20 సిక్నదాన్ ఎలాగ గెలిస్తాజ్ ఇని వందిజ్ అవ్ నరమాతిక ఇనికబా సరినె మీలోకుర్ నడిమి విజేరె కూడితి మహి బాడ్డిదు నాను సాటిస్త. మీ ఇల్కాజ్ బా వాతానె మిజీ నెస్పిస్త.

21 పాపమ్ కు ఒప్పుకొండోజి డిసిసిజి, దేవుణుదిజ్ లోజిజి, మా ప్రబు ఆతి యేసుక్రీస్తు ముస్కు నమకం ఇడదు ఇజి నాను యూదురిజ్ యూదురు ఆఇ వరిజ్ సాసి వెప్తా.

22 ఇదిలో, నాను దేవుణు ఆత్మదిజ్ లోజితానె యెరూసలేమ్ దు సొస్పిన్. అబ్బె నజి ఇనిక జర్గినాద్లెనో నజి తెలివద్.

23 గాని విజు పట్టుమ్ కాజ్ బా, నజి మాలెజ్ వాజినె ఇజి, యెరూసలేమ్ దు నజి జెలిదు ఇడ్వార్లె ఇజి, దేవుణు ఆత్మ నజి వెస్పినాన్.

24 గాని నా పాణ్ మదిజ్ నాను కండెక్ బా విలువ సివి. ఎందానిజ్ ఇహిజ ప్రబు ఆతి యేసు నజి సత్తి పణి పూర్తి కిదెజె. అయ పణి ఇనిక ఇహిజ దేవుణు దయాదర్ మమ్ వందిజ్ మన్ని సువార్త వందిజ్ నాను సాసి వెప్తాజ్.

25 నాను బూలాజి దేవుణు ఏలుబడిః వందిజ్ మీ నడిమి వెప్తా గాని మీలోఇ ఎయిదెర్ బా మరి నజి తొఇదెర్లె ఇజి నాను ఏలు నెస్సా.

26 గాని మీలోఇ ఎయిదెర్ బా పాడాఃజి సొహిజ నా పూసి తెవితాద్ ఇజి నేండ్రు మీరె సాసిర్ అనిదెర్లె.

27 దేవుణు ఇష్టం పూర్తి నాను మిజీ నెస్పిస్త. ఇనికబా డావ్ ఏత.

28 దేవుణు వన్ని సొంత మరిసి నల సితండ్రె సజమ్ దిజ్ సమ్ పాదిస్తాన్. అయ సజమ్ దిజ్ మీరు బాగ కాప్ కిదెజ్. దేవుణు ఆత్మ మిజి సజమ్ దిజ్ సుడఃదెజ్ ఒపజెప్తాన్. అయ పణిలోఇ నెగ్రెండ సుడఃదు. మీ వందిజ్ బా మీరు జాగర్త సుడఃదు.

29 నాను సొహి వెనుక క్రూరమాతి కార్ నుకుడిజ్ నన్ని లోకుర్ మీలోఇ డుఃగ్వార్లె ఇజి నాను నెస్సా. వారు నమ్మితి వరి ముస్కు కనికారం తోరిన్ ఏర్. సజమ్ దిజ్ పాడు కిసార్.

30 మీలోఇహానె నెగొండార్, నమ్మితి వరిజ్ వెకొరి మాటెజ్ వెస్పి నెగ్గి సరిదాన్ లాగ్గి నెఇ సరిదు నడిమిసి, వరివెట కూక్కి ఒతెజ్ సూణార్లె.

31 అహిజ జాగర్త మండ్రు. నాను మూండ్రి పంటేజ్ దాక రెయుపొగలు కణెరు వాక్సి నమకమ్వందిజ్ విజెరిజ్, ఒరెన్ ఒరెన్ వన్నిజ్ డిఃస్వండ వెహ్తా మన్న. అక్క మీరు ఒడిఃబిజి జాగర్త మండ్రు.

32 దేవుణుదిజ్ని వన్ని దయాదర్మం తోరిన్ని మాటదిజ్ మిజి ఒపజెప్పిన. మీ నమకం నండొ కిదెజ్ అట్టి దేవుణు - మాటదిజ్ మిజి ఒపజెప్పిన. దేవుణుదిజ్ కేట ఆతి వరివెట మిజి అక్కు సీదెజ్ అట్టి దేవుణుమాటదిజ్ మిజి ఒపజెప్పిన.

33 నాను ఎయె డబ్బుదిజ్, బజరమ్దిజ్, సొక్కెజ్ పాతెజ్ వందిజ్ ఆస ఆవత

34 నా అవ్సరమ్వందిజ్ గాని నావెట మహివరి అవ్సరమ్కు వందిజ్ గాని నా కికాజణిజె పణి కిజి బత్కిత్త ఇజి మీరు నెసినిదెర్.

35 నాను కిత్తి విజు పణిజాజ్ మిజి నెన్పిస్తిక ఇనిక ఇహిజ మీరు డటం పణి కిజి సిల్లి వరిజ్ సాయం కిదెజ్. దిన్ని వందిజ్ యేసుప్రబు నెన్పిస్తి మాట గుర్తు కిదెజ్. అక్క ఇనిక ఇహిజ సీనివన్ని సర్ద లొస్సివన్ని సర్ద ఇంక పెరిక.

36 పవులు ఈహు వెహ్తాండ్రె ముణుకుజ్ ఊర్జి వారు విజెరె వెట పార్లనం కిత్తాన్.

37 వారు విజేరె పవులుజ్ పొంబితారె వన్నిజ్ ముద్దు కిజి లావు అడఃబాతార్.

38 ఎందానిజ్ ఇహిజ, మీరు ఇబ్బెహాన్ నజి సుడఃఇదెర్లె ఇజి పవులు వెహ్తా అయ మాటవందిజె గొప్ప దుకం ఆతార్. వారు ఓడః ఎక్కి అందు పవులు ఇట్టా వాతార్.

21

పవులు యెరూసలేం సొన్నినాన్

1 మాపు వరిజ్ డిఃసిసొత్తి వెనుక ఓడః ఎక్తాపె తినాజ్ సొన్ని కోసు ఇనిబాన్ వాతాప్. మహ్నా నాండిజ్ రోదు ఇనిబాన్ వాతాపె బాణిజ్ పతరు ఇనిబాన్ వాతాప్.

2 బానె పెనికెదిజ్ సొని ఉండ్రె ఓడః సుడఃతాపె, ఎక్తాపె సొహాప్.

3 సొహాపె కుప్ర ఇని ద్వీపు మా డేబ్ర పడఃకాద్ సుడఃతాప్ గాని దన్ని డేబ్ర పడఃకదాన్ తినాజ్ సిరియ దరోట్ సొహాపె, తూరు ఇనిబాన్ డిఃగితాప్. బాన్ డిఃపైజ్ ఓడఃదు సామనమ్కు మహె.

4 బాన్ సిసూరిజ్ రెబాజి సుడఃతిజ్ వరివెట కూడిఃతాపె ఏడు రోస్కు బానె మహాప్. 'నీను యెరూసలేమ్దు సొన్మా', ఇజి దేవుణు ఆత్మ వెహ్టా లెకెండ్ పవులు వెహ్టార్

5-6 గాని బాణిజ్ సొండ్రెజ్ టయం ఆతివలె మాపు సొత్తాపె పయ్నం కితాప్. నమ్మితికార్ విజెరె, అయ్లికొడొక్, కొడొర్, మా వెట పట్నం వెల్లిదాక ఇడ్డిః వాతార్. మాపు విజెపె సమ్దరం ఒడ్డుదు ముణుకుజ్ ఊరిజి పార్దనం కితాపె ఒరెన్ వెట ఒరెన్ సెలవ లొస్తాపె ఓడః ఎక్టాప్. వారు వరి ఇండ్రో మర్జి సొహార్.

7 మాపు తూరుదాన్ సొత్తాపె తొలెమాయి ఇని పట్నమ్దు వాతాప్. బాన్ నమ్మితి తంబెర్సిరిజ్ సుడిః సొహాపె వరివెట ఉండ్రె రోజు మహాప్.

8 మహ్సా నాండిజ్ సొత్తాపె కయ్సరియాదు వాతాప్. బానె సువార్త వెహ్పికాన్ పిలిపు ఇండ్రో సొహాపె వన్ని ఇండ్రో మహాప్. పిలిపు యెరూసలేమ్దు మన్ని సజమ్దు ఏర్పాటు కిత్తి ఏడుగురు లొఇ ఒరెన్.

9 అయా పిలిపుజ్ నాల్గురు విడ్డిః అయ్లిక్ మహె. అవిక్ దేవుణుబాణిజ్ వాని మాటెజ్ వెహ్పికెజ్.

10 మాపు సెగం రోస్కు బానె మహివలె అగబు ఇని ఒరెన్ ప్రవక్త యూదయ ప్రాంతమ్దాన్ బానె వాతాన్.

11 అగబు మాపు మన్నిబాన్ వాతాండ్రె పవులు నడుముదు తొహ్టా మన్ని కటు కుతాన్. కుతాండ్రె, వన్ని కికాజ్ కాల్యాజ్ అగబు తొహ ఆతాన్. తొహ ఆతండ్రె, యా కటు ఎయెర్ది ఇహిజ వన్నిజ్ యెరూసలేమ్దు మన్ని యూదురు తొహ్పి ఆఇ లొకాజ్ ఒపజెప్పార్లె ఇజి దేవుణు ఆత్మ వెహ్పినాన్ ఇజి యా అగబు వెహ్టాన్.

12 యాక మాపు వెహాపె మాపు, బానె మహి నమ్మితికార్, పవులు వెట, "యెరూ - సలేమ్దు సొన్మా", ఇజి బతిమాలితాప్.

13 దన్నిజ్ పవులు, “మీరు ఎందనిజ్ అడఃబాజి నజీ దుకం కిబిసినిదెర్? నా ప్రబు ఆతి యేసువందిజ్ తోహె అదెజె ఆవీద్, వన్ని వందిజ్ యెరూసలేమ్దు సాదెజ్బా నాను ఒప్పుకొడఃజిన”, ఇహోన్.

14 పవులు మా మాటెజ్ ఒప్పుకొడఃఇతిజ్ మాపు అలెతాప్. దేవుణుదిజ్ ఇన్ఱమాతి వజ జర్గిపిద్ ఇహోప్.

15 అయ పట్టమ్దు సెగం రోస్కు మహి వెనుక మాపు సామనమ్కు విజు అస్తాపె ఎక్కు యెరూసలేం పట్టమ్దు సాండ్రెజ్ సోత్తాప్.

16 కయ్సరియదాన్ సెగొండార్ సిసూర్ మా వెట వాతారె మాపు మండ్రెజ్ ఇజి ఒడిఃబిత్తి మ్నాసోను ఇండ్రో మజీ తతార్. మ్నాసోను కుప్రదికాన్. మొదోహాన్ అసి యేసుప్రబు సిసూడుః ఆతికాన్.

పవులు యెరూసలేమ్దు అందితాన్

17 మాపు యెరూసలేమ్దు వాతిజ్ నమ్మిత్తి తంబెర్సిర్ మజీ సర్దదాన్ మర్గాద కిత్తార్.

18 మర్గ నాండిజ్ పవులు మా వెట యాకోబు డగ్రు సాహాన్. నజం పెద్దెలుజు విజేరె బానె మహార్.

19 పవులు వరిజ్ మాడిఃస్తాన్. వెనుక యూదురు ఆఇవరిలోఇ పవులు కిత్తి సువార్త పణిదాన్ దేవుణు జర్గిస్తికెజ్ విజు పూర్తి వెహ్తాన్.

20 వారు ఇక్కెజ్ వెహారె దేవుణుదిజ్ స్తుతి కిత్తార్. పవులు వెట వారు ఈహు వెహ్తార్, “పవులునా, యూదురు లోఇ నమ్మితికార్ నండో వైయుజ్ లోకుర్ మనార్ ఇజి నీను సుడఃజినిగదె. వారు విజేరె దేవుణు మోసెజ్ సిత్తి రూలుజ్ వందిజ్ నండో పటుదల మనికార్.

21 ఇబ్బె మన్ని యూదురు విజేరె నీవందిజ్ ఉండ్రీ బోగట్ వెహ మనార్. అక్క ఇనిక ఇహిజు, మోసె వెహ్తికెజ్ విజు డిఃస్టెజ్ ఇజి నీను యూదురు ఆఇవరి లోఇ బత్తిని యూదురిజ్ నెస్పిసిని ఇజి. వరి ఇజిరి కొడఃరిజ్ సునతి కినిక ఆవీద్ ఇజి నీను నెస్పిసిని ఇజి. మరి, యూదురు ఎలాగ నడిఃదెజ్ ఇజి మహి పదతిజ్ వజ నడిఃనిక ఆవీద్ ఇజి నీను నెస్పిసిని ఇజి. వినకవందిజ్ బోగట్ వెహ మహాప్”, ఇహోర్.

22 “అహిజు మాటు ఇనిక కిదెజ్? నీను వాతివందిజ్ విజేరె తవ్విండ వెనార్.

23 అందెజె మాపు వెహ్నివజ నీను కిఅ. ఇనిక ఇహిజ మొకు నిల్పి మన్ని నాల్ఎర్ మొగావారు ఇబ్బెనె మనార్.

24 నీను వరిజ్ వెట కూక్సి ఒసి వారు మొకుబడిః సొన్నిస్తెజ్ వరివెట దేవుణు గుడిఃదు సొన్అ. వారు పూజ సీజి బుర్ర బోడి కిదెజ్ మన్ని కర్పు నీనె సిఅ. అహిజ నీవందిజ్ లోకుర్ వెహిమన్ని బోగట్ నిజం ఆవిద్ ఇజి విజేరె నెస్నార్. నీను మోసె సిత్తి రూలుజ లోజిజి నడిఃజినాన్ ఇజి విజేరె నెస్నార్.

25 అహిజ యూదురు ఆఇ నమ్మితి వరిజ్ మాపు ఇనిక తీర్మానం కిజి రాస్త మనాద్ ఇహిజ, బొమ్మెజ పూజ కిత్తి వన్కాజ్ తినిక ఆవిద్ ఇజి, నల తినిక ఆవిద్ ఇజి, మెడః పిడిఃక్సి సప్తి వనకాజ్ తినిక ఆవిద్ ఇజి. రంకు బూలానిక ఆవిద్ ఇజి”. ఈహు సజమ్ది పెద్దెలుజు పవులు వెహ్నార్.

26 అందెజె పవులు, మహ్సా నాండిజ్ అయ నాల్ఎరిజ్ వెట కూక్సి ఒతండ్రె వరివెట సుబ్బరం ఆతాన్. వారు సుబ్బరం ఆజి మంజిని కాలం ఎసెజ్ అందినాద్, వరి లొఇ విజేరివందిజ్ ఎసెజ్ పూజ కిదెజ్, ఇక్కెజ్ వెహ్నివందిజ్ పవులు దేవుణు గుడిఃదు యూదురు లొఇ మొగావారు మండ్రెజ్ మన్ని బాడ్డిదు సొహాన్.*

పవులు యూదురు అస్తార్

27 సుబ్బరం ఆజిమంజిని ఏడు రోస్కు డగు ఆతాద్. అయావలె ఆసియదాన్ వాతిమహి సెగొండార్ యూదురు, దేవుణు గుడిఃదు యూద మొగవరిజ్ మన్ని బాడ్డిఃదు పవులు సుడఃతారె, బానె మహి లోకాజ్ విజేరిజ్ కలిబిలి కితారె వన్నిజ్ అస్తార్.

28 “ఇస్త్రాయేలు లోకాంఠె, తోడుః కిదెజ్ రద్దు. మా లోకాజ్ పడఃఇకెజ్, మోసె సిత్తి రూలుజ పడఃఇకెజ్, యా దేవుణు గుడిఃదిజ్ పడఃఇకెజ్ విజు బాడ్డిజు సొన్ని లోకాజ్ విజేరిజ్ నెస్పిసినికాన్ వీండ్రె. అక్కాదె ఆవిండ, వీండ్రు యూదురు ఆఇ వరిజ్ దేవుణు గుడిఃదు కూక్త

* 21:26 21:26 యా బాడ్డిదు మొగవారె మంజినార్. అయ్లికొడొక్ బాన్ సొండ్రెజ్ ఆవిద్

తతాండ్రె దేవుణుదిజ్ కేట కిత్తి యా బాడ్డి మయ్ల కిత్తాన్”, ఇజి నండో గగోలాతార్.

29 ఎందానిజ్ ఇహిజు, పట్టుమ్దు పవులు వెట యూదురు ఆఇ ఎపెసుదికాన్ త్రోపిమును ఇని ఒరెన్ వన్నిజ్ ముందాల్నై వారు సుడేత మహార్. వన్నిజ్ పవులు దేవుణు గుడిఃదు యూదురి మొగ్గ వరిజ్ మండ్రెజ్ మన్ని బాడ్డిఃదు తతాన్ ఇజి వారు ఒడిఃబితార్†.

30 పట్టుమ్దు మహి లోకుర్ విజేరె కలిబిలి ఆతార్. విజుబాణిజ్ లోకుర్ మందెజ్ మందెజ్ ఆజి ఉహ్కొ వాతారె పవులుజ్ అస్తారె దేవుణు గుడిఃదు యూదురి మొగ్గ వరిజ్ మండ్రెజ్ మన్ని బాడ్డిహాన్ వెల్లి లాగితార్. వెటనె యూదురి మొగ్గ వరిజ్ మండ్రెజ్ మన్ని బాడ్డిదు సాని సేఫ్లాజ్ కెహా ఆతె.

31 పవులుజ్ వారు సపైజ్ ఇజి సుడేఃజిమహిజ్ యెరూసలేం పట్టుం విజు కలిబిలి ఆతాద్ ఇజి అబ్బై మహి రోమ సయ్నమ్ది పెరి అతికారిజ్ కబ్బు వాతాద్.

32 వెటనె అయ పెరి అతికారి సయ్నమ్దివరిజ్, సదాతిపతివరిజ్ వెట ఒతండ్రె కూడిఃతి మహి లోకుర్ డగ్రు ఉహ్కొ వాతాన్. లోకుర్ అయ పెరి అతికారిజ్, వన్నివెట వాతి సయ్నమ్ది వరిజ్ సుడేఃతిజ్ పవులుజ్ డెఃయ్డెజ్ డిఃస్తార్.

33 అయ పెరి అతికారి డగ్రు వాతండ్రె పవులు అస్తాన్. ‘రుండి గొలుస్కాణిజ్ వన్నిజ్ తొప్పు’ ఇజి ఆడ్ర సిత్తాన్. వీండ్రు ఎయెన్? ఇనిక కిత్తాన్ ఇజి వెన్బాతాన్.

34 వెన్బాతిజ్ లోకుర్ సెగొండార్ ఈహు ఇజి, సెగొండార్ అహు ఇజి వెప్పి డేల్ని మహిజ్ గగోల్ లావాత్తిజ్ నిజం ఇనికాదొ ఇజి నెన్ఎండ ఆతండ్రె ‘బారి గోడేలోఇ వన్నిజ్ ఒతు’ ఇజి ఆడ్ర సిత్తాన్.

35 పవులు పావు అన్పు ముస్కు వాతివలె లోకుర్ ఒదె కోపమాజి లాగ్దెజ్ నెక్తెజ్ కిత్తిజ్ సయ్నమ్దికార్ పవులుజ్ పిండితారె ఒతార్.

36 ఎందానిజ్ ఇహిజు, వన్నిజ్ సవ్అ ఇజి లోకుర్ విజేరె డటం

† 21:29 21:29 యూదురు ఆఇకార్ దేవుణు గుడిః డేవాదు సొండ్రెజ్ అవిద్. బాన్ యూదు మొగకొడెఃరి సొండ్రెజ్ అనాద్ ఇజి రూలు మనాద్

గగోలాజి వెటసాహార్.

పవులు లోకుర్ వెట వర్గిజినాన్

37 మొదొహి పావు అన్నుదాన్ ఎక్కి సొన్ని ఆకరి పావు అన్ను దాక వారు సాహార్. నయనమ్దికార్ పవులుజ్ బారిగోడఃలోఇ ఒతెజ్ సుడఃజి మహిజ్ పవులు అయ పెరి అతికారి వెట, నీ వెట ఉండ్రీమాట వెహైజ్ ఆనాదా ఇజి వెన్బాతాన్. అందెజె అయ అతికారి, “గ్రికు బాస నీను నెసినిదా?”, ఇజి వెన్బాతాన్.

38 “యా దినమ్కాజ్ ముందాల్వై అతికారిజి ఎద్దువెహిని లోకాజ్ సప్పి నాల్లి వెయి లోకాజ్ బిడిఃజ్బూమిదు వెట కూక్కి ఒసి మహి అయ్గుప్ప దేసెమ్దికి నీను ఆఇదా?”, ఇజి పవులుజ్ వెన్బాతాన్.

39 దన్నిజ్ పవులు, “నాను కిలికియాదు మన్ని తార్పు పట్టుమ్దికాన్ యూద వాండ్రు. నాను అయ గొప్ప పట్టుమ్ది లోకు. లోకుర్ వెట వర్గిదెజ్ నజి సెల్వ సిదా”, ఇజి బతిమాలితాన్.

40 పవులు సెలవ లొస్తిజ్ పెరి అతికారి సరి సిత్తాన్. అయావలె పవులు పావు అన్ను మున్ను నిహండ్రె లోకాజ్ అలెజి మండ్రు ఇజి కియు సయ్యు కిత్తాన్. వారు అలెతి మహివలె పవులు యూదురి బాసాదు ఈహు వెహ్హాన్.‡

22

1 “తంబెరిజాండె, బుబ్బరాండె, నా లొఇ ఇని తప్పుబా సిల్లెద్ ఇజి మీరు నెసినివందిజ్ నాను వెహిని మాటెజ్ వెండ్రు”.

2 పవులు వరి సొంత బాసాదు వర్గినిక వెహారె వారు జమ్న అల్లెత మహార్. అయావలె పవులు ఈహు వెహ్హాన్.

3 “నాను కిలికియాదు మన్ని తార్పు పట్టుమ్దికాన్ యూద వాండ్రు. అపొజి యా పట్టుమ్దు గొప్ప పేరు పొందితి మేస్టర్ గమాలియెలు బాన్ మోసె మా అనిగొగొరిజ్ సిత్తి రూలుజి ఎలాగ లోబడఃదెజ్ ఇజి నెగ్రెండ నెస్తానె పిరితా. మీరు విజిదెరె నేండ్రు ఎలాగ పటుదలదాన్

‡ 21:40 21:40 యూదవరి బాస ఏత్తి బాస. యూద పుజెరిజు నద్వితి మహి దేవుణు మాటెజ్ ఏత్తి బాసాదునె రాస్త మహద్. వారు వర్గితి మాట అరామియ బాస

మన్నిదెరో అయ వజనె నానుబా యా రూలుజ్ వందిజ్ పటుదలదాన్ మహా.

4 నాను యేసుప్రబు ముస్సు. నమ్మితి వరిజ్ మొగ్గకొడొరిజ్, అయ్లి కొడొకాజ్ అసి తొప్పి జెలిదు ఇడ్జి సానేండ మాలెజ్ కిత.

5 దిన్ని వందిజ్, విజెరె పుజెరిజ ముస్సు. పెరి పుజెరి, పెద్దెలుజు విజెరె నజి సాసి ఆత మనార్. దమస్సు. పట్నమ్దు మహి మా సొంత లోకురాతి యూదురు లొఇ మహి నమ్మిత్తి వరిజ్బా అసి తొప్పి మాలెజ్ కిదెజ్ యెరూసలేమ్దు తతెజ్ ఇజి పుజెరిజ బాణిజ్ ఉత్రమ్ము. లొస్త ఒతానె దమస్సు. పట్నమ్దు మహి యూదురుబాన్ సొహ.

6 నాను పయ్నం కిజి దమస్సు. పట్నం డగ్రు సొన్ని మహిజ్, మదెనం వేడెదు, ఆగాసమ్దాన్ వెటనె గొప్ప జాయ్ నా సుటులం డెయ్తాద్.

7 అయావలె నాను బూమి ముస్సు. అర్తానె, 'సవులు, సవులు, నీను ఎందానిజ్ నజి మాలెజ్ కిజిని', ఇజి నావెట ఉండ్రి జాటు వాతిక వెహ.

8 'ప్రబు, నీను ఎయి' ఇజి నాను వెన్బాత. వెన్బాతిజ్ వాండ్రు 'నీను మాలెజ్ కిజిని నజరేతుదికాన్ ఆతి యేసునె నాను', ఇజి నావెట వెహ్హన్.

9 నావెట సొన్ని మహికార్ అయ జాయ్ సుడెతార్ గాని నావెట వర్గితిమహివన్ని జాటు నెన్వితార్.

10 అయావలె నాను, 'ప్రబు నాను ఇనిక కిదెజ్' ఇజి వెన్బాతిజ్, 'నీను నిజ్జి దమస్సు. పట్నం సొన్అ. అబ్బె నీను ఇని పణి కిదెజ్ ఇజి నీ వందిజ్ నాను ఏర్పాటు కిత్తికెజ్ విజు నిజి ఒరెన్ వెహ్హనాన్లె' ఇజి నావెట ప్రబు వెహ్హన్.

11 అయ సుడెదెజ్ అట్ఇ నన్ని పెరి జాయ్ మహిజ్ నాను కణుకు తోర్దెజ్ అట్ఎండాత. నావెట మహికార్ నా కికు అసి నడిపిసి దమస్సు. పట్నమ్దు కూక్త తతార్.

12 అయావలె మోసె సిత్తి రూలుజ్ లొజిజి, బక్తి మన్నికాన్ అననియ ఇనికాన్ ఒరెన్ బాన్ మహాన్. అబ్బె మహి యూదురు విజెరె యా

అననియ, ఒరెన్ పల్కుబడిః మన్నికాన్ ఇజి వెహ్ని మహార్. వాండ్రు నా డగ్రు వాతాన్.

13 డగ్రు వాతండ్రె నా డగ్రు నిహండ్రె, 'సవులునా, బేన్అ', ఇజి వెహ్నిజ్ వెటనె నాను బేస్తానె వన్నిజ్ సుడఃత.

14 అయావలె అయ అననియ వెహ్నిజ్, 'మా అనిగొగొరి దేవుణు నిజి ఏర్పాటు కిత మనాన్. దేవుణు నిజి ఇని పణి వందిజ్ ఏర్పాటు కిత్రాండ్రె అక్క నీను నెస్తెజ్. అందెజె నీను సుడఃతిమహి, వెహిమహి నీతి నిజాయితి మన్నికాన్ నిజి ఏర్పాటు కిత్రాన్.

15 ఎందనిజ్ ఇహిజ, నీను సుడఃతికెజ్, నీను వెహికెజ్, విజు లోకాజ్ సొన్ని వెహ్నిజ్, వన్నివందిజ్ ఉండ్రె సొసివజ నీను మంజిని.

16 ఏలు ఎందనిజ్ ఆలస్యమాజిని? నిజ్జి బాప్తిసం లాగె ఆఅ. యేసు పేరు అసి, పార్దనం కిజి నీ పాపమ్కాణ్ నొరె ఆఅ', ఇజి వెహ్నిజ్.

17 నాను యెరూసలేమ్దు మర్జి వాతానె దేవుణు గుడిఃదు పార్దనం కిజి మహ. పార్దనం కిజి మహిజ్ ఎద్రునె ఉండ్రె దర్చనం సుడఃత.

18 అయ దర్చనమ్దు నావెట, 'నీను యెరూసలేం డిఃసి గజిబిజి సొన్అ. ఎందనిజ్ ఇహిజ నావందిజ్ నీను వెహ్ని సొసి వీరు ఒప్పుకొడఃవర్', ఇజి వెహ్ని మహిక నాను సుడఃత.

19 ప్రబు అయ మాట వెహ్నిజ్ నాను, 'నాను యూదురి మీటిజ్ ఇల్కాజ్ వరస సొన్ని మీ ముస్కు నమకం ఇట్టి వరిజ్ డెయ్జి జెలిదు ఇట్టా ఇజి వారు విజేరె బాగ నెసినార్.

20 అక్కాదె ఆవండ, నీవందిజ్ సొసి వెహ్ని సైపానుజ్ సప్తివలె, నానుబా అక్క ఒప్పుకొటానె వన్నిజ్ సప్తివరి సాల్వెజ్ కాప్కిజి మహాగదె', ఇజి ప్రబు వెట వెహ్ని.

21 గాని ప్రబు, 'నీను సొన్అ, దూరం మన్ని దేసమ్దు బత్తిని యూదురు ఆఇవరిబాన్ నాను నిజి పోక్ష్' ఇజి నావెట వెహ్నిజ్".

పవులు రోమదిజ్ అక్క ఆతికాన్

22 యా మాటదాక లోకుర్ పవులు వెంజి మహార్. గాని యాక వెప్తాజ్, “నిన్ని వన్నిజ్ ఇడ్మాట్. విన్నిజ్ సప్తు. వీండ్రు బత్కిదెజ్ అవద్”, ఇజి వారు విజేరె డటం గగోలాత్తార్.

23 ఈహె వారు గగోలాజి వరి సాల్వెజ్ కిసి విసీర్తారె దూల్లి అసి ఎగ్రిస్తార్.

24 అయావలె ‘పవులుజ్ బారిగోడః లొఇ తగ్అ’ ఇజి రోమ సయ్నమ్ది పెరి అతికారి ఆడ్ర సిత్తాన్. లోకు పవులు ముస్కు ఎందానిజ్ ఈహు కోపం ఆతారె గగోల్ ఆతార్ ఇజి నెన్ని వందిజ్ పవులుజ్ కొర్దదాన్ డెయ్దెజ్ అయ అతికారి ఆడ్ర సిత్తాన్.

25 గాని పవులు డెయ్దెజ్ తొప్తాజ్ పవులు వన్ని డగ్రు మహి సదాతిపతివెట ఈహు వెన్బాతాన్, “రోమదిజ్ అక్కు మన్నికాన్ ఆతి ఒరెన్ వన్నిజ్ తీర్పు సివీండనె కొరెడెదాన్ డెయ్దెజ్ రోమ రూలుజ్ వజి మిజి అతికారం మనాదా?”.

26 అయ సతాతిపతి యాక వెహండ్రె రోమ సయ్నమ్ది పెరి అతికారిబాన్ సాహండ్రె ఈహు వెప్తాన్. “నీను ఇనిక కిదెజ్ నుడఃజిని? వీండ్రు రోమదిజ్ అక్కు మన్నికాన్”, ఇజి వెప్తాన్.

27 అయావలె అయ పెరి అతికారి పవులుబాన్ వాతండ్రె, “నీను రోమదిజ్ అక్కు మన్నికిదెనా?”, ఇజి వెన్బాతాన్. “ఒబ”, పవులు ఇహాన్.

28 దన్నిజ్ అయ పెరి అతికారి, “లావు డబ్బు సిత్తానె యా రోమది అక్కు నాను పొందిత”, ఇహిజ్ పవులు, “నాను ఇహిజి పుట్టివలెహానె రోమదిజ్ అక్కు మన్నికాన్” ఇహాన్.

29 అందెజె పవులు వెట డటిసి వెహెజ్ వాతికార్ వెటనె వన్నిజ్ డిస్త సితార్. రోమదిజ్ అక్కు మన్ని వన్నిజ్ గొలుస్కాణిజ్ తొహ్పిస్త మహ ఇజి నెసి అయ రోమ సయ్నమ్ది పెరి అతికారి తియెలాతాన్.

పవులు యూద పెద్దెల్జ నడిమి వర్గిజినాన్

30 మహ్నా నాండిజ్, పవులు ముస్కు యూదురు ఇని నేరం మొప్పారొ ఇజి నెస్తెజ్ అయ రోమ పెరి అతికారి ఆస ఆతాన్. అందెజె పవులు డిబిస్తాన్. పెరి పుజేరిజ్ని సంహద్రి నజమ్దిజ్ కూక్పిస్తాండ్రె

‘మీటిజ్ కినాట్’ ఇజి ఆడ్ర సిత్తాన్. వారు కూడఃజి వాతివలె పవులుజ్ వరి ముందాల నిల్వ్వాన్.

23

1 పవులు సంహద్రి సజమ్దివరిజ్ తినాజ్ సుడఃజి ఈహు వెప్టాన్, “తంబెరిజాండె, గడిఃస్తి సొహి దినమ్కు విజు నాను దేవుణు ఎద్రు నా గర్బం గదిన్ఏండ మహా”.

2 అయావలె విజేరె పుజేరిజ ముస్కు పెరి పుజేరి ఆతి అననియ పవులు డగ్రు నిల్పిమహివరివెట, “వన్ని వెయ్యు డెయ్అ”, ఇజి ఆడ్ర సిత్తాన్.

3 దన్నిజ్ పవులు, “నీను తెలాజ్ దూల్లి రాస్తి గోడ్డః* నన్నికి. దేవుణు నిజి డెయ్నాన్లె. మోసె సిత్తి రూలుజ్ తగితివజ నజి తీర్పు కిదెజ్ నీను బస్తిమన్ని. గాని మోసె సిత్తి రూలుదిజ్ తగ్ఏండ నజి డెయ్డెజ్ ఆడ్ర నీజినిదా?”, ఇహాన్.

4 పవులుడగ్రు నిహికార్, “నీను దేవుణు పెరి పుజేరిదిజ్ దుసలాడిఃజినిదా?”, ఇహాన్.

5 దన్నిజ్ పవులు, “తంబెరిజాండె, వాండ్రు విజేరె పుజేరిజ ముస్కు పెరి పుజేరి ఇజి నాను నెన్ఏత. మీ లోకాజ్ ఏలుబడిః కినివరిజ్ దుసలాడిఃజినిక ఆవద్ ఇజి దేవుణు మాటదు రాస్త మనాద్ గదె”, ఇహాన్.

6 యూద పెద్దెల్జ పెరి సజమ్లోఇ సెగొండార్ పరిసయ్రు, సెగొండార్ సదుకయ్రు ఇజి పవులు నెస్తాన్. నెస్తాండ్రె వెనుక పవులు డటం వెప్టాన్, “తంబెరిజాండె, నానుబా పరిసయ్ వాండ్రునె, పరిసయ్వన్నిజ్ పుట్టికాన్. దేవుణు సాతివరిజ్ నిక్వాన్ ఇజి నాను నమ్మిజిన. అక్క నాను ఎద్రు సుడఃజి మంజిన. దన్నివందిజ్ నాముస్కు తప్పు మొప్పి తీర్పు కిజినార్”.

7 పవులు యాక వెస్తివలె పరిసయ్రుజ సదుకయ్రుజ నడిఃమి గొడఃబ పుట్టాద్. గొడఃబ పుట్టాదె వారు రుండి జటుజ్ ఆతార్.

* 23:3 23:3 పవులు కోపమాజి వెప్టి మాటెజ్

8 (ఎందానిజ్ ఇహిజ సాతికార్ మర్జి బత్కిఎర్, దూతార్ సిల్లు, దెయమ్కు సిలు ఇజి సదుకయ్రు వెప్పినార్. పరిసయ్రు ఇహిజ అక్సెజ్ విజు మన్నె ఇజి వెప్పినార్).

9 అయావలె అబ్బె గొప్ప గగోల్ ఆతాద్. పరిసయ్రులోఇ సెగొండార్ దేవుణు మోసెజ్ సీత్తి రూలుజ్ నెస్పిసినికార్ నిజిత్తారె, “మాపు సుడెఃతిజ్, యా లోకు ముస్కు ఇని తప్పుబా తోర్ఎద్. ఒరెన్ దూత గాని ఉండ్రె తోర్డెజ్ అల్ఠకాద్ గాని వన్నివెట వర్గితాద్ను, ఇజి గొడెబెజ్ ఆతాద్.

10 వరి లొఇ గొడెఃబ లావాత్తిజ్ వారు పవులు కిన్ను విసీర్పారెను ఇజి తియెలాతాండ్రె అయ రోమ సయ్నమ్ది పెరి అతికారి సయ్నమ్ది వరిజ్ పొక్తాండ్రె పవులుజ్ వరి నడిఃమిహన్ లాగ్గి బారిగొడెః లొఇ తత్తెజ్ ఆడ్ర సిత్తాన్.

11 ఆ పొదొయ్ ప్రబు పవులు తోరె ఆతండ్రె, “దయ్ఠం ముస్కు మన్అ. నీను యెరూసలేమ్దు నావందిజ్ ఎలాగ సాసి వెప్తిదొ అయావజెనె రోమ పట్టుమ్దుబా సాసి వెహ్అ”, ఇజి వెప్తాన్.

పవులు సప్తెజ్ యూదురు కుత్త కిత్తార్

12 మర్చ నాండిజ్ పెందల సెగొండార్ యూదురు కూడిఃతారె, ‘మాటు పవులు సప్వండ ఉండెజ్ తిండ్రెజ్ ఆవద్’ ఇజి ఒట్టు కిత్తార్ పవులు సప్తెజ్ ఇజి పూర్తి తెగిస్తార్.

13 పవులుజ్ సప్తెజ్ ఆలోసనం కిత్తికార్ నల్పయ్ ముస్కు మొగావారు మహోర్.

14 వారు పెరి పుజేరిజబాన్ పెద్దెలుజబాన్ సాహరె వెప్తార్, “మాపు పవులుజ్ సప్వండ ఇనికబా తిన్వీవ్ ఉణ్ఎవ్, ఇజి గటిజ ఒట్టు కిత మహావ్.

15 అందెజె మీరు, సంహద్రి సజమ్దికార్ విజెరె కూడెఃజి రోమ సయ్నమ్ది పెరి అతికారి వన్నిజ్ కబ్బు పొక్అ. అక్క ఇనిక ఇహిజ, పవులు మరి మాబాన్ రపెన్ ఇండ్రు. వన్నివెట మరి వర్గిజి వన్ని వందిజ్ మాపు విజు నెస్సెజ్ ఇజి నాటిస్సాట్. వాండ్రు ఇబ్బె అందివండెనె మాపు వన్నిజ్ సప్తెజ్ తయారాజి మనావ్”.

16 గాని పవులుజ్ బణిజ ఆతికాన్ యాక నెస్తాండ్రె సెల్వ లొస్తాండ్రె బారిగోడః లొఇ సొన్ని పవులుజ్ వెహ్లాన్.

17 అయావలె పవులు సదాతిపతిర్ లొఇ ఒరెన్ వన్నిజ్ కూక్తాండ్రె, “యా దజ్డెజ్ రోమ సయ్ నమ్ది పెరి అతికారిబాన్ ఒఅ. పెరి అతికారి వెట విన్నిజ్ ఉండ్రె మాట వెహ్లాజ్ మనాద్” ఇహాన్.

18 వెహ్లాజ్ అయ సతాతిపతి అయ దజ్డెజ్ పెరి అతికారిబాన్ ఒతాన్. ఒతండ్రె, “జెలిదు మన్ని పవులు నజీ కూక్తాండ్రె యా దజ్డెజ్ మీబాన్ ఒతెజ్ ఇజి వెహ్లాన్. యా దజ్డెజ్ మీ వెట ఇనికాదొ వెహ్లాన్”, ఇజి వెహ్లాన్.

19 అయ పెరి అతికారి అయ దజ్డెజ్ కీదు అస్తాండ్రె ఉండ్రె పడఃకాద్ ఒతాన్. “నా వెట వెహ్లాజ్ ఇని మాట మనాద్?”, ఇజి వన్నిజ్ వెన్బాతాన్.

20 వెన్బాతిజ్ అయా దజ్డెజ్ యెన్, “విగెహిజ్ పవులుజ్ సంహద్రి సజం నడిఃమి తసి వన్ని వందిజ్ మరి నెస్తెజ్ ఇజి నాటిసి వన్నివెట మరి వర్గిదెజ్ నీబాన్ సెలవ లొస్తెజ్ ఇజి యూదురు ఒపుకొట మనార్.

21 గాని నీను వరిజ్ సరి సీమ. ఎందానిజ్ ఇహిజ నలపయ్ మణిసిరిజ్ ముస్కు మొగావారు, పవులు సవ్విండ మాటు ఉండెజ్ తిండ్రెజ్ ఆవిద్ ఇజి ఒట్టు కితారె వన్ని వందిజ్ సరిదు సుడఃజినార్. వారు వన్నిజ్ సప్తెజ్ తయారాత మనార్. మీమాటదిజ్ కాప్కిజినార్” ఇహాన్.

22 యాక వెహండ్రె అయ పెరి అతికారి, “నీను నజీ యాక వెహ్లా ఇజి ఎయెజ్బా వెహ్లా”, ఇజి గటిజ వెహ్లాండ్రె అయ దజ్డెజ్ యెనుజ్ పొక్తాన్.

23 వెనుక అయ పెరి అతికారి సదాతిపతిర్ లొఇ రిఎరిజ్ కూక్తాండ్రె, “యా పొదొయ్ తొమ్మిది గంటెజ కయ్ సరియ దాక సొండ్రెజ్ తయార్ ఆదు. రుండి వందెజ్ సయ్ నమ్దికార్, డబయ్ మణిసిర్ గుర్రమ్దాన్ సొని సయ్ నమ్దికార్, రుండి వందెజ్ బల్లెమ్కు అస్తికార్ సొండ్రెజ్ వలె.

24 పవులుజ్ ఎకిసి ఒతెజ్ గుర్రమ్కు సీదు. వన్నిజ్ గవర్నరు ఆతి పేలిక్కుబాన్ ఇని ప్రమాదం రెవిండ ఒతెజ్”, ఇజి వెహ్లాన్.

25 అయి పెరి అతికారి ఈహె ఉండ్రీ ఉత్తం రాస్తాన్,

26 “క్లవుదియ లూసియ ఆతి నాను గొప్ప పేరు మన్ని పేలిక్కు గవర్నరిజ్ వందనమ్కు వెహ్సిన.

27 విన్నిజ్ యూదురు అస్తారె సప్తెజ్ సుడెఃతిజ్ నాను నా సయ్నమ్దివరివెట వాతానె విన్నిజ్ గెల్పిస్త. ఎందనిజ్ ఇహిజు విండ్రు రోమదిజ్ అక్కుమన్నికాన్ ఇజి నాను నెస్త.

28 విని ముస్కు యూదురు ఎందనిజ్ నేరం మొప్పినార్ ఇజి నెస్తెజ్ నాను విన్నిజ్ యూదురి సంహద్రి సజమి నడిమి ఒత.

29 ఒతిజ్, యూదురి రూలుజలోఇ మన్ని ఇనికెజ్ వందిజ్ వారు విన్నిజ్ నేరం మొప్తార్ గాని, సప్తెజ్నో, జెలిదు పొక్తెజ్నో తగితి తపుజ్ తోర్ఉతె.

30 విన్నిజ్ సప్తెజ్ ఇజి యూదురు కుట్ర కిజినార్ ఇజి నాను నెస్తానె వెటనె విన్నిజ్ నీబాన్ పొక్కిన. విని ముస్కు నేరం మొప్తికార్బా నీబాన్ వాజి వన్ని ముస్కు మన్ని నేరమ్కు విజు వెహ్తెజ్ నాను వరిజ్ ఆడ్ర సిత్త”.

31 అయి రోమ సయ్నమ్ది పెరి అతికారి ఆడ్ర సిత్తిలెకెండ్ సయ్నమ్దికార్ పవులు ఆ పొదొయ్నె అంతిపత్రి ఇని పట్నమ్దాక కూక్ ఒతార్.

32 మహ్సా నాండిజ్ వారు పవులు గుర్తమ్కు అస్తి సయ్నమ్ది - వరివెట పొక్తారె మహికార్ మర్జి వాతార్.

33 వారు కయ్సరియదు అందితిజ్ అతికారి పొక్తి ఉత్తం గవర్నరిజ్ సితార్. పవులుజ్బా గవర్నరుబాన్ ఒపజెప్తార్.

34-35 గవర్నరు అయి ఉత్తం సద్వితాండ్రె పవులు వెట, “నీను ఎమేణి ప్రాంతమ్దికి”, ఇజి వెన్బాతాన్. “కిలికియదికాన్”, ఇజి వెహ్తెజ్, “నీ ముస్కు నేరం మొప్తికార్ వానివలె నీ సజతి సూణ ఇజి వెహ్తాన్. పవులు హేరోదు రాజు పెరిఇండ్రో ఇడ్జి కాప్ కిజి మండ్రెజ్ ఆడ్ర సిత్తాన్.

పేలిక్కు గవర్నరుబాన్ పవులు నిల్సినాన్

1 అయ్దు రోస్కు సొహిజ్ విజేరె పుజేరిజ ముస్కు పెరి పుజేరి ఆతి అననియ, వన్నివెట సెగొండార్ యూద పెద్దెలుజు, తెర్తుల ఇని ఒరెన్ తగ్గు వర్గనికాన్, డిఃగు మన్ని కయ్సరియాదు వాతార్. వాతారె పేలిక్కు గవర్నరుబాన్, పవులు వందిజ్ మొప్తి నేరమ్కు వెప్తార్.

2-3 పవులుజ్ కూక్పిసి కోర్టుదు నిల్ప్తాన్. అయావలె తెర్తుల ఇని తగ్గు వర్గనికాన్ పవులు వందిజ్ ఈహె నేరం మొప్తెజ్ మొదొల్స్తాన్, “పెరి పేరు మన్ని గవర్నరు ఆతి పేలిక్కు, నీను నండొ కాలం ఏలుబడిః కిజినిజ్ మాపు సమదానమ్దాన్ మంజి - నాప్. మా జాతివందిజ్ మీరు బాగ కిత్తిజ్ మజి నెగ్గెండ బత్తిదెజ్ అవ్సరం ఆతికెజ్ విజు మన్నె. మాపు విజెవె మీరు కిత్తి యా నెగ్గి పణిదిజ్ ఒప్పుకోడెఃజి నిజి వందనమ్కు వెప్పినాప్.

4 గాని నాను ని పణిదిజ్ అడ్డు కివండ, మాపు ఎందానిజ్ మీబాన్ వాతాపొ అయ సజతి వందిజ్ వర్గిన. దయ కిజి వెన్అ.

5 యా పవులు గొప్పు గొడఃబ కినికాన్. లోకం విజు యూదురి నడిఃమి గొడఃబెజ్ రేప్పికాన్. వీండ్రు నజరేతుది జటుదిజ్ నెయ్యి. యాక విజు మాపు నెసినాప్.

6-7 విండ్రు యెరూసలేమ్దు మన్ని దేవుణు గుడిఃదిజ్ మయ్లు కిదెజ్బా సుడఃతాన్. అందెజె మాపు విన్నిజ్ అస్తాప్. గాని రోమ సయ్నమ్ది పెరి అతికారి లూసియ వాతండ్రె మాబాణిజ్ విన్నిజ్ లాగితాన్.

8 నీను విన్నిజ్ వెన్బాఅ. మాపు విన్నివందిజ్ వెప్పికెజ్ విజు నిజమె ఇజి నిజి నెస్తెజ్ ఆనాద్”.

9 తెర్తుల వెప్తి మాటెజ్ విజు నిజం ఇజి బానె వాతిమహి యూదురుబా ఒప్పుకోటార్.

10 పవులు వర్గిదెజ్ గవర్నరు సయ్న కిత్తిజ్ పవులు వర్గిదెజ్ మొదొల్స్తాన్, “గవర్నర్ ఆతి పేలిక్కు, నీను నండొ పంటెజ్ యా యూదురి లోకాజ్ నెగ్గెండ ఏలుబడిః కిజిమహి. అందెజె నాను దయ్నమ్దాన్ వెప్పిన.

11 నాను యెరూసలేమ్ దేవుణు గుడిఁదు పార్దనం కిదెజ్ సొహిజ్ ఏలు వనెండు రోస్కునె ఆతె ఇజి విరిజ్ వెన్ బాతిజ నీను నెన్సి.

12 దేవుణు గుడిఁ లోఇబా, యూదురి మీటిజ్ ఇండ్రోబా, పట్టుమ్ దుబా నాను ఎయెన్ వెటబా లోకురిజ్ నెక్తి పొక్తిక, జటు కిజి రేప్పిక, ఇనికబా యూదురు సుడఁవెతార్.

13 ఏలు నావందిజ్ వీరు వెప్పికెజ్ నిజం ఇజి రుజుప్ కిదెజ్ వీరు అట్ వీర్.

14 గాని నాను ఉండ్రీ నిజం మాట వెప్పా. అక్క ఇనిక ఇహిజ. నిజం అవిద్ ఇజి వీరు వెప్పిని బోదవజ నాను నడిఁజిన. ఆహె నడిఁజి దేవుణు మోసెజ్ సిత్తి రూలుజ్ వజ విజు, ప్రవక్తరు రాస్తికెజ్ విజు నాను నమ్మిజి మా అనిగొగొర్ పొగడిఁజి మాడిఁస్తి దేవుణుదిజ్ పార్దనం కిజిన.

15 వీరు నమ్మినివజ నెగ్గికార్, సెఇకార్ విజేరె సాతి వరిబాణిజ్ మర్జి నిజ్ నార్ ఇజి నానుబా దేవుణుదిజ్ నమ్మిజి ఆసదాన్ ఎద్రు సుడఁజిన.

16 అందెజె నాను, దేవుణు ఎద్రుగాని, లోకుర్ ఎద్రుగాని నా గర్బం గదిన్ ఏండ మండ్రెజ్ సుడఁజిన.

17 సెగం పంటెజ్ సొహి వెనుక ఏలు నాను నా సొంత జాతిజ్ సాయం కిదెజ్, దేవుణు గుడిఁదు పూజ కిదెజ్ యెరూసలేమ్ దు వాత.

18-19 దిన్ని వందిజ్ నాను దేవుణు గుడిఁదు సొహిమహిజ్, సుబ్బరం ఆతి వెనుకానె యూదురు నజి బాన్ సుడఁతార్. అయావలె నావెట మంద లోకుర్ ఎయెర్ సిల్లెతార్. ఇని గొడఁబ జర్గివెతాద్. గాని నాను బాన్ మహివలె ఆసియ దేసెమ్ దాన్ వాతిమహి సెగొండార్ యూదురు, బాన్ మహారె నా ముస్కు గొడఁబ ఆతార్. నా ముస్కు వరిజ్ ఇని నేరం మహిజ వారె వాజి నీ వెట వర్గిదెజ్.

20 సిలిజ నాను సంహద్రి సజమ్ దు వర్గిజి మహిజ్ ఇని తప్పు వర్గిత ఇజి వీరు వెహిర్.

21 గాని ఉండ్రీ మాట నాను వెప్తా. అక్క ఇనిక ఇహిజ, సాతి లోకుర్ మర్జి బత్తి నార్ ఇజి నమ్మినివందిజ్ వీరు నేండ్రు నజి తీర్పు కిజినిదెర్ ఇజి నాను బానె డటం వెప్తా మహా”.

22 పవులు వెహ్తి బోదవందిజ్ గవర్నరాతి పేలిక్కు నెగ్రెండ్ర నెస్త మహాన్. అందెజె వాండ్రు, “రోమ సయనమది పెరి అతికారి ఆతి లూసియ వానివలె తీర్మానం కిస”, ఇజి వెహ్తాండ్రె అయ నద్రు మీటిజ్ ముగిస్తాన్.

23 వెనుక పవులు జేలిదు ఇడజి వన్నిజ్ కాపు ఇడదెజ్ నదాతిపతిజ్ ఆడ్ర సిత్తాన్. వన్ని లోకుర్ వాజి వన్నిజ్ సుడెజి వన్నిజ్ సాయం కిదెజ్ అడ్డు కిమాట్ ఇజి ఆడ్ర సిత్తాండ్రె వన్నిజ్ కండెక్ సరి సిత్తాన్.

24 సెగం రోస్కు సాహిజ్ పేలిక్కు వన్ని ఆల్ని ఆతి ద్రుసిలవెట వాతాన్. అది యూదురి అయ్లి కొడెః. పేలిక్కు పవులుజ్ కూకపిస్తాన్. యేసు క్రీస్తు ముస్కు మన్ని నమకంవందిజ్ పవులు వెహ్తాండ్రె వెంజి మహాన్.

25 గాని పవులు సరియాతి పణి కిని వందిజ్, మన్నుదిజ్ అణసె ఆజి ఇడ్చివందిజ్, దేవుణు, లోకుర్ ముస్కు కిని తీర్పువందిజ్ గటిజి వర్గితిజ్ పేలిక్కు తియెలాతాండ్రె, “అనె, ఏలు సాన్అ. మరి ఒర్పు టయం మహివలె కూకపిస్తాన్”, ఇజి వెహ్తాండ్రె పోక్తాన్.

26 పవులు నజి డబ్బు సీనాన్సు ఇజిబా పేలిక్కు ఒడిఃఒడిఃబితాన్. అందెజె పవులు మాట మాటదిజ్ కూకపిస్తాండ్రె వన్నివెట వర్గితాన్.

27 రుండి పంటెజ్ సాహిజ్, పేలిక్కు వెనుక పోర్కియు పెస్తు ఇనికాన్ గవర్నరు ఆతాన్. పేలిక్కు యూదురిజ్ సర్ద కిబిస్తెజ్ పవులుజ్ జెలిదునె ఇట్టాన్.

25

పవులు పెస్తు ఎద్రు నిల్సినాన్.

1 పోర్కియు పెస్తు అయ ప్రాంతమదిజ్ గవర్నరు ఆజి మూండ్రె రోస్కు సాహిజ్ వాండ్రు కయ్సరియాదాన్ ఎక్కి యెరూసలేమదు సాహాన్.

2 బానె పెరి పుజేరిజు యూదురి పెద్దెలుజు పవులు ముస్కు మహి తప్పుజవందిజ్ గవర్నరుజ్ వెహ్తార్.

3 “దయ కిజి పవులు యెరూసలేమ్దు షోక్అ”, ఇజి వారు గవర్నరుబాన్ నండో సుట్కు బతిమాలితార్. ఎందానిజ్ ఇహిజ పవులుజ్ సర్దు సప్పాప్ ఇజి వారు కుట్ట కిజి మహార్.

4 గాని గవర్నరు, “పవులు కయ్సరియాదు కాప్ ఇట్టా మనాద్. నాను వెటనె బానె సొన్నిన.

5 అందెజె మీలోఇ మన్ని పెరిలోకుర్ నావెట బానె సొండ్రెజ్. పవులు ముస్కు ఇని తప్పుబా మహిజ వీరు కోర్టుదు నేరమ్కు తోరిస్తెజ్ ఆనాద్” ఇహోన్.

6 గవర్నరు వరివెట ఎనిమిదినో పది రోస్కునో మహి వెనుక, డిగు కయ్సరియాదు సొహోన్. మహ్నా నాండిజ్ కోర్టుదు సొహొండ్రె తీర్పు కిదెజ్ ఇజి, తీర్పు కినిబాన్ బస్తాన్. ‘పవులు కోర్టుదు తగాట్’ ఇజి ఆడ్ర సితాన్.

7 పవులు వాతిజ్ యెరూసలేమ్దాన్ డిగు వాతి యూదురు వన్ని సుటులం నిహారె వన్ని ముస్కు నండో రకమ్ది బల్మె ఆతి తప్పుజ్ మొప్టార్ గాని అక్కెజ్ నిజం ఇజి రుజుప్ కిదెజ్ వారు అట్ఎతార్.

8 పవులు, “నాను యూదురు రూలుజ్ వందిజ్ గాని, యెరూసలేమ్దు మన్ని దేవుణు - గుడివందిజ్ గాని, రోమ దేసెమ్దిజ్ ఏలుబడి: కిని కయ్సరువందిజ్ గాని ఇని తప్పుబా కివిత”, ఇజి వన్ని వందిజ్ వాండ్రె వెహ్తాన్.

9 నాను నెగ్గికాన్ ఇజి యూదురు ఒడిబిదెజ్ ఇజి గవర్నరు సుడ్జెతాన్. అందెజె వాండ్రు పవులు వెట వెన్బాతాన్, “యెరూసలేమ్దు సొన్ని బానె నీ వందిజ్ వీరు వెహ్పికెజ్ నిజమ్నో అబద్దమ్నో ఇజి నాను తీర్పు కిదెజ్ నీను ఒప్పుకోడెజినిదా?”.

10 దన్నిజ్ పవులు, “రోమ రాజు ఆతి కయ్సరుది కోర్టుదు నిల్నిన. యా కోర్టుదునె నజి తీర్పు కిదెజ్. యూదురిజ్ ఇని తప్పుబా నాను కివిత. అక్క నీను నెగ్రిండ నెస్సిగదె.

11 నాను ఇని రూలుదిజ్బా తప్పిజ, సావుదిజ్ తగితి పణి కిత ఇహిజ, సిక్చదాన్ తపై ఆదెజ్ నాను సుడ్జెవి. గాని నా ముస్కు వీరు వెహ్పికెజ్ నిజం ఆఉ ఇహిజ నజి వరిజ్ ఒపజెప్పెజ్ ఎయెరిజ్బా అక్కు.

సిల్లెద్. నాను రోమ పెరి రాజు ఆతి కయ్సరుబాన్ సొండ్రెజ్ ఆజిన”, ఇహాన్.

12 అయావలె గవర్నరు వన్నివెటమహి లోకుర్ వెట వర్గితాండ్రె పవులుజ్, “నీను కయ్సరుబాన్ సొన్ని వెహైజ్ ఇజి వెహై. అందెజె కయ్సరుబానె సొన్అ”, ఇహాన్.

పెస్తు అగ్రిప రాజు వెట పవులువందిజ్ వెహ్సినాన్

13 సెగం రోస్కు సొహి వెనుక రాజు ఆతి అగ్రిప *వన్ని తజిసి ఆతి బెర్నికయువెట కొత్త గవర్నరు ఆతి పొర్కియు పెస్తుజ్ మాడిఃస్టెజ్ కయ్సరియాదు వాతార్

14 వారు పెస్తువెట నండొ రోస్కు మహార్. మహిజ్ పెస్తు పవులు వందిజ్ రాజు వెట వర్గితాన్, “గవర్నరు ఆతి పేలిక్కు పవులు ఇని ఒరెన్ వన్నిజ్ జెలిదు ఇడిఃస్తాన్.

15 నాను యెరూసలేమ్దు సొహివలె, యూదురి పెరి పుజేరిజు, పెద్దెలుజు విని ముస్కు నేరమ్కు మొప్తారె సిక్సనిఅ ఇహార్.

16 దన్నిజ్ నాను వరివెట వెహై, ‘రోమ అలవాటు ఇహిజ, నిందెజ్ మొప్పికార్ ఎయెన్ ముస్కు తప్పు మొప్పారొ, వాండ్రు వాజి వరి నడిఃమి వన్ని వందిజ్ వర్గిదెజ్ అవకాసం సివండ ముందాల్పె తీర్పు కిదెజ్ ఆవెద్’ ఇజి.

17 అందెజె వారు నావెట ఇబ్బె వాతివలె నాను ఆల్సెం ఆవండ మర్సనాండిజ్నె సద్దు కూడఃవ్తానె పవులు నాముందాల తప్పిస్త.

18 నేరమ్కు మొప్తికార్ నిహివలె నాను ఒడిఃబిత్తిలెకెండ వారు నేరమ్కు లొఱ ఉండ్రె నేరంబా వన్ని ముస్కు మొవ్వెత్తార్.

19 ఇహిజ, వరి మతంవందిజ్, సాతి సొహి యేసు ఇని ఒరెన్వందిజ్ పవులు వెట గొడఃబ ఆతికాదె తోరితాద్. పవులు ఇహిజ యేసు బత్కిజినాన్ ఇజి వెహ్సినాన్.

20 యా సజ్జతివందిజ్ మరి ఇనిక కిదెజ్ ఇజి నెన్వండ్రాతానె నాను పవులు వెట, ‘నీను యెరూసలేమ్దు సొన్ని బానె దిన్ని వందిజ్ తీర్పు తిరిసె ఆదెజ్ మన్ను ఆజినిదా?’, ఇజి వెన్బాత.

* 25:13 25:13 యూదయదెనెమ్దిజ్ ఎక్కు మన్ని ప్రాంతమ్కాజ్ వీండ్రు రాజు

21 గాని పవులు, 'రోమ రాజు ఆతి కయ్సరు నజి తీర్పు కిదెజ్' ఇజి వెహ్టిజ్ నాను వన్నిజ్ కయ్సరుబాన్ పొక్సేండ ఇబ్బె జెలిదునె ఇడ్దెజ్ ఆడ్ర సిత్త".

22 అగ్రిప రాజు పెస్తువెట, "అయ పవులు వెహ్టికెజ్ వెండ్రెజ్ నాను ఇస్టమాజిన" ఇహిజ్, "విగెహిజ్ నీను వెండ్రెజ్ ఆనాద్", ఇహాన్.

పవులు అగ్రిప రాజు ఎద్రు నిల్సినాన్

23 మహ్న నాండిజ్ అగ్రిప రాజుని, వన్ని తజిసి ఆతి బెర్నికయ రాజు వర్గిని అతికారం ఇండ్రొ వాతార్. వారు ఎసా గొప్ప పెరికార్ ఇజి తోరిసి కర్పు ఆతి రాజురి సొక్కెజ్ ఇట్కిజి, బజారం, వెండి ఇడ్కిజి రోమ సయ్నమ్ది పెరి అతికారి లోకుర్ వెట, పట్నమ్ది ముకెలమతివరివెట వాతార్. వాతారె పవులుజ్ తగ్అ ఇజి పెస్తు ఆడ్ర సిత్తిజ్ జమానుజ్ సొహారె పవులుజ్ వరి నడిమి తతార్.

24 అయావలె పెస్తు వెహ్టాన్, "అగ్రిప రాజు, మాబాన్ కూడేజి వాతిమహి విజు లోకాండె, మీరు యా పవులు సుడేజినిదెర్. యెరూసలేమ్దు మరి ఇబ్బెబా యూదురు విజేరె వీండ్రు బత్కినిక ఆవిద్ ఇజి గగోలాత్తారె నావెట పిరాడ్ కిత్తార్.

25 గాని సావుదిజ్ తగితిక ఇనికబా వీండ్రు కిఎతాన్ ఇజి నాను నెస్తానె రోమ రాజుబాన్ సొండ్రెజ్ వీండ్రు వెహ్టిజ్ రోమ రాజుబాన్ సొన్ని తీర్పు ఆపిద్ ఇజి నాను తీర్మానం కిత.

26 గాని నాను రోమ రాజుజ్ విన్నివందిజ్ ఇనిక రాస్తి పొక్తెజ్ ఇజి తోర్విత. తీర్పు కిదెజ్ తగితిక ఇనికబా విని ముస్కు సిల్లెద్. అందెజె మీరు విజెరి నడిమిని, అగ్రిప రాజు, నీ నడిమిబా విన్నిజ్ తత్త మన్న. మాపు విన్నివెట వర్గితివెనుక ఇనికబా రాస్తెజ్ నెస్నాను.

27 తొప్పి అసి తీర్పు కిదెజ్ పొక్తివన్నిముస్కు ఇని నింద మోస్తు మనాద్ ఇజి వెహ్విండ వన్నిజ్ కయ్సరుబాన్ పొక్తెజ్ ఆవిద్ ఇజి నాను నెస్నా".

26

1 అగ్రిప రాజు పవులుజ్ సుడేజి, "ఏలు నీ వందిజ్ వర్గిదెజ్ నాను

సరి సీజిన”, ఇజి వెహ్తాన్. అయావలె పవులు కియు సాప్తాండ్రె వన్ని వందిజ్ వాండ్రె ముదాయి ఇజి మొదొల్స్తాన్,

2 “అగ్రివ రాజు, యూదురు నా ముస్సు మొప్పి నేరమ్కు నిజం ఆవద్ ఇజి నావందిజ్ నీ ఎద్రు వర్గిదెజ్ నాను గొప్ప సర్ల ఆజిన.

3 ఎందానిజ్ ఇహిజ యూదురి అలవాటుజ్ విజు వరి గొడబెజ్ విజు నీను బాగ నెసినికి. అందెజె దయ కిజి నా మాట ఓరిసి వెండ్రు.

4 ఇజిరివలెహాన్ అసి నాను ఎలాగ మహ ఇజి, నా సొంత లోకుర్ నడిమి, నా సొంత దేసమ్దు, యెరూసలేమ్దుబా, ఎలాగ బత్తిజి మహ ఇజి, యూదురు విజేరె బాగ నెసినార్.

5 మా మతమ్దు పరిసయ్రి జటుదికార్ ఉండ్రె రూలుబా తవ్ఎండ నీతి నిజాతిదాన్ నడినార్. వరి లొఇ ఒరెన్వజ నాను బత్తిజి మహ ఇజి వారు నావందిజ్ సాసి వెహ్తాజ్ ఇహిజ, సాసి వెహ్తాజ్ అట్నార్. ఎందనిజ్ ఇహిజ, వారు మొదొహాన్ అసి నజి నెసినార్.

6 ఏలు ఇహిజ, దేవుణు మా అనిగొగొర్ వెట, సీనా ఇజి కిత్తి ఒట్టుదిజ్ ఎద్రుసుడెజి మహిదన్నివందిజ్ నజి తీర్పు కిజినార్.

7 మా పన్నెండు తెగ్గదికార్ యా ఒట్టువందిజె ఎద్రు సుడెజి దేవుణుదిజ్ రెయు పొగల్ డిన్ఎండ పార్లనం కిజి మంజినార్. ఓ రాజు, నానుబా ఆసదాన్ ఎద్రు సుడెజి మంజినిదన్నివందిజె యూదురు నా ముస్సు నేరం మొప్పినార్.

8 సాతివరిజ్ దేవుణు నిక్సాన్ ఇజి నమ్మిదెజ్ మాపు అట్ఎవ్ ఇజి మీరు ఎందనిజ్ వెహ్నినిదెర్?

9 నజరేతుదికాన్ యేసువందిజ్ వెహ్తామని విజు దన్నిజ్ నెక్కిపొక్తెజ్ నాను అట్టి వణి విజు కిదెజ్వలె ఇజి నానుబా ముందాల ఒడిబిజి మహ.

10 అయావజనె నాను యెరూసలేమ్దు కిత. పెరి పుజేరిజ్ నజి అతికారం సిత్తిజ్ నాను దేవుణుదిజ్ కేట ఆతి నండొండొరిజ్ జెలిదు ఇట్టా. అక్కాదె ఆవండ, వరిజ్ సప్తెజ్ తీర్మానం ఆతిజ్ ‘నానుబా ఒప్పుకొడెజిన’, ఇజి వెహ్తా.

11 నాను నండొ సుట్కు యూదురి మీటిజ్ ఇల్కాజ్ ఇల్కాజ్ సొన్ని నమ్మితి వరిజ్ గొప్ప మాలెజ్ కిత. యేసు ముస్సు నమకం ఇడ్ఎవ్

ఇజి వారు వెహ్పిదాక నాను బలవంతం కిత. అక్కాదె ఆవిండ వరి మున్ను ఒదె కోపం ఆతానె, ఆఇ పట్టుమ్కాజ్బా సొహానె బాన్బా మాలెజ్ కిత”.

పవులు ఎలాగ యేసుప్రబుజ్ నమ్మితికాన్ ఆతాన్ ఇజి వెహ్పినాన్

12 “ఆహె నాను ఒర్పు, పెరి పుజేరిజు సిత్తి అతికారమ్దాన్ ఆడ్రదాన్ దమన్ను పట్టుమ్దు సొన్ని మహా.

13 ఓ రాజు, మదెనెం ఆతివలె సర్దు సొన్ని మహివలె, ఆగాసమ్దాన్ వాతి పెరి జాయ్ సుడేత. అయ జాయ్ పొద్దు జాయ్ ఇంక పెరి జాయ్. అక్క నజి సుటులం, నావెట మహివరి సుటులం డెయ్తాద్.

14 మాపు విజెపె బూమిదు అర్తాప్. అయావలె, ‘సవులు, సవులు, నీను నజి ఎందానిజ్ మాలెజ్ కిజిని? ముల్లు డుడ్డుదాన్ గుతివలె మరీజ వెనుక గుసె ఆతిజ నండో కస్టం తప్పిన్’, ఇజి అరామియ బాసాదు వెహ్పి మాట నాను వెహా.

15 ‘నీను ఎయి, ప్రబు’, ఇజి నాను వెన్బాతిజ్, ‘నీను మాలెజ్ కిజిని యేసు నానె’ ఇజి ప్రబు నావెట వెహ్హాన్.

16 ‘ఏలు నిజ్జి నిల్అ. నాను ఎందనిజ్ నిజి తోరె ఆత ఇహిజ, నావందిజ్ పణి కిదెజ్, నావందిజ్ నేండ్రు సుడేతికెజ్ విజెరిజ్ వెహ్పి, వాని కాలమ్దు నాను నిజి తోరిస్సికెజ్ విజెరిజ్ వెహ్పి నజి ఉండ్రీ సాసివజ మండ్రెజ్ నిజి నాను ఏర్పాటు కిజిన.

17 ఇస్రాయేలు లోకాణిజ్ నిజి నాను గెల్పిస్సు. యూదురు ఆఇ లోకాణిజ్ గెల్పిస్సు. యూదురు ఆఇవరినడిమి నాను నిజి పోక్కు.

18 ఎందానిజ్ నిజి పోక్కిన ఇహిజ, వారు సీకటిదాన్ జాయ్దు వాజి వరి కణెకెజ్ తోరె ఆదెజ్. వరిజ్ సయ్తాన్ సత్తుహాన్ దేవుణు దరోట్ మహ్తాజ్. నా మున్ను నమకం ఇడజి, వరి పాపమ్కు నొరె ఆదెజ్. నావందిజ్ కేట ఆతి వరివెట కూడేజి మండ్రెజ్. దిన్నివందిజె నిజి వరి నడిమి పోక్కిన’ ఇజి ప్రబు నావెట వెహ్హాన్.

19 అందెజె ఓ అగ్రిప రాజు, నాను ఆగాసమ్దాన్ వాతి అయ మాటెజ లొజిత్త.

20 లోజీత్తానె తొలిత దమస్కు పట్నమ్దు, వెనుక యెరూసలేం పట్నమ్దు, మరి యూదయ ప్రాంతం విజు, యూదురు ఆఇ వరిజ్బా నెస్పిస్త. ఇనిక నెస్పిస్త ఇహిజ, విజేరె, పాపమ్కు డిసి దేవుణు దరోట్ మర్లు ఇజి. పాపమ్కు డిసినిత్తిదన్నిజ్ తగితిలెకెండ్ నెగ్గి పణిజ్ కిదు ఇజి.

21 నాను ఈహె నెస్పిస్తి దన్నివందిజె యూదురు నజి యెరూసలేమ్దు మన్ని దేవుణు గుడిడు సుడతారె నజి అస్తారె సప్పెజ్ సుడతార్.

22 గాని గడఃస్తి సాహి కాలం విజు దేవుణు నజి తోడుః మహాన్. అందెజె నాను ఏలు ఇబ్బె నిల్ని తక్కువరివెట, పెరివరివెట నిజం వెప్పిన. వాని కాలమ్దు ఇనికెజ్ జర్గినెలె ఇజి ప్రవక్తరుని, మోసె వెప్పికెజె నానుబా వెప్పిన.

23 అక్కెజ్ ఇనికెజ్ ఇహిజ, క్రిస్తు నండొ మాలెజ్ ఆజి సాతాన్. సాతి వరిబాణిజ్ తొలిత నిజ్నాన్. నిజ్జి, యూదురిజ్, యూదురుఆఇవరిజ్ దేవుణు - దరోట్ సాండ్రెజ్ జాయ్ తోరిస్సాన్”.

24 పవులు ఈహె, వన్ని వందిజ్ వర్గిజి మహిజ్ పెస్తు, “పవులు, నీను వెరి వాండ్రు. నండొ సదు కిత్తిజ్ అక్క నిజి వెరి కిబినాద్”, ఇజి డటం వెప్తాన్.

25 దన్నిజ్ పవులు, “గొప్ప పెరికాన్ ఆతి పెస్తు, నాను వెరి వాండ్రు ఆవి. నాను నెగ్గిబుద్దిదానె నిజం వెప్పిన”, ఇహాన్.

26 “రాజు యా సజతిజ వందిజ్ నెసినాన్. అందెజె వన్నివెట దిన్ని వందిజ్ నాను అడ్డు సిల్లెండ వర్గిజిన. దిన్ని వందిజ్ ఇనికబా వన్నిజ్ డాజ్జి మనిక సిల్లెద్. ఎందనిజ్ ఇహిజ, జర్గితికెజ్ విజు ఉండ్రీ మూల పడకాద్ జర్గివితాద్.

27 ఓ రాజు, ప్రవక్తరిమాటెజ్ నీను నమ్మిజిని ఇజి నాను నెస్సా”.

28 దన్నిజ్ రాజు, “నిస్సా సులువుదాన్ నజి క్రిస్తు లోకు కిదెజ్ ఇజి నీను నజి ఒపిసినిదా?”, ఇహాన్.

29 “సులువుదానొ ఆలస్యమ్దానొ నీను ఒరిదె ఆవి, నేండ్రు నజి వెంజినికార్ విజేరె నా వజ ఆదెజ్ ఇజి నాను దేవుణుదిజ్ పార్దనం

కిజిన. గాని నా వజ గోల్స్కానిజ్ తోహె ఆదెజ్ పార్దనం కివ్”, ఇజి పవులు వెహ్హన్.

30 అయావలె రాజు, గవర్నరు, బెర్నిక, వరివెట బస్తి మహికార్ విజేరె నిజిత్తార్.

31 వారు వెల్లి వాతారె, “వీండ్రు సావుదిజ్ గాని, తోహె ఆదెజ్ గాని తగితి పణి ఇనికబా కివ్తాన్”, ఇజి ఒరెన్ వెట ఒరెన్ వర్గితాన్.

32 “వీండ్రు ‘కయ్సరు రాజుబాన్ సొన’, ఇజి వెహ్హండ్ మహాన్ ఇహిజ విన్నిజ్ డిస్తిసిత్తిక మరి”, ఇజి అగ్రిప రాజు పెస్తుజ్ వెహ్హన్.

27

పవులు ఓడః ఎక్కి రోమ పట్నం సొన్నినాన్

1 మాపు ఓడః ఎక్కి ఇటలి దేసెం సొండ్రెజ్ ఇజి ఆడ్ర వాతిజ్, పవులుజ్, మరి జెలిదు మహి సెగొండారిజ్ యూలి ఇని నదాతిపతిజ్ ఒపజెప్తార్. వాండ్రు రోమ సయ్నమ్లోఇ ఉండ్రీ గుంపు ఆతి అవ్గుస్తు ఇని గుంపుదికాన్.

2 మాపు అద్రమత్తియదాన్ వాతి ఉండ్రీ ఓడః ఎక్తాపె పయ్నం ఆతాప్. యా ఓడః ఆసియ ప్రాంతమ్దు సమ్దరం డగ్రు మహి పట్నమ్కాజ్ సొనిక. దెసలోనిక పట్నమ్దాన్ ఒరెన్ మసిదోని దేసెమ్దికాన్ అరిస్తర్కు ఇనికాన్ మావెట మహాన్.

3 మహ్సా నాండిజ్ సీదోసు ఇనిబాన్ వాతాప్. సతాతిపతి ఆతి యూలి పవులు ముస్కు దయ తోరిస్తాండ్రె పవులు వన్ని కూలబాబుర్బాన్ సొన్ని వారు వన్నిజ్ నెగ్రెండ సుడఃదెజ్ సెల్వ సిత్తాన్.

4 వెనుక బాణిజ్ సోతాపె కుప్ర ఇని ద్వీపు ఓరమ్దాన్ గాలి తక్కు మహి బాడ్డిదు పయ్నం ఆతాప్. ఎందానిజ్ ఇహిజ ద్వీపుదాన్ గొప్ప గాలి సమ్దరం దరోట్ డెయ్జి మహాద్.

5 వెనుక మాపు కిలికియ, పంపులియ ఇని ప్రాంతమ్కాజ్ డగ్రు మహి సమ్దరం డాట్టాపె లుకియాదు మన్ని మూర ఇని పట్నమ్దు వాతాప్.

6 బానె అలెక్సాండ్రోస్ వాతి ఉండ్రె ఓడః ఇటలి పట్నం సొండ్రెజ్ తయారాత మనాద్ ఇజి రోమ సతాతిపతి సుడఃతాన్. సుడఃతండ్రె మజీ అయ ఓడఃదు ఎక్సిస్టాన్.

7 మాపు నండ్రె రోస్కు మెలేక పయనం కిత్తాపె గాలివందిజ్ మాలెజ్ ఆతాపె క్షీదు ఇని ద్వీపుదిజ్ ఎద్రు వాతాప్. గాలి మజీ ఎద్రు డెయ్తిజ్ అయా సరి మరి సొండ్రెజ్ అట్వెతాప్. అందెజె మాపు గాలి తక్కు డెయ్తిమహి బాడ్డిదాన్ సోహాపె సలోను ఇని బాడ్డి డాట్టి క్రేతు ద్వీపు ఓరదాన్ పయనం కిత్తాప్.

8 గాలి డెయ్తిజ్ మాలెజ్ ఆజి, ఓరదాన్ పయనం కిత్తాపె నెగ్గిబాడ్డి ఇని కూక్కి జాగదు వాతాప్. దన్ని డగ్రు లుసెయ పట్నం మహాద్.

9 పయనం కిజినిజ్ నండ్రె రోస్కు ఆతె. యూదురి పండ్రెయ్ ఆతి ఉపాసి రోజుబా గడఃస్త సోహాద్. సమ్దరమ్దు ఓడఃదు సొండ్రెజ్ ప్రమాదమాని కాలం ఆత మహాద్. అందెజె పవులు పరిజ్ బుద్ది వెహ్తాన్.

10 “బాబురాండ్రె, మాటు ఏలు సొన్ని మహిజ ఓడఃదిజ్ని ఇబ్బె మన్ని సామానమ్కాజ్, పు నస్టమ్కు, మరి మా పాణమ్కాజ్బా నస్టమ్కు వానాద్, ఇజి నాను నెస్నా”.

11 గాని అయ రోమ సతాతిపతి పవులు వెహ్తి మాట అన్ఎండ, అయ ఓడః నడిఃపిసినివన్ని మాటెజ్ని అయ ఓడః ఎజుమాని మాటెజ్ అస్తాన్.

12 పిన్ని కాలమ్దు మండ్రెజ్ అయా బాడ్డి నెగ్గికాద్ ఆవద్ ఇహిజ్ బాణిజ్ డిసి సోతెజ్ నండ్రెండ్రార్ వెహ్తార్. క్రేతదు మన్ని పీనిక్కు ఇనిబాన్ అందిజి బానె పిన్ని కాలం గడఃప్పాట్ ఇజి వారు విజేరె ఒడిఃబితార్. యా పీనిక్కు పట్నం దసిణ పడఃమర, ఉస్సన్ పడఃమర దరోట్ మొకొ మహ్తా మహాద్.

సమ్దరమ్దు ముసూర్ డెయ్జినాద్

13 దసినా దరోటాణ్ ఉండ్రి ఇజిరి గాలి డెయ్తిజ్ వారు సొండ్రెజ్ ఒడెబిత్తిలెకెండ్ సొనాట్ ఇజి ఒడిబిత్తారె, ఒడెది లంగరు* లాగితారె సొత్తార్. క్రేతు ఒర దానె సొన్ని మహార్.

14 గాని సణెం వెనుక ఉస్సున్ తూర్పు దరోటాణ్ ఊరకులోన్† ఇని పెరి గాలి ద్వీపుదాన్ గొప్పజ్ డెయ్తూద్.

15 పెరి గాలి ఒడెదిజ్ డెయ్తిజ్ గాలి ఎద్దు సొండ్రెజ్ అట్ఎండాతాద్. అందెజె మాపు గాలి ఎద్దు సొండ్రెజ్ అట్ఎండాతానె గాలి డెయ్తి మహి దరోట్టై ఒడె మహ్తాపె సొహవ్.

16 వెనుక కంద ఇని ఉండ్రి ఇజిరి ద్వీపు ఒరదాన్ సొహివలె అయ గాలి మా ముస్సు డెయ్విండ అయ ద్వీపు మజి ముస్తాద్. నండొ కష్టబాడితాపె ఇజిరి ఒడెదిజ్ ముస్సు లాగితావ్.

17 ముస్సు లాగితాపె నెగ్రెండ తొహ్తా ఇథ్తావ్. వెనుక పెరి ఒడెదిజ్ పెరి నాసుదాన్ సుటులం గటిజ తొహ్తార్. మరి సుర్తిసు ఇని ఇస్సు మెటు ముస్సు ఒడె డెయ్నాద్ను ఇజి తియెలాతారె ఒడె మెలేక సొనీద్ ఇజి ఒడెది సాహ‡ డిష్టారె గాలి డెయ్నిదరోట్ సొనీద్ ఇజి డిష్టార్.

18 అయ ముసూర్ డిన్విండ డెయ్జి మహిజ్ మహ్నా నాండిజ్ వారు ఒడెదు మహి బరుజ్ సమ్దరమ్దు విసీర్లెజ్ మొదొల్స్తార్.

19 దన్ని మహ్నా నాండిజ్ వారు ఒడె నడపిసిని సెగం సామనమ్కు వరి సొంత కికాణిజ్ సమ్దరమ్దు విసీర్తార్.

20 నండొ రొస్సు పొద్దు గాని సుక్కెజ్ గాని తోర్విండ మహె. గాలి గొప్పజ డెయ్జి మహద్. మా పాణమ్దిజ్ ఎలాగ గెల్పిస్తెజ్, మాపు సానాప్లెసు ఇజి తియెలాతావ్.

21 వారు నండొ రొస్సు బోజనం కివిండ మహిజ్ పవులు వరి నడిమి నిహండ్రె వెహ్తాన్, “బాబురాండె, మీరు నామాట

* **27:13 27:13** బరుమన్ని పణుకుదాన్ తయార్ కిత్తిక. గొలుస్సాణ్ తొప్పి ఒడెదు ఇథ్తార్. సమ్దరమ్దు డిష్టెజ ఒడె బానె నిల్వాద్దె, సొన్విద్ † **27:14 27:14** ఊరకులోన్ ఇని తుపాన్ గాలి డెయ్జి ఒడె సొండ్రెజ్ గొప్ప కష్టమానాద్. అయ గాలి ఉస్సున్ తూర్పు దరోటాణ్ డెయ్తూద్ ‡ **27:17 27:17** గాలి వాజి నెక్కి ఒనిదన్నిజ్ ఒడెదిజ్ తెరలెకెండ్ తొహ్తాక

వెంజిమంజునిక ఇహిజ నెగ్రెండ మహాద్ మరి. క్రేతుదాన్ సోవిండ మహిదెర్ మరి. సోవిండ మంజునిక ఇహిజ, యా నస్టమ్కు కస్టమ్కు జర్గివండాతాద్ మరి.

22 ఏలు ఇహిజ దయ్ రమ్దాన్ మండ్రు ఇజి నాను గటిజ వెహ్పిన. ఎందానిజ్ ఇహిజ మీలోఇ ఎయెన్ బా సాజి సోన్ ఇదెర్. గాని ఓడః ఉండ్రెనె పాడాఃన సొనాద్.

23-24 ఎందానిజ్ ఇహిజ, పొదొయ్ నాను, ఎయె వాండ్రునో, ఎమేణి దేవుణుదిజ్ పార్దనం కిజిననో, అయ దేవుణు దూత నాబాన్ వాతండ్రె, 'పవులు, తియెల్ ఆమ. నీను కయ్ సరు రాజు ఎద్రు నిల్లెజ్ వలె. దేవుణు కనికారమాతికాన్. నీవందిజ్ ఇదిలో నీ వెట మన్నివరి పాణమ్కు దేవుణు గెల్ పిస్సాన్లై' ఇజి వెహ్హాన్.

25 అందెజె బాబురాండె, దయ్ రమ్దాన్ మండ్రు. ఎందనిజ్ ఇహిజ దూత నావెట వెహ్హివజ జర్గినాద్ ఇజి నాను దేవుణు మాట నమ్మిజిన.

26 గాని మా ఓడః గాలిదు సొన్ని ఎంబెబా ఉండ్రీ ద్విప్పుదు పాడానాద్", ఇజి పవులు వరివెట వెహ్హాన్.

27 పదినాల్లి రోస్కు అద్రియ ఇని సమ్దరమ్దు మాపు ముసూర్జిజ్ అబె ఇబ్బె బూలాజి మహాప్. మదరెయ్ తు ఆతిజ్ ఎంబెనో ఉండ్రీ దేసమ్ డగ్రు వాజినాప్ ఇజి ఓడః నడిఃపిసినివరిజ్ ఉదెసమ్దు వాతాద్.

28 అందెజె వారు ఇజిరి బరుదిజ్ తాడు తొహ్పి డిఃప్తారె ఎసా లోతు మనాద్ ఇజి సుడఃతార్. నూట ఇర్వయ్ అడుఃగుజ్ లోతు మనాద్ ఇజి నెస్తార్. నెగం వెనుక మరి డిఃప్తారె తొబయ్ అడుఃగుజ్ లోతు మనాద్ ఇజి నెస్తార్.

29 మా ఓడః ఓరదు మన్ని పణుకుముస్కు తగ్గినాదో ఇజి తియెలాతారె వారు ఓడః వెనుకపడఃకదాన్ నాల్లి లంగరుజ్ డిఃప్తారె జాయ్ ఆనెండ పార్దనం కిజి మహార్.

30 ఇహిజ్, ఓడః నడిఃప్పికార్ ఓడః డిఃసి సొండ్రెజ్ సుడఃతార్. వారు ఓడః ముందాల్ పడఃక మన్ని లంగరుజ్ డిఃప్తెజ్ ఇజి నాటిని ఓడఃదు మన్ని ఇజిరి ఓడః సమ్దరమ్దు డిఃప్తార్. ఇజిరి ఓడఃదు ఎక్కిసొండ్రెజ్

అలోసనం కిత్తార్.

31 పవులు అక్క నెస్తాండ్రె సదాతిపతివెట, “సయ్నమ్దివరివెట, యా ఓడః నడిపిసినికార్ ఓడః డిసి సొనార్ ఇహిజ, మీరు తప్రె ఆదెజ్ అట్ఇదెర్”, ఇహాన్.

32 అందెజె సయ్నమ్దికార్ ఇజిరి ఓడః తొప్తామహి నాసు కుతారె సమ్దరమ్దు డిఃస్త సితార్.

33 కోడిఃజామ్దు పవులు విజెరె వెట వెహ్తాన్, “ఏలు బోజనం కిదు, మీరు బోజనం కివ్ండజి పదినాల్లి రోస్కు ఆతె. నిస్సా రోస్కు మీరు మన్ను బాద ఆజి ఇనికబా ఉణెఎండ మహిదెర్.

34 అందెజె నాసు బతిమాల్లిన, బోజనం కిదు. ఎండనిజ్ ఇహిజ మీరు సావండ మండ్రెజ్ వలె ఇహిజ బోజనం కిదెజ్వలె. తియెలామాట్. మీలోఇ ఎయె బుర్రదాన్బా ఉండ్రె కొప్పుబా రాల్జి సాన్వద్ ఇహాన్.

35 ఈహు వెప్తా వెనుక పవులు రొట్టె అస్తాండ్రె వారు సుడఃజి మహివలె దేవుణుదిజ్ వందనమ్కు వెహ్తాండ్రె రొటె ముకెజ్ కితాండ్రె తిండ్రెజ్ మొదొల్స్తాన్.

36 వారు విజెరె దయ్తరం ఆతారె బోజనం కిత్తార్.

37 అయ ఓడఃదు మాపు మొత్తం రుండివందెజ్ డబయ్ఆరు - మంది మణిసిర్ మహాప్.

38 వారు పొటపంజు ఉటి వీస్తి వెనుక గొదుముజ్ సమ్దరమ్దు విసిర్తారె ఓడః సుల్కాజ్ కిత్తార్.

ఓడః బదెజ్ ఆజినాద్

39 పొద్దు సొత్తిజ్ వారు అందితి దేసెం ఎంబెణి దేసెం ఇజి నెన్ఏతార్ గాని ఓడః ఉండ్రె ఇన్కు మన్ని పడఃకాద్ ఒతెజ్ తగితి ఉండ్రె నెగ్గి పడక సుడఃతారె బాన్ ఒనాట్ ఇజి ఒడిఃబితార్.

40 అందెజె ఓడః నడిపిసినికార్ లంగరుజ్ తొప్తామహి నాస్కుజ్ కుతారె సమ్దరమ్దు డిఃస్తార్. ఓడః నడిఃప్పి సుకానుజ్ కట్టుజ్

కుతార్. ముందాల్ పడకాదు మహి సాప ఎకిస్తారె గాలి నెక్కి బనిలెకెండ్ ఒరదు నడకెప్పిస్తార్.

41 గాని ఓడః ఏరులోఇ మన్ని ఉండ్రీ ఇస్కు మెటుదు డఃసె ఆతాదె ఓడః ముందాహిక ఇస్కాదు నాడితాద్. వెనుక పడకాదు పెరి ఉల్కెజ్ డెయ్తిజ్ ఓడః బదెజ్ బదెజ్ ఆత సాహాద్.

42 జెలిదాన్ ఒసి మహి లోకుర్ సమ్దరమ్దు ఈత డెయ్తిజ్ తప్తె ఆజి సానార్ ఇజి తియెలాతారె వరిజ్ సప్తెజ్ సయ్నమ్దికార్ ఆలోసనం కిత్తార్*.

43 గాని సతాతిపతి పవులు గిల్పిస్తెజ్ ఒడఃబిజి సయ్నమ్ది వరి ఆలోసనమ్దిజ్ సరి సివితాన్. ఈత డెయ్తిజ్ నెన్నివారు ముందాల సమ్దరమ్దు డిగ్జి గదెం డాట్టి ఈత డెయ్తిజ్ ఒరదు సొండ్రు ఇజి ఆడ్ర సిత్తాన్.

44 మహివరిజ్ బల్లెజ్ సెక్కెజ్ ఓడఃది ముక్కెజ్ అసి ఒడ్డుదు సొండ్రెజ్ ఆడ్ర సిత్తాన్. ఈహె మాపు విజెపె గెల్స్తాపె ఒడ్డుదు అందితాప్.

28

మెలిత ద్వీపుదు అందిజినార్

1 మాపు తప్తె ఆతి వెనుక అయా ద్వీపు పేరు మెలిత ఇజి నెస్తాప్.

2 అయ ద్వీపుదికార్ మజి కిత్తి సాయం నిస్సా నసా ఆవిద్. వారు సిసు ఎర్తారె మజి విజెరిజ్ కూడఃవ్తార్. ఎందానిజ్ ఇహిజు పిరు డెయ్తిజ్ మొదొల్స్తెజ్ పిన్ని కితాద్.

3 పవులు ఉండ్రీ కట రివెజ్ పెప్తా తతాండ్రె దొస్తాన్. అక్క సిసుముస్కు అర్పివలె గొప్ప వినం మన్ని ఉండ్రీ సరాన్ వేడిదిజ్ వెహ్కాణ్ వెల్లి వాతాదె పవులు కిదు కట్టాద్.

4 పవులు కిదు సరాన్ దూజ్జిమహిక అయ ద్వీపుదికార్ సుడఃతిజ్ వారు ఒరెన్ వెట ఒరెన్ వర్గితార్, “నిజమ్నె, వీండ్రు లోకాజ్

* 27:42 27:42 కయ్లువారు తప్తె ఆతిజు వరిజ్ కాప్ కిని సయ్నమ్ది వరిజ్ వరి అతికారి లోకుర్ సప్తెజ్ ఇజి రోమ రూలు మహాద్

సమ్మికాండ్రె, ఏలు సుడఃఅ, సమ్దరమ్దాన్ గెలిసి వాతాన్ గాని నాయున్ సీని దేవుణు విన్నిజ్ బత్కిదెజ్ సరి సిఎన్.

5 గాని పవులు అయ సరాన్దిజ్ సిసుముస్కు నడఃతిజ్ అది సిసుద్ అర్తాద్. పవులుజ్ ఇనికబా ఆవతాద్.

6 ఆ ద్వీపుదు మనికార్ పవులు ఉబినాన్, సిలిజ వెటనె సానాన్ ఇజి ఒడిఃబిజి సుడఃజి మహార్. గాని వారు సుడఃజిమహిజ్ పవులు ఇనికబా ఆవతాద్. అందెజె వారు వరి మస్సు మారిస్తారె, 'వీండ్రు ఒరెన్ దేవుణులెకెండ్ మన్నికాన్' ఇజి వెహ్తార్.

7 అయ ద్వీపుది నెయ్యి ఆతి పొప్లి ఇనివన్నిజ్ బానె డగ్రునె బూమిజ్ మహె. వాండ్రు మజి వన్ని కూలెజి వజి మర్యాద సితండ్రె మూండ్రి రొస్కు వన్ని ఇండ్రి కూడుఃహ్తాన్.

8 అయ నెయ్యి అప్పొసి నోబుదిజ్, మరి నెత్తెర్పోటదాన్ బాద ఆజి మహాన్. పవులు, వాండ్రు మహి గదిలోఇ సాహాండ్రి పార్లనం కితాండ్రి వన్ని ముస్కు కికు ఇడఃజి వన్నిజ్ నెగెండ్ కితాన్.

9 ఇక జర్తిజ్ అయా ద్వీపుదు కస్టం అస్తిమహికార్ విజేరె బానె వాతారె నెగెండ్ ఆతార్.

10 వారు మజి నండ్రి ఇనాయమ్కు సితారె నెగ్గిక కితార్. వెనుక మాపు పయనమాతివలె మజి అవనరం మనికెజ్ విజు ఓడఃదు తత్తారె ఇట్టార్.

పవులు మెలిత ద్వీపుదాన్ రోమ పట్నం సొన్నినాన్

11 ముండ్రి నెలెజ్ ఆతి వెనుక అలెక్సంత్రియదాన్ వాతి ఉండ్రి ఓడః ఏక్తాపె పయనమాతాప్. అయ ఓడః పిన్ని కాలమ్దు మెలిత ద్వీపుదు మహాద్. కాస్తరు, పోలుక్కు ఇని జవల దెయమ్కాణి బొమ్మెజ్ ఆ ఓడః ముందాహిబాన్ మహాద్.

12 మాపు సురకూస్ ఇనిబాన్ వాతాపె బానె మూండ్రి రొస్కు మహాప్.

13 బాణిజ్ పయనమాతాపె సుటుల్లం తిర్వజి రేగియు ఇనిబాన్ వాతాప్. ఉండ్రి రోజు వెనుక దసిణ దరోట్దాన్ గాలి డెయ్తిజ్ మహ్న నాండిజ్ పొతియిలి ఇనిబాన్ వాతాప్.

14 బానె నమ్మితి వరిజ్ సెగొండారిజ్ సుడఃతావ్. ‘మాబాన్ వారం రోస్కు మండ్రు’ ఇజి వారు మజి బతిమాలితార్. దన్నివెనుక మాపు రోమ పట్టమదు వాతావ్.

15 రోమాదు మహి నమ్మితికార్ మాపు రోమాదు వాజినావ్ ఇజి కబ్బు వెహారె సెగొండార్ రోమ పట్టమదాన్ అపియాదు* మహి సత దాక, మరి సెగొండార్ మూండ్రీ సత్రమ్కు† మహి బాడ్డిదాక మజి కూక్కి ఒతెజ్ వాతార్. పవులు వరిజ్ సుడఃతిజ్ దేవుణుదిజ్ స్తుతి కిత్తాన్. వన్నిజ్ దయరం వాతాద్.

16 రోమ పట్టమదు అందితిజ్ పవులుజ్, వన్నిజ్ కాప్కిని జమానివెట ఉండ్రీ ఆదు ఇండ్రో కేట మండ్రెజ్ సెలవ దొహ్కాద్.

పవులు రోమదు మన్ని యూదురిజ్ దేవుణు మాట వెప్పినాన్

17 మూండ్రీ రోస్కు సొహి వెనుక పవులు బానె మహి యూద పెద్దెల్జ వన్నిబాన్ కూకపిస్తాన్. వారు కూడఃజి వాతివలె పవులు వరివెట వెహ్తాన్, “తంబెరిజాండె, మా లోకాజ్ పడఃఇకెజ్ గాని, మా అనిగొరొరి అలవాటుజు పడఃఇకెజ్ గాని ఇనికబా నాను కివిత. ఇహిజ్బా, నజి యెరూసలేమ్దు అస్తారె రోమవరిజ్ ఒపజెప్తార్.

18 వారు నజి గవర్నరుబాన్ తత్తారె నండో ప్రస్సిజ్ వెన్బాజి సుడఃతివలె సావుదిజ్ తగితి తప్పు ఇనికబా నాను కివిత ఇజి తెలితాద్. అయావలె నజి డిస్సెజ్ సుడఃతార్.

19 గాని నజి డిస్సెజ్ యూదురు ఒప్పుకొడఃవతార్. అందెజె నా సొంత లోకుముస్కు నజి ఇని మొరొ సిల్లిజ్బా కయనరుబాన్ సొన్ని నావందిజ్ వెహ్తాజ్ ఆత.

20 అందెజె నాను మిజి సుడఃదెజ్ మీ వెట వర్గిదెజ్ మిజి కూకపిస్త. ఎందానిజ్ ఇహిజు ఇస్రాయేలు లోకు ఎయెవన్నివందిజ్ ఎద్దు సుడఃజి

* 28:15 28:15 అపియాదు మహి సత రోమ పట్టమదాన్ అరువయ్తొమ్మిది కిలో మీటర్ దూరం మహె † 28:15 28:15 పయనం కినికార్ నిద్రదిజ్ సొని గదిజ్. మూండ్రీ సత్రమ్కు మహి బాడ్డి రోమ పట్టమదాన్ యాబయ్ మూండ్రీ కిలో మీటర్ దూరం మహె

మంజినారో వన్నివందిజె నాను ఏలు యా గొలుస్కాణ్ తోహె ఆత మన్న”, ఇజి వరివెట వెహ్హాన్.

21 దన్నిజ్ యూదురు, “యూదయ ప్రాంతమ్దు మన్ని మా లోకాణిజ్ మీవందిజ్ మజి ఇని ఉత్రమ్బా రెవితాద్. ఇబ్బె వాతి మా లోకు ఎయెర్బా మీ వందిజ్ ఇని సెఇ వూటబా వెహ్వితార్. నీను ఇనికాదో తప్పు కిత్తి ఇజి మాపు వెన్వితాప్.

22 గాని యా సజతివందిజ్ మీ ఆలోసనం ఇనిక ఇజి వెండ్రెజ్ మాపు ఆస ఆజినాప్. ఎందానిజ్ ఇహిజ నీను కూడితి మహి యా జటువందిజ్ విజేరె లోకుర్ పగదాన్ వెహ్హినార్ ఇజి మాపు నెసినాప్”, ఇహార్.

23 అందెజె వారు పవులు వెట పలాన్ రోజు కూడెదెజ్ ఏర్పాటు కితారె పవులు బత్కినిబాన్ మంద ఆజి వాతార్. పవులు పెందాహాన్ అనీ పొదొయ్దాక నెగ్రెండ వరిజ్ వెహ్హి దేవుణు ఏలుబడిః వందిజ్ వరివెట వెహ్హాన్. మోసె సిత్తి రూలుజ్ దాన్, ప్రవక్తరు రాస్తి మాటెజాణ్ యేసువందిజ్ తోరిసి, వాండ్రు వెహ్హికెజ్ నిజమె ఇజి వెహ్హి తోరిస్తాన్. వరిజ్ ఒపుకోడిస్తెజ్ సుడెఃతాన్.

24 పవులు వెహ్హి మాటెజ్ సెగొండార్ నమ్మితార్, మహికార్ నమ్మివితార్.

25 వారు ఒరెన్ వెట మరి ఒరెన్ వర్గిజి నెక్త పొక్తారె ఉండ్రె మన్ను ఆదెజ్ అట్ఎండెతారె మర్జి సొహార్. వారు మర్జి సొని ముందాల పవులు వరివెట ఉండ్రె మాట వెహ్హాన్, “దేవుణు ఆత్మ యెసయ ప్రవక్త దాన్ మీ అనిగొగొర్ వెట వెహ్హి మాట నిజమె.

26 అక్క ఇనిక ఇహిజ, “నీను సొన్ని యా లోకాజ్ వెహ్హు. ‘మీరు బాగ వెంజినిదెర్ గాని అర్దం కిదెజ్ అట్ఇదెర్. బాగ సుడెఃజినిదెర్ గాని తోఇదెర్’.

27 ఎందానిజ్ ఇహిజ యా లోకురి మన్ను బేగి అర్దం కిఎద్. వారు కణుకెజ్ గిబ్బిజ్ మూక్త మనార్. సిల్లిజ్ వారు కణకాణ్ సుడెఃతార్ మరి. మన్నుదు అర్దం కిత్తార్ మరి. నా దరోట్ మహ్హిజ నాను వరిజ్ నెగెండ కిన”, ఇజి దేవుణు వెహ్హాన్.

28 అందెజె దేవుణు రక్కణ సీనాన్ ఇని సువార్త యూదురు ఆఇ వరిజ్ సీజినాన్ ఇజి, వారు అయ మాట వెనార్, ఇజి మీరు నెస్టెజ్ వలె”.

29-30 రుండి పంటెజ్ పూర్తి పవులు ఉండ్రీ ఇల్లు అదె లొస్తాండ్రె బత్తితాన్. వన్నిబాన్ వాతివరిజ్ విజెరిజ్ వాండ్రు డగ్రు కిత్తాన్.

31 దేవుణు ఏలుబడిః వందిజ్, ప్రబు ఆతి యేసుక్రీస్తు వందిజ్ దయరమ్దాన్, ఇని అడ్డు సిల్లెండ, నెస్సిస్తాన్.

Konda: కొండ బాసడు నెగ్గి కబ్బు
Konda Dora New Testament which was published in
2006

copyright © 2006 Wycliffe Bible Translators, Inc.

Language: Konda-Dora

Contributor: SIL International (in Asia)

All rights reserved.

2025-05-06

PDF generated using Haiola and XeLaTeX on 6 May 2025 from source files
dated 7 May 2025

840896da-3a66-5e43-9018-4a95a349d60c